

द्विजेन्द्रलाल-रचनासङ्घार

द्विजेन्द्रलाल राय

श्रीप्रमथनाथ विश्वी सम्पादित

मित्र ओ घोष

१० आमाचरण दे स्ट्रीट, कलिकाता १२

নাট্যকার ষ্টিভেন্সন

ষ্টিভেন্সন পৌরাণিক সামাজিক ও ঐতিহাসিক নানাত্রেণীর নাটক রচনা ক'রলেও ঐতিহাসিক নাটকের জগ্রেই তাঁর প্রসিদ্ধি সমধিক। ঐতিহাসিক নাটক রচনা ক'রতে গিয়েই তিনি দেখলেন যে, রঙ্গমঞ্চের সাধারণ দর্শক ঐ বস্তই চায়। তাদের মনস্তত্ত্বের এই রহস্য আবিষ্কার ক'রবার ফলে তিনি ঐতিহাসিক নাটক রচনাতেই আত্মনিয়োগ ক'রলেন। পৌরাণিক নাটকের ধারা পরিত্যক্ত হ'ল। অতঃপর গিরিশচন্দ্রের মতই তিনি রঙ্গমঞ্চের সাধারণ দর্শকের রুচিকে নাট্যরচনার লক্ষ্য ব'লে গ্রহণ ক'রলেন, গিরিশচন্দ্র যেমন সাধারণ দর্শকের রুচিকে অতিক্রম ক'রে যান নি, ষ্টিভেন্সনও তেমনি তাদের রুচির সীমানার মধ্যেই অবস্থান ক'রলেন। এর ফলে দুজনেই সমকালে জনপ্রিয়তার শিখরে উঠেছেন, যদিচ কালাতয়ে সে জনপ্রিয়তা তাঁদের আর নেই। কাজেই তাঁদের নাট্যসাহিত্যের বিচার ক'রবার সময়ে, তৎকালীন রুচির মানদণ্ডের ব্যবহার না ক'রলে, তাঁদের প্রতি অবিচার করা হবে।

গিরিশচন্দ্রের নাট্যসাহিত্যের প্রধান প্রেরণা তৎকালীন হিন্দুধর্মের পুনরুত্থানের ভাব এবং পরমহংসদেবের প্রভাব। সেকালের দর্শক-সাধারণও এই দুটি প্রেরণাতে প্রভাবিত ছিল। কাজেই অতিসহজেই তিনি তৎকালীন দর্শক-সমাজের মুখপাত্র হয়ে উঠে, জনপ্রিয়তা লাভ ক'রতে সক্ষম হয়েছিলেন। ষ্টিভেন্সনের ঐতিহাসিক নাটক রচনার প্রধান প্রেরণা দেশপ্রেম। গিরিশচন্দ্রের ভক্তিমূলক নাটকরচনার পরে অনেকটা সময় চলে গিয়েছে, দেশের চিন্তে ধর্মোন্মাদনার স্থলে দেশপ্রেমোন্মাদনা প্রবল হ'য়ে উঠেছে, একদিকে বঙ্গভঙ্গজনিত বিক্ষোভ, আর একদিকে সন্ত্রাসবাদ, সবসুদ্ধ মিলে মানসিক পট-পরিবর্তন ঘটে গিয়েছে। জনসাধারণের কাছে এখন পৌরাণিক নাটকের চেয়ে প্রিয় হয়ে উঠেছে এমন সব ঐতিহাসিক নাটক যাতে দেশপ্রেমের কথা আছে। ষ্টিভেন্সন জনসাধারণের এই মনোভাবটির সুযোগ গ্রহণ ক'রে রঙ্গমঞ্চে তাদের মুখপাত্র হয়ে উঠলেন। এই প্রসঙ্গে মনে করিয়ে দেওয়া যেতে পারে যে, রবীন্দ্রনাথের নাটকের জনপ্রিয়তার অভাবের কারণ তিনি কখনও দর্শক-

সাধারণের মুখশাঙ্কের পদটা দাবী করেননি। তাঁর নাটক জনসাধারণের রুচিকে অতিক্রম করে এগিয়ে গিয়েছে, অথচ তার মধ্যে নাটকীয় শিল্প এমন প্রবল নয় যে, রুচির পার্থক্য সত্ত্বেও জনসাধারণ তার পিছুপিছু ছুটবে। রঙ্গমঞ্চের সার্থক নাট্যকারকে অবশ্যই দর্শকসমাজকে তোষণ করতে হয়। কিন্তু তাই বলে দর্শকসাধারণের কাছে আত্মসমর্পণ করা চলে না। গিরিশচন্দ্র ও দ্বিজেন্দ্রলাল দর্শকসাধারণের কাছে আত্মসমর্পণ করেছেন, তার বদলে পেয়েছেন রঙ্গমঞ্চের সাফল্য। অল্পদিকে রবীন্দ্রনাথ দর্শকসাধারণকে লঙ্ঘন করে গিয়েছেন, কাজেই রঙ্গমঞ্চের সাফল্য তাঁর ভাগ্যে ঘটেনি। এই দুই শ্রেণীর ভুলের দৃষ্টান্ত। দর্শকসাধারণের রুচিকে স্বীকার করে নিয়েও তাকে লঙ্ঘন করতে পারলে যে সাফল্য ঘটে, নাট্যসাহিত্যের ক্ষেত্রে তাকেই বলা চলে যথার্থ অমরতা। এমন দৃষ্টান্ত বাংলা নাট্যসাহিত্যের ক্ষেত্রে এখনও দেখা দেয় নি। অন্য দেশের নাট্যসাহিত্যে অবশ্য আছে।

২

দ্বিজেন্দ্রলালের পৌরাণিক নাটকগুলির মধ্যে খুব সম্ভব 'সীতা' শ্রেষ্ঠ। তখনও তিনি রঙ্গমঞ্চের আলোয় বিভ্রান্ত হন নি, স্বাধীনভাবে লিখবার ক্ষমতা তখনও তাঁর ছিল। তাছাড়া তাঁর বহুমুখী প্রতিভার মধ্যে যে কবিত্বগুণটি সর্বশ্রেষ্ঠ, 'সীতা' নাটকে তার পূর্ণ স্বেচ্ছায় তিনি গ্রহণ করেছেন। একে বলেছেন নাট্যকাব্য। অর্থাৎ নাটকের চেয়ে কাব্যের গুণ এতে বেশী, নাট্যকারের কলমকে লঘুভাবে ধারণ করে কবির কলম এখানে সার্থক ভাবে সক্রিয়। কাজেই 'সীতার' আলোচনা করতে হলে, কাব্যরূপেই আলোচনা করতে হবে, যদিচ নাটক রূপটি একেবারে উপেক্ষা করা উচিত হবে না।

রামায়ণের 'উত্তরকাণ্ড' ও ভবভূতির 'উত্তরামচরিত' মিলিয়ে এর গল্পাংশ রচিত। অবশ্য কোন কোন ক্ষেত্রে কবির মৌলিকতাও বর্তমান। উদাহরণস্বরূপ পঞ্চমাস্কের পঞ্চম দৃশ্যে বাম্বীকির আশ্রমে রামচন্দ্র ও সীতার মিলন দৃশ্যের উল্লেখ করা যেতে পারে। এখানে কবি দেখিয়েছেন যে, সীতার পাতাল-প্রবেশের আসল কারণ অনৈসর্গিক কিছু নয়, নিতান্তই নৈসর্গিক ভূমিকম্প। এটি মৌলিক হওয়া সত্ত্বেও কাণ্ডজ্ঞানসম্মত মনে হয় না। কোথাও কিছু নেই হঠাৎ ভূমিকম্প আরম্ভ হ'ল, অগ্ন্যাগ্নি পাত্রপাত্রীর কাজের কিছু ক্ষতি হ'ল না, কেবল সীতা ফাটল দিয়ে অতলে তলিয়ে গেল, এ নিতান্তই অবিবাস্য ব্যাপার,

পাঠকের বিশ্বাসশক্তির উপরে অত্যন্ত বেশী চাপ পড়ে। পৌরাণিক ব্যাপারের বৈজ্ঞানিক ব্যাখ্যা ক'রতে গেলে এমন হওয়া অনিবার্ণ। সমস্ত ঘটনাটির মধ্যে যে হাশ্বকরতা আছে, হাশ্বরসিকু দ্বিজেন্দ্রলালের চোখে তা এড়িয়ে গেছে। দেখে বিশ্বয় বোধ হয়। এই একটি ঘটনা বাদ দিলে সম্ভাব্যতার দিক দিয়ে আপত্তিকর আর কিছু আছে মনে হয় না।

৩

নাটকটি মিত্রাক্ষরে রচিত। এতে আপত্তি করা চলে না, কিন্তু একাধিক দৃশ্বে, যেমন প্রথম অঙ্কের তৃতীয় দৃশ্বে লক্ষণ ও উর্মিলার কথোপকথনে, ঐ অঙ্কের চতুর্থ দৃশ্বে রাম ও সীতার কথোপকথনে যে মিত্রাক্ষর ব্যবহৃত হয়েছে, তাতে কথোপকথনের স্বাভাবিক ছন্দের চেয়ে গীতিস্পন্দ প্রবলতর। কিছুক্ষণ শুনবার পরেই দর্শকের মনে হয় যেন, সুরহীন গান শ্রবণ করছি। এতে নাটকের স্বাভাবিকতার হানি হয় বলে আশঙ্কা করি। মিত্রাক্ষর বা অমিত্রাক্ষর ধাই হোক না কেন, সংলাপের স্বাভাবিকতা অত্যাবশ্যক। সেটি ক্ষুণ্ণ হ'লে রসহানি না ঘটে যায় না। আর প্রথম অঙ্কের দ্বিতীয় দৃশ্বে পৌরাণিক নরনারীর মুখে কোন কোন লৌকিক সম্বোধন যেমন, 'দাদা', 'বোন', কিংবা শ্রুতকীর্তির মুখে

“কেউ ভালবাসে লুচি

কেউ বাসে পরমায়”

শ্রুতি উক্তি রসহানিকর। কারণ, পৌরাণিক নরনারী পাঠকের কল্পনায় যে রঙে ও যে তুলিতে অঙ্কিত হয়ে আছে, তার মধ্যে এসব লৌকিক উক্তির নিতান্তই স্থানাভাব।

তৃতীয় দৃশ্বের চতুর্থ অঙ্কে মহর্ষি বাল্মীকির মুখে,

“উত্তর তার শুনলে নিশ্চয়,

খাইতে আসিবে।”

কিংবা,

“এটা না বলিলে ছাই,

ছিল ভাল।”

এই একই কারণে আপত্তিকর।

দ্বিজেন্দ্রলালের কাব্যে মাঝেমাঝে গজের টুকরো অকারণে এসে পড়ে, এই

নাটকখানিতেও এই দোষটি অবিরল। চতুর্থ অঙ্কের দ্বিতীয় দৃশ্বে বশিষ্ঠ কথিত, কিন্তু সপত্নীক হওয়া চাই।” কিংবা রামচন্দ্র কথিত, “দ্বিতীয় দার পরিগ্রহ করিতে হইবে আজ,” প্রভৃতি উক্তি, পঞ্চময় সংলাপে গৃহের স্বাভাবিকতা আনয়ন চেষ্টার অসার্থক ফল।

এই নাটকখানির শ্রেষ্ঠ সম্পদ সীতা চরিত্র, এবং সেই সঙ্গে সীতার প্রতি রামচন্দ্রের আচরণ। এই আচরণকে সমর্থন করাতে লেখককে প্রতিকূল সমালোচনা শুভতে হয়েছিল। কাজেই এ বিষয়ে কিছু বিস্তারিত আলোচনা আবশ্যিক।

8

রামচরিত্রে এ যুগের পাঠক যে কয়েকটি আপত্তিজনক আচরণ লক্ষ্য করে থাকেন, তন্মধ্যে দুটি সীতা নাট্য-কাব্যে আছে। সীতা-নির্বাসন ও শূদ্রক-বধ এ যুগের পাঠকের চক্ষে রামচরিত্রের অনপনয় কলঙ্ক। কিন্তু এজন্য দ্বিজেন্দ্রলাল বা অন্ত কোন রামচরিত্র-চিত্রকরকে দোষ দেওয়া উচিত নয়। সমাজপতি হিসেবে সেকালের প্রচলিত বিধিবিধান মানতে রামচন্দ্র বাধ্য ছিলেন, দোষ দিতে হ'লে সেকালের সমাজকে কিংবা সমাজের হ'য়ে ধারা বিধিবিধান সৃষ্টি করেছিলেন সেই বশিষ্ঠ প্রভৃতি মূনিদের দোষ দিতে হয়। একালের দৃষ্টান্ত দিয়ে ব্যাপারটা বুঝিয়ে বলি।

ব্রিটিশ পার্লামেন্ট ইংলণ্ডের নরনারীর পক্ষে পালনীয় আইন প্রস্তত করে থাকেন। ইংলণ্ডের রাজা বা তাঁর নির্দিষ্ট প্রধানমন্ত্রী ঐ আইনের মর্ষাদা যাতে রক্ষিত হয় তা দেখতে বাধ্য। এ বিষয়ে তাঁদের কোন স্বাধীনতা নেই। আইন যদি দৃশ্যীয় হয় তবে সে দোষ পার্লামেন্টের, রাজা বা প্রধানমন্ত্রীর নয়। বরঞ্চ তাঁদের হাতে আইনের অমর্ষাদা ঘটলেই তাঁরা দৃশ্যীয়। সেকালেও রূপান্তরে এইরকম প্রথা ছিল। ব্রাহ্মণগণ সমাজের পালনীয় আইন প্রণয়ন করতেন, সমাজপতি বা চীফ্-এক্সিকিউটিভ হিসেবে রাজার কর্তব্য নিরপেক্ষভাবে ঐ আইনের প্রয়োগ। আইন দৃশ্যীয় হ'লে দোষ রাজার নয়, দোষ আইন-প্রণেতা ব্রাহ্মণগণের, অর্থাৎ তৎকালীন সমাজমানসের। এই কথাটি মনে রাখলে সীতা-নির্বাসন ও শূদ্রক-বধের দায়িত্ব থেকে রামচন্দ্রকে অনায়াসে মুক্তি দেওয়া যায়। কাজ দুটি যে অগ্রায় সে বিষয়ে নাট্যকারের কোন সন্দেহ ছিল না, তিনি যদি পুরাণ-বর্ণিত ঘটনার যথাযথ বর্ণনা করে থাকেন, তবে অগ্রায় তিনি করেনই নি, বরং শিল্পীর কর্তব্য পালন করেছেন। এখানে নাট্যকার-লিখিত ভূমিকার প্রাসঙ্গিক অংশ উদ্ধার করে দিচ্ছি, যাতে এ

বিষয়ে তাঁর মনোভাব বিবৃত হয়েছে।

“আমি স্বীকার করি যে, রাম কর্তৃক শূদ্রকরাজার শিরশ্ছেদ আমার কাছে একটি গর্হিত কার্য বলিয়া প্রতীতি হয়। আমি সে অংশ চিত্রিত করিতে, সে দোষ কালন করিতে, বা তাহার কোন আধ্যাত্মিক ব্যাখ্যা দিতে চেষ্টা করি নাই। অনেক হিন্দুশ্বেত্র পক্ষপাতীদের মতে, সে কালে হিন্দুজাতির যাহাই ছিল তাহাই জ্ঞানের ও নীতির চরম উৎকর্ষ ছিল। আমার সে ধারণা নহে। আমার মতে শূদ্রের প্রতি ব্রাহ্মণের শাস্ত্রীয় ব্যবহার অতি অত্যাচার ছিল। গ্রীসে হেন্টগণ যেরূপ প্রপীড়িত হইত, আমাদের দেশে শূদ্রগণ প্রায় সেইরূপ প্রপীড়িত হইত। মম্বাদি বিধানে ইহার ভূরি ভূরি নিদর্শন পাওয়া যায়। আমার বিবেচনায় শূদ্রকরাজার প্রতি রামের ব্যবহার অত্যন্ত নিদর্শন। কিন্তু আমি এ ব্যবহারের জন্য শ্রীরামচন্দ্রকে দোষী না করিয়া তাঁহার গুরুদেব বশিষ্ঠকে দোষী করিয়াছি, এবং মহর্ষি বাম্বীকির কাঃ বশিষ্ঠের পরাজয়ে বশিষ্ঠের মত ভ্রান্ত এই মাত্র কল্পনা করিয়াছি। তাঁহার মং উদ্দেশ্য ও উদার হৃদয়কে ক্ষুণ্ণ করিবার চেষ্টা করি নাই।”

আরও একটি কথা, রামচন্দ্রের চরিত্রে যে নিরপেক্ষভাবে আইন প্রয়োগের বলিষ্ঠতা ছিল, তা প্রমাণ করিবার উদ্দেশ্যেই মহর্ষি বাম্বীকির অল্পসরণে ষ্টিজ্জলাল সীতা-নির্বাসন ও শূদ্রক-বধ চিত্রিত করেছেন। শুধু শূদ্রক-বধ চিত্রিত হলে আইন প্রয়োগে রামচন্দ্রের নিরপেক্ষতা প্রমাণ হোত না, তিনি যে কত নিরপেক্ষ ও মম্বহীন ছিলেন তার প্রমাণ সীতা-নির্বাসন। এইজন্মই একালের লোক তাঁকে দোষ দিলেও সেকালের লোক তাঁকে দোষ দেয়নি, কারণ তিনি সমাজপতি হিসেবে আইন অল্পসারে কাজ করেছেন।

৫

নাট্যকার গ্রন্থখানিকে কাব্যকলা বা নাট্যকাব্যরূপে দেখতে অল্পরোধ করেছেন, আমরাও সেইভাবে অর্থাৎ নাট্যরূপকে গৌণ করে দিয়ে কাব্যরূপেই দেখতে চেষ্টা করেছি। তাই কাব্য হিসাবে যে সব ক্রটি চোখে পড়েছে গোড়াতেই তার আলোচনা করেছি। কেবল একটি কথার উল্লেখ আবশ্যিক। প্রথম অঙ্কের দ্বিতীয় দৃশ্যে সীতা, উর্মিলা, শাস্তা প্রভৃতির সংলাপে, বিশেষভাবে সীতার বনবাস অভিজ্ঞতা বর্ণনা প্রসঙ্গে মধুসূদন-অঙ্কিত সীতা ও সরমার উপাখ্যান মনে পড়ে যায়। আগে যা বলেছি তারই পুনরুক্তি করে সীতা-প্রসঙ্গ শেষ করা যেতে পারে। জনপ্রিয় নাট্যকার ষ্টিজ্জলালের পরিচয় এই নাট্যকাব্যে নাই, এখানে তাঁর স্বল্পপরিচিত

কবিরূপটির প্রকাশ। নাট্যকার দ্বিজেন্দ্রলালকে সন্ধান ক'রতে হবে তার ঐতিহাসিক নাটকসমূহে।

৬

দ্বিজেন্দ্রলালের ঐতিহাসিক নাটকের সংখ্যা সাতখানা। 'সোরাব-রুস্তম'কে ঠিক ঐতিহাসিক বলা চলে না, লেখক বলেছেন, অপেরা। এই সাতখানার মধ্যে 'তারাবান্দে' ঐতিহাসিক নাটক হ'লেও দেশপ্রেম তার প্রধান প্রেরণা নয়। কাজেই বাকী থাকল ছয়খানা, এদের মধ্যে 'প্রতাপ সিংহ' রচিত ১২০৫ সালে, আর 'চন্দ্রগুপ্ত' ১২১১ সালে। ১২১৫ সালে প্রকাশিত 'সিংহল-বিজয়' নাটককে ঐতিহাসিক বলা উচিত নয়। 'সোরাব রুস্তম' ও 'সিংহল বিজয়'কে পৌরাণিক নাটক বলা উচিত। এখন এই সাতখানির মধ্যে সবগুলিতেই যে দেশপ্রেমের উন্মাদনা আছে এমন নয়। 'নূরজাহান' ও 'সাজাহান' মোগল বাদশাহদের পারিবারিক অস্ত্রঘৃন্দ্রের কাহিনী। 'প্রতাপসিংহ', 'দুর্গাদান', 'মেবার পতন' ও 'চন্দ্রগুপ্ত' দেশপ্রেমে উদ্বোধিত ঐতিহাসিক নাটক। এই সাতখানির মধ্যে যে কোন একখানিকে অবলম্বন ক'রে দ্বিজেন্দ্রলালের ঐতিহাসিক নাটক রচনার রীতি ও পদ্ধতির ব্যাখ্যা করা সম্ভব, কারণ এ রীতি ও পদ্ধতি শেক্সপীয়ারের নাটকের ছাঁচে গঠিত। নাটকগুলির মধ্যে যদি 'সাজাহান'কে নির্বাচন করি, তবে তার কারণ এ নয় যে, অস্ত্রগুলোর চেয়ে এ নাটকখানা শ্রেষ্ঠতর। ঐতিহাসিক নাটকের রচনা-পর্যায় 'সাজাহান'-এর স্থান মাঝামাঝি সময়ে। কাজেই এখানে কবির পরিণত কলমকে পাওয়া যাবে এ সম্ভাবনাতেই 'সাজাহান' নাটককে আলোচনার উদ্দেশ্যে গ্রহণ করেছি। কিন্তু তার আগে আর একটি কথা বলা আবশ্যিক।

বাঙালী লেখক দেশপ্রেমের চিত্র অঙ্কিত ক'রবার উদ্দেশ্যে গোড়া থেকেই রাজপুতানা বা মহারাষ্ট্রে গিয়েছেন, বঙ্কিমচন্দ্র, রমেশচন্দ্র, জ্যোতিরিন্দ্রনাথ প্রভৃতি অনেকের নাম উল্লেখ করা যেতে পারে। পরবর্তীকালে দ্বিজেন্দ্রলালকেও পূর্বসূরীদের পথ গ্রহণ ক'রতে হয়েছে। রাজপুতবীরদের বাদশাহ-বিরোধিতার মধ্যে বাঙালী লেখকগণ ইংরাজ-সরকার-বিরোধিতার তাৎপর্য আরোপিত করেছেন। এর দুটি কারণ। প্রথম, পরাধীন দেশে সব কথা খুলে বলা সম্ভব নয়। তাই ঐতিহাসিক নজীর দেখিয়ে পরোক্ষে বক্তব্য বলতে হোত। দ্বিতীয়, বাংলাদেশে অহরূপ বীরত্বের দৃষ্টান্ত সহজলভ্য ছিল না। যদিচ, অনেকে ইতিহাসের যার্থার্থ্য

সমালোচক সংঘত ভাষা ব্যবহার করেছেন, অসহ্য বললে অন্ডায় হোত না। সত্যবতী, কল্যাণী, মানসী এবং নবীনচন্দ্রের হুভঙ্গী সকলেই অসহ্য। ধারা বঙ্কিমচন্দ্রের কল্যাণী, শাস্তি ও প্রফুল্লমুখীকে আদর্শবাদিনী দোষে অসহ্য মনে করেন, পূর্বোক্ত চরিত্রগুলি দেখলে বুঝতে পারবেন সত্যকার অসহ্য চরিত্র কাকে বলে। বাংলা সাহিত্যে যে প্রথমশ্রেণীর নাটক রচিত হয় নি, তার কারণ আদর্শবাদের দিকে আমাদের স্বাভাবিক ঝোঁক। পূর্ণপ্রেক্ষাগৃহ দেখলেই বক্তৃত্তা ক'রবার লোভ আমাদের মজ্জাগত প্রবৃত্তি। এই দোষটি গিরিশচন্দ্র ও দ্বিজেন্দ্রলালে খুব বেশী প্রকট, বাস্তবের উপাদানে তাঁদের নাটক গঠিত ব'লে স্থানচ্যুত আদর্শবাদ অধিকতর পীড়াদায়ক। এর একটি প্রধান কারণ পরাধীন জাত হিসেবে যে সব কথা খোলাখুলি মাঠে ময়দানে ব'লবার স্বযোগ আমাদের ছিল না, রক্তমঞ্চে ঐতিহাসিক বা পৌরাণিক পাত্রপাত্রীর মুখ দিয়ে সে সব কথা ব'লবার স্বযোগ আমরা গ্রহণ করেছি। দর্শকের কাছে আত্মসমর্পণের যে প্রসঙ্গ আগে তুলেছি এগুলি সমস্তই তার দৃষ্টান্ত। 'মেবার পতন' নাটকে সত্যবতী ও চারণদলের দেশাত্মবোধক গান এইরূপ আর একটি দৃষ্টান্ত। বলা বাহুল্য দ্বিজেন্দ্রলালের অগ্ৰাণ্ত অনেক দেশাত্মবোধক গান ও নাটকের মতো এগুলিতেও সাময়িক উদ্দেশ্য সাধিত হয়েছে। কিন্তু নাট্যাশিল্পের বিচার ক'রতে বসলে, এগুলিকে গুরুতর ত্রুটি ব'লে মনে হতে বাধ্য। দেশপ্রেমের চেয়ে বিশ্বপ্রেম বড় হওয়া অসম্ভব নয়, কিন্তু নাটকের মধ্যে সেটা শিল্পের নিয়ম মেনে প্রকাশিত হওয়া আবশ্যিক। বলা বাহুল্য, সেভাবে প্রকাশিত হয় নি, এমন কি সেভাবে প্রকাশিত হওয়া যে উচিত এ ধারণাও বোধ করি লেখকের মনকে স্পর্শ করে নি।

'চন্দ্রগুপ্ত' বোধকরি দ্বিজেন্দ্রলালের সবচেয়ে জনপ্রিয় নাটক। এ নাটকখানিতে উগ্র দেশপ্রেম নেই সত্য, কিন্তু প্রতিকূল অবস্থার মধ্যে সাম্রাজ্য স্থাপনের দৃষ্টান্ত দর্শককে নিশ্চয়ই উদ্বোধিত করে। প্রথম থেকে আজ অবধি চাণক্য চরিত্র কুশলী অভিনেতাকে আকর্ষণ ক'রেছে।

চাণক্য চরিত্রে আপাতদৃষ্টিতে একটা জটিলতা আছে। সে কুট রাজনীতিজ্ঞ, অভিমানী ব্রাহ্মণ এবং পারিবারিক জীবনে ভাগ্যহীন। এই তিনটির ঘাত প্রতিঘাতে তার চরিত্র গ'ড়ে উঠেছে। কিন্তু তার প্রতিক্রিয়া চরিত্রের মর্মে গিয়ে প্রবেশ ক'রেছে মনে হয় না। কাজেই জটিলতায় তার ব্যক্তিত্বের কোন পরিবর্তন এনে দেয় নি। চাণক্য যদি ঐতিহাসিক ব্যক্তি হন, যদি তাঁর

একক প্রচেষ্টায় মৌর্য সাম্রাজ্য প্রতিষ্ঠিত হয়ে থাকে, তবে নিঃসন্দেহে তিনি ভারতবর্ষের অশ্রুতম শ্রেষ্ঠ সম্ভান। দ্বিজেন্দ্রলালের চাণক্যকে সেই ব্যক্তি বলে ধারণা ক'রতে মন উৎসাহ বোধ করে না। বাংলাদেশের গ্রামে গ্রামে দলাদলি-নিপুণ চক্রান্তকারী যে সব বুদ্ধকে দেখা যায় দ্বিজেন্দ্রলালের চাণক্য তাদেরই আদর্শে গঠিত। বাংলা যাত্রাপালার শিবের সঙ্গে কালিদাসের শিবের যে সম্পর্ক, দ্বিজেন্দ্রলালের চাণক্যের সঙ্গে অর্ধশাস্ত্র-প্রণেতা চাণক্যেরও প্রায় সেইরূপ সম্বন্ধ। এইরূপ একটি চরিত্র যে কুশলী অভিনেতাগণের ও দর্শকগণের প্রিয়, তার কারণ গ্রাম্য দলাদলি, ধোপানাপিত বন্ধ করার সামাজিক প্রথা, এবং চক্রী গ্রাম্য বুদ্ধদের প্রতি আমাদের জাতিগত, মজ্জাগত টান। এখানেও দেখি যে, ঐতিহাসিক চরিত্রের বেনামদার রূপে একটি সুপরিচিত জনপ্রিয় চরিত্র সৃষ্টি ক'রে নাট্যকার দর্শকের কাছে আত্মসমর্পণ ক'রেছেন।

১০

‘প্রতাপসিংহ’ ও ‘দুর্গাদাস’ নাটক দুখানিকে একত্রে বিচার করা যেতে পারে, কারণ দোষে-গুণে দুখানি-ই এক পর্যায়ের। কোনখানি-ই জীবনের নিয়মে সৃষ্ট হ'য়ে ওঠেনি, স্বদেশী আন্দোলনের উন্মাদনায় প্রেক্ষাগৃহ ও গোলদীঘির অশ্রুত করতালি এদের মধ্যে একপ্রকার যান্ত্রিক শক্তি সঞ্চারিত ক'রেছে। প্রাণের শক্তি ও যন্ত্রের শক্তিতে যে অনেক প্রভেদ তা বুকিয়ে বলবার প্রয়োজন হয় না। এসব নাটকে যে সব পাত্র ভাল, যেমন প্রতাপসিংহ ও দুর্গাদাস, তারা সর্বগুণের আধার। যে মন্দ যেমন গুলমেয়ার, সে সর্বদোষের আধার। আর কতকগুলি চরিত্র, যেমন শক্তসিংহ ও ইরা, তারা এমন ঘোরতর আদর্শবাদী যে, তাদের রক্তমাংসের মাছষ বলে মনে ক'রবার কোন হেতু নেই। ‘প্রতাপসিংহ’ নাটকে দিলীর খাঁ বলছেন, “হিন্দু-মুসলমান একবার জাতিদ্বেষ ভুলে, পরস্পরকে ভাই বলে আলিঙ্গন করুক দেখি, সম্রাট! সেদিন হিমালয় হতে কুমারিকা পর্যন্ত এমন এক সাম্রাজ্য স্থাপিত হবে, যা সংসারে কেহ কখনও দেখে নাই।” এ ষোড়শ-শতাব্দীর মনোভাব নয়। স্বদেশী আন্দোলনের দিনে হিন্দু মুসলমান মিলনের তাগিদে এই মনোভাবের উদ্ভব। এই প্রসঙ্গে একটি কথা মনে করিয়ে দেওয়া আবশ্যিক যে, দ্বিজেন্দ্রলাল ও তাঁর সমকালীন অনেক সাহিত্যিককে একটি কঠিন সমস্যার সম্মুখীন হ'তে হয়েছে, কিন্তু কেউ সমাধান ক'রতে পেরেছেন মনে হয় না। প্রতাপসিংহ ও দুর্গাদাস দু'জনেই পরাক্রমশালী মোগল

বাদশাহের বিরুদ্ধে লড়ছে, অস্ত্রদিকে আবার মুহুমূহু হিন্দু-মুসলমানের মধ্যে মিলনের আদর্শ প্রচার করছে। স্পষ্টই এ দুটি স্বতোবিরুদ্ধ, আর এই স্বতো-বিরুদ্ধতার স্পষ্ট কারণ—প্রথমটি ঐতিহাসিক ঘটনা, দ্বিতীয়টি নাট্যকারের সমকালীন আকাঙ্ক্ষা। ঐতিহাসিক কাল ও নাট্যকারের কাল এই দুই বিভিন্ন সময়কে মিলিত করবার পন্থা এঁরা আবিষ্কার ক'রতে পারেন নি। ফলে ঘটনা ও ভাবনা সমান্তরাল ধারায় প্রবাহিত হয়েছে। মিলিত হয়ে এক হ'তে পারে নি। নাট্যকারগণ এ ক্রটি লক্ষ্য করেছেন কি না জানিনা, খুব সম্ভব করেন নি, কারণ দর্শক ও পাঠক এর বেশী প্রত্যাশা করেনি লেখকদের কাছে। নাট্যকারগণ সাময়িক প্রয়োজন মিটাতে গিয়ে ভবিষ্যৎ কালকে উপেক্ষা ক'রেছেন, এখন ভবিষ্যৎ কাল যদি তাঁদের উপেক্ষা করে, তবে তাকে দোষ দেওয়া চলে না।

১১

দ্বিজেন্দ্রলালের সমস্ত ঐতিহাসিক নাটকের মধ্যে 'নূরজাহান' নাটকখানি সবচেয়ে অবহেলিত। সমসাময়িক প্রয়োজনের তাগিদ একে সৃষ্টি ক'রে তোলেনি ব'লেই নাট্যকার একে স্বাধীনভাবে সৃষ্টি করার সুযোগ পেয়েছেন। মাত্র এই একখানি নাটক অনেকখানি পরিমাণে জীবনের নিয়মাবধী। নূরজাহান চরিত্র অল্প লেখক সূক্ষ্ম, জটিল ও গভীর মনস্তত্ত্ব সৃষ্টি ক'রতে সমর্থ হয়েছেন। 'নূরজাহানে' ভালমন্দের মিশল ঘটেছে, অন্তর্দ্বন্দ্বের উত্তাল তরঙ্গমালায় উত্থান-পতন হয়েছে; এবং সবস্বন্ধ মিলে যে নারীচরিত্রটি সৃষ্ট হয়ে উঠেছে তাকে দেবী বা পিশাচী বলে ভুল হয় না, পাঠকের প্রাত্যহিক অভিজ্ঞতার বিষয়ীভূত অথচ তদতিরিক্ত রক্তমাংসের জীব ব'লে মনে হয়। 'নূরজাহান' দ্বিজেন্দ্রলালের শ্রেষ্ঠ নাটক, 'নূরজাহান' নাটক দ্বিজেন্দ্রলালের শ্রেষ্ঠ কীর্তি, বাংলা সাহিত্যে নারী চিত্রশালাতেও প্রথম সারিতে তার স্থান।

১২

দ্বিজেন্দ্রলালের নাট্যশিল্পের প্রধান দোষ এর ছায়াতপের, পুরোভূমি ও পটভূমির অভাব। এ রাজ্যে সকলেই সমান, যে অসৎ সে অতিশয় অসৎ, যে সৎ সে অতিশয় সৎ, যে আদর্শবাদী সে একেবারে আদর্শবাদীর চূড়ান্ত। আর তারস্বরে চৈচিয়ে কথা বলা সকলেরই মুদ্রাদোষ। তাঁর নাট্যজগৎ প্রথর স্বর্ধালোকে উদ্ভাসিত, কোথাও

এতটুকু ছায়া নেই। এমনকি সেই জগতে সঞ্চরণশীল পাত্রপাত্রীর ছায়াটুকুও মাটিতে পড়ে না। সেইজন্মেই তাদের আমাদের মতো ছায়াতপের অধীন মাছুষ বলে বিশ্বাস ক'রতে মন চায় না। দ্বিজেন্দ্রলাল "স্পষ্ট কাব্য"র পক্ষপাতী ছিলেন। তাঁর নাটকগুলি অত্যন্ত স্পষ্ট তাতে সন্দেহ নাই। রবীন্দ্রনাথের "অস্পষ্ট কাব্য"র কঠোর সমালোচক রবীন্দ্রনাথের রক্তকরবী, রাজা ও ডাকঘর প্রভৃতি স্পষ্ট নাটক পড়লে না জানি কী মন্তব্য করতেন! এমন হবার প্রধান কারণ স্বদেশী আন্দোলনে বাগ্মিতার উপাদানে এই নাটকগুলি গঠিত। পাত্রপাত্রীদের সকলেরই কণ্ঠে হুরেহুরে নাথ ও বিপিনচন্দ্রের নিখাদে ধ্বনিত কণ্ঠধ্বর। দ্বিজেন্দ্রলালের স্বদেশী সঙ্গীতের মতো তাঁর স্বদেশী নাটকগুলিও বক্তৃতাত্মক। সংলাপ-রচনায় গিরিশচন্দ্রের যে অসামান্য দক্ষতা ছিল, দ্বিজেন্দ্রলালের তার একান্ত অভাব। পরবর্তীকাল যদি স্বদেশী আমলে বক্তৃতার নমুনা সংগ্রহ ক'রতে চায় তবে দ্বিজেন্দ্রলালের নাটকে ধনুষ্ঠ-কারগ্রস্ত ভাবা থেকেই তা সংগ্রহ করা যেতে পারে। এ আর কিছুই নয় পাঠক ও শ্রোতার রুচির কাছে আত্মসমর্পণের ফল। দ্বিজেন্দ্রলালের নাটকের দ্বিতীয় দোষ, নিতান্ত ব্যতিক্রম বাদ দিলে, তাঁর পাত্রপাত্রী হয় নাট্যকারের বা তৎকালীন দর্শকের প্রতিনিধি, কেউ-ই স্বাধীন, স্বতন্ত্র মাছুষ নয়, জীবের বদলে যন্ত্রের অবতারণা ক'রলে সাময়িক সুবিধা মেলা অসম্ভব নয়, কিন্তু কালের নিয়মে যন্ত্রে মরচে পড়তে আরম্ভ করেছে! এখন ওগুলোকে ক্ষীয়মান যন্ত্র ছাড়া আর কিছুই মনে হয় না। তৎসঙ্গেও স্বীকার ক'রতে হবে যে, গিরিশচন্দ্র যেমন পৌরাণিক ও সামাজিক নাটক রচনার একটি আদর্শ সৃষ্টি করে গিয়েছেন, দ্বিজেন্দ্রলাল তেমনি সৃষ্টি ক'রে গিয়েছেন ঐতিহাসিক নাটক রচনার একটি আদর্শ। এ আদর্শ স্থূল ও রুঢ়, অজটিল ও অগভীর জীবনের নিয়ম বা ইতিহাসের মর্খাদা এতে উপেক্ষিত, তৎসঙ্গেও আশুফলপ্রসূ। স্বদেশী আন্দোলনের উন্মাদনার দিনে এমন একটি নাট্যাধারার প্রয়োজন হ'য়েছিল। দ্বিজেন্দ্রলাল সেই প্রয়োজন পূরণ ক'রতে সমর্থ হয়েছিলেন। শেষ পর্যন্ত তাঁর কোন ঐতিহাসিক নাটক সজীব সত্তায় বিরাজ ক'রবে জানি না, কিন্তু একথা নিঃসন্দেহ, বাংলা নাটকের ইতিহাসে তাঁর আসন কখনো স্থানচ্যুত হবে না।

—শ্রী প্রমথনাথ বিশী

সাজাহান

কুশীলবগণ

পুরুষ

সাজাহান	...	ভারতবর্ষের সম্রাট
দারা		
সুজা	}	...
ঔরঞ্জীব		
মোরাদ		
সোলেমান	}	...
সিপার		
মহম্মদ সুলতান	...	দারার পুত্রদ্বয়
জয়সিংহ	...	ঔরঞ্জীবের পুত্র
যশোবন্ত সিংহ	...	জয়পুরপতি
দ্বিলদার	...	ধোখপুরপতি
	...	ছদ্মবেশী জ্ঞানী (দানেশমন্দ)

স্ত্রী

সাজাহানারা	...	সাজাহানের কন্যা
নাদিরা	...	দারার স্ত্রী
পিয়ারা	...	সুজার স্ত্রী
জহরং উম্মিসা	...	দারার কন্যা
মহামায়া	...	যশোবন্ত সিংহের স্ত্রী

প্রথম অঙ্ক

প্রথম দৃশ্য

স্থান—আগ্রার দুর্গপ্রাসাদ ; সাজাহানের কক্ষ । কাল—অপরাহ্ন

সাজাহান শয্যার উপর অর্কুশায়িত অবস্থায় কর্ণমূল করতলে শ্রুত করিয়া

অধোমুখে ভাবিতেছিলেন ও মধ্যে মধ্যে একটি আলবোলা

টানিতেছিলেন । সম্মুখে দারা দণ্ডায়মান

সাজাহান্ । তাই তো । এ বড়—দুঃসংবাদ দারা !

দারা । সূজা বঙ্গদেশে বিদ্রোহ করেছে বটে কিন্তু সে এখনও সম্রাট নাম নেয় নি ; কিন্তু মোরাদ, গুর্জরে সম্রাট নাম নিয়ে বসেছে, আর দাক্ষিণাত্য থেকে ঔরঞ্জীব তার সঙ্গে যোগ দিয়েছে ।

সাজাহান । ঔরঞ্জীব তার সঙ্গে যোগ দিয়েছে—দেখি, ভেবে দেখি—এ রকম কখনও ভাবিনি, অভ্যস্ত নই ; তাই ঠিক ধারণা কর্তে পাচ্ছি না—তাই ত ! (ধূমপান)

দারা । আমি কিছু বুঝতে পাচ্ছি না ।

সাজাহান । আমিও পাচ্ছি না । (ধূমপান)

দারা । আমি এলাহাবাদে আমার পুত্র সোলেমানকে সূজার বিরুদ্ধে যাত্রা করবার জন্য লিখছি, আর তার সঙ্গে বিকানীরের মহারাজ জয়সিংহ আর সৈন্য-ধ্যক্ষ দিল্লীর থাকে পাঠাচ্ছি ।

সাজাহান আনতচক্ষে ধূমপান করিতে লাগিলেন

দারা । আর মোরাদের বিরুদ্ধে আমি মহারাজ যশোবন্ত সিংহকে পাঠাচ্ছি ।

সাজাহান । পাঠাচ্ছ ! তাই ত ! (ধূমপান)

দারা । পিতা, আপনি চিন্তিত হবেন না । এ বিদ্রোহ দমন কর্তে আমি জানি ।

সাজাহান । না, আমি তার জন্য ভাবছি না দারা ; তবে এই—ভাইয়ে ভাইয়ে যুদ্ধ—তাই ভাবছি । (ধূমপান ; পরে সহসা) না—দারা, কাজ নেই । আমি তাদের বুঝিয়ে বলবো । কাজ নেই । তাদের নির্বিরোধে রাজধানীতে আসতে দাও ।

বেগে জাহানারার প্রবেশ

জাহানারা । কখন না । এ হাতে পারে না পিতা । প্রজা রাজার উপর খড়গ তুলেছে, সে খড়গ তার নিজের স্বন্ধে পড়ুক ।

সাজাহান । সে কি জাহানারা ! তা'রা আমার পুত্র ।

জাহানারা । হোক পুত্র । কি যায় আসে । পুত্র কি কেবল পিতার স্নেহের অধিকারী ? পুত্রকে পিতার শাসনও কর্তে হবে ।

সাজাহান । আমার হৃদয় এক শাসন জানে । সে শুধু স্নেহের শাসন !

ভয়ানক।

জাহানারা। দারা, এ কি! তুমি ভাবছো! এত তরল তুমি! এত স্নেহ! পিতার সম্মতি পেয়ে এখন স্ত্রীর সম্মতি নিতে হবে না কি! মনে রেখো দারা, কঠোর কর্তব্য সম্মুখে! আর ভাব্বার সময় নাই।

দারা। সত্য নাদিরা! এ যুদ্ধ অনিবার্য, আমি বাই। যথাযথ আজ্ঞা দেই গে বাই।

প্রস্থান

নাদিরা। এত নিষ্ঠুর তুমি দিদি—এসো সিপার—

সিপারের সহিত নাদিরার প্রস্থান

জাহানারা। এত ভয়াকুল! কি কারণ বুঝি না।

সাজাহানের পুনঃ প্রবেশ

সাজাহান। দারা গিয়েছে জাহানারা?

জাহানারা। হাঁ বাবা!

সাজাহান। (ক্ষণিক নিস্তব্ধ থাকিয়া) জাহানারা—

জাহানারা। হাঁ বাবা!

সাজাহান। তুইও এর মধ্যে?

জাহানারা। কিসের মধ্যে?

সাজাহান। এই ভ্রাতৃদ্বন্দ্বের?

জাহানারা। না বাবা—

সাজাহান। শোন জাহানারা। এ বড় নির্ধম কাজ! কি কর্ক—আজ তার প্রয়োজন হয়েছে! উপায় নাই; কিন্তু তুইও এর মধ্যে যাস্ নে। তো'র কাজ—স্নেহ—ভক্তি—অনুকম্পা। এ আবর্জনায তুইও নামিস্ নে। তুইও অন্তত: পবিত্র থাক।

দ্বিতীয় দৃশ্য

স্থান—নর্থদাতীরে মোরাদের শিবির। কাল—রাত্রি

দিলদার একাকী

দিলদার। আমি মুখে মোরাদের বিদূষক। আমি হাশ্র পরিহাস কর্তে বাই, সে ব্যক্তের ধুম হ'য়ে ওঠে। মুর্থ তা বুঝতে পারে না। আমার উক্তি অসংলগ্ন মনে করে' হােসে।—মোরাদ একদিকে যুদ্ধোন্মাদ, আর একদিকে সন্তোষ-মজ্জিত। মনোরাজ্য ওর কাছে একটা অনাবিষ্কৃত দেশ—এই যে বর্কীর এখানে আসছে।

মোরাদের প্রবেশ

মোরাদ। দিলদার! আমাদের যুদ্ধে জয় হয়েছে। আনন্দ কর, স্তুতি কর।

অচিরে পিতাকে সিংহাসন থেকে নামিয়ে আমি সেখানে বসছি!—কি ভাব্‌ছো দিলদার? ষাড় নাড়্‌ছো যে!

দিলদার। জাঁহাপনা, আমি আজ একটা তথ্য আবিষ্কার করেছি।

মোরাদ। কি? শুনি।

দিলদার। আমি শুনেছি যে, হিংস্র জন্তুদের মধ্যে একটা দস্তুর আছে যে, পিতা সন্তান খায়। আছে কি না?

মোরাদ। হাঁ আছে। তাই কি?

দিলদার। কিন্তু সন্তান পিতা খায়, এ প্রথাটা তাদের মধ্যে নেই বোধ হয়।

মোরাদ। না।

দিলদার। হুঁ। সে প্রথাটা ঈশ্বর কেবল মানুষের মধ্যেই দিয়েছেন। হু'রকমই চাই ত। খুব বুদ্ধি!

মোরাদ। খুব বুদ্ধি। হাঃ হাঃ হাঃ। বড় মজার কথা বলেছো দিলদার।

দিলদার। কিন্তু মানুষের যে বুদ্ধি, তার কাছে ঈশ্বরের বুদ্ধি কিছুই নয়। মানুষ ঈশ্বরের উপর চাল চলেছে।

মোরাদ। কি রকম?

দিলদার। এই দেখুন জাঁহাপনা, দয়াময় মানুষকে দাঁত দিয়েছিলেন কি জন্তু? চর্বিগ কর্‌বার জন্তু নিশ্চয়, বাহির কর্‌বার জন্তু নয়; কিন্তু মানুষ সে দাঁত দিয়ে চর্বিগ ত করেই, তার উপর সেই দাঁত দিয়েই হাসে। ঈশ্বরের উপর চাল চলেছে বলতে হবে।

মোরাদ। তা বলতে হবে বৈ কি—

দিলদার। শুধু হাসে না, হাসবার জন্তু অনেকে যেন বিশেষ চিন্তিত বলে' বোধ হয়, এমন কি—তার জন্তু পয়সা খরচ করে।

মোরাদ। হাঃ হাঃ হাঃ।

দিলদার। ঈশ্বর মানুষের জিভ দিয়েছিলেন—বেশ দেখা যাচ্ছে চাখ্‌বার জন্তু; কিন্তু মানুষ তার দ্বারা ভাষার সৃষ্টি করে ফেলে। ঈশ্বর নাক দিয়েছিলেন কেন? নিশ্বাস ফেল্‌বার জন্তু ত?

মোরাদ। হাঁ, আর শুঁকবার জন্তুও বোধ হয়।

দিলদার। কিন্তু মানুষ তার উপর—বাহাদুরী করেছে। সে আবার সেই নাকের উপর চশমা পরে। দয়াময়ের নিশ্চয়ই সে উদ্দেশ্য ছিল না।—আবার অনেকের নাক ঘুমের ঘোরে বেশ একটু ডাকেও।

মোরাদ। তা ডাকে। আমাদের কিন্তু ডাকে না।

দিলদার। আস্তে, জাঁহাপনার শুধু যে ডাকে তা নয়, সে দিনে দুপুরে ডাকে।

মোরাদ। আচ্ছা, এবার যখন ডাকবে তখন দেখিয়ে দিও।

দিলদার। ঐ একটা জিনিষ জাঁহাপনা, বা নিরাকার ঈশ্বরের মত—ঠিক

দেখানো যায় না। কারণ, দেখিয়ে দেবার অবস্থা এখন হয়, তখন সে আর ডাকে না।

মোরাদ। আচ্ছা দিলদার, ঈশ্বর মানুষকে যে কান দিয়েছেন, তার উপর মানুষ কি বাহাদুরী করতে পেরেছে ?

দিলদার। ও বাবা! তাই দিয়ে একটা দার্শনিক তথ্যই আবিষ্কার করে' ফেলে যে, কান টান্লে মাথা আসে—অবশ্য তার পেছনে যদি একটা মাথা থাকে ; অনেকের তা নেই কি না!

মোরাদ। নেই নাকি! হাঃ হাঃ—ঐ দাদা আসছেন। তুমি এখন যাও।

দিলদার। যে আজ্ঞে।

দিলদারের প্রস্থান। অপর দিক দিয়া ঔরংজীবের প্রবেশ

মোরাদ। এসো দাদা, তোমায় আলিঙ্গন করি। তোমার বুদ্ধিবলেই আমাদের এই যুদ্ধ জয় হয়েছে। (আলিঙ্গন)

ঔরংজীব। আমার বুদ্ধিবলে না তোমার শৌর্ধ্যবলে? কি অভূত শৌর্ধ্য তোমার! মৃত্যুকে একেবারে ভয় কর না।

মোরাদ। আসফ খাঁ একটা কথা বলতেন মনে আছে যে, যা'রা মৃত্যুকে ভয় করে, তা'রা জীবন ধারণ করবার যোগ্য নয়। সে যা হোক তুমি যশোবন্ত সিংহের ৪০,০০০ মোগল সৈন্য কি মন্ত্রবলে বশ করলে! তা'রা শেষে যশোবন্ত সিংহেরই রাজপুত সৈন্যের বিপক্ষে বন্দুক লক্ষ্য করে' ফিরে দাঁড়াল! যেন একটা ভৌতিক ব্যাপার!

ঔরংজীব। যুদ্ধের পূর্বদিন আমি জনকতক সৈন্যকে মোল্লা সাজিয়ে এপারে পাঠিয়েছিলাম। তারা মোগলদের বুঝিয়ে গেল যে কাফেরের অধীনে, কাফেরের সঙ্গে দারার পক্ষে যুদ্ধ করা বড় হেয় কাজ; আর সেটা কোরাণে নিষিদ্ধ। তা'রা তাই ঠিক বিশ্বাস করেছে।

মোরাদ। আশ্চর্য্য তোমার কৌশল!

ঔরংজীব। কাৰ্য্যসিদ্ধির জন্ত শুদ্ধ একটা উপায়ের উপর নির্ভর করা উচিত নয়। যত রকম উপায় আছে ভাবতে হবে।

মহম্মদের প্রবেশ

ঔরংজীব। কি সংবাদ মহম্মদ?

মহম্মদ। পিতা! মহারাজ যশোবন্ত সিংহ তাঁর শকটে চড়ে' সসৈন্যে আমাদের সৈন্যশিবির প্রদক্ষিণ করছেন। আমরা আক্রমণ করব?

ঔরংজীব। না।

মহম্মদ। এর উদ্দেশ্য কি?

ঔরংজীব। রাজপুত দর্প। এই দর্প-ই মহারাজের পরাজয়। আমি সসৈন্যে নর্দানাভীরে উপস্থিত হওয়া মাত্রই যদি তিনি আমাদের আক্রমণ করেন ত আমার

পরাজয় অনিবার্য ছিল। কারণ তুমি তখন এসে উপস্থিত হও নি, আর আমার সৈন্যরাও পথশ্রান্ত ছিল; কিন্তু শুনলাম এরূপ আক্রমণ করা বীরোচিত নয় বলে' মহারাজ তোমার আগমনের অপেক্ষা করছিলেন। অতি দর্পে পতন হবেই।

মহম্মদ। আমরা তবে তাঁকে আক্রমণ করব না ?

ঔরংজীব। না মহম্মদ! আমার সৈন্যশিবির প্রদক্ষিণ করে' যদি মহারাজের কিছু সাহুনা হয় ত একবার কেন, তিনি দশবার প্রদক্ষিণ করুন না। যাও।

মহম্মদের প্রস্থান

ঔরংজীব। পুত্র যুদ্ধ পেলে হয়।—সরল, উদার, নির্ভীক পুত্র। আমি তবে এখন যাই, তুমি বিশ্রাম কর।

মোরাদ। আচ্ছা; দৌবারিক! সিরাজি আর বাইজি!

প্রস্থান

তৃতীয় দৃশ্য

স্থান—কাশীতে সূজার সৈন্য শিবির। কাল—রাত্রি

সূজা ও পিয়ারা

সূজা। শুনেছো পিয়ারা, দারার পুত্র—বালক সোলেমান এই যুদ্ধে আমার বিপক্ষে এসেছে।

পিয়ারা। তোমার বড় ভাই দারার পুত্র দিল্লী থেকে এসেছেন? সত্য নাকি! তা হ'লে নিশ্চয়ই দিল্লীর লাড্ডু এনেছেন। তুমি শীঘ্র সেখানে লোক পাঠাও। হাঁ করে' চেয়ে রয়েছো কি! লোক পাঠাও।

সূজা। লাড্ডু কি! যুদ্ধ—তা'র সঙ্গে—

পিয়ারা। তা'র সঙ্গে যদি বেলের মোরকা থাকে ত আরও ভালো। তাতেও আমার অরুচি নাই; কিন্তু দিল্লীর লাড্ডু শুস্তে পাই, বো খায়া উয়োবি পান্তায়া—আর যো নেই খায়া উয়োবি পান্তায়া। ছ'রকমেই যখন পস্তাতে হচ্ছে, তখন না খেয়ে পস্তানোর চেয়ে খেয়ে পস্তানোই ভালো—লোক পাঠাও।

সূজা। তুমি এক নিশ্বাসে এতখানি বলে' গেলে যে, আমি বাকিটুকু বলবার ফুস' পেলাম না।

পিয়ারা। তুমি আবার বলবে কি! তুমি তো কেবল যুদ্ধ করবে।

সূজা। আর যা কিছু বলতে হবে, তা বলবে বুঝি তুমি ?

পিয়ারা। তা বৈ কি। আমরা যেমন গুছিয়ে বলতে পারি, তোমরা তা পারো? তোমরা কিন্তু বলতে গেলেই এমন বিষয়গুলো জড়িয়ে ফেল, আর এমন ব্যাকরণ ভুল কর যে—

সূজা। যে কি ?

পিয়ারা। আর অভিধানের অর্থেই তোমরা জানো না। কথা বলেছ,

কি ভুল করে' বসে' আছ। বোবা শব্দ অল্প ব্যাকরণ মিশিয়ে, এমন এক খোঁড়া ভাষা প্রয়োগ কর, যে তার অন্তত কুঁজো হয়ে চলতে হবেই।

সুজা। তোমার নিজের প্রয়োগগুলি খুব সাধু বলে' বোধ হচ্ছে না!

পিয়ারা। ঐ ত! আমাদের ভাষা বুঝবার ক্ষমতাটুকুও তোমাদের নাই? হা ঈশ্বর! এমন একটা বুদ্ধিমান স্ত্রীজাতিকে এমন নির্যাতন পুরুষজাতির হাতে স্পে দিয়েছো, যে তার চেয়ে তাদের যদি গরম তেলের কড়ায় চড়িয়ে দিতে, তা হ'লে বোধ হয় তা'রা স্বখে থাকতো!

সুজা। যাক—তুমি বলে' যাও।

পিয়ারা। সিংহের বল দাঁতে, হাতীর বল শুঁড়ে, মহিষের বল শিঙে, ঘোড়ার বল পিছনকার পায়ে, বাঙ্গালীর বল পিঠে আর নারীর বল জিভে।

সুজা। না, নারীর বল অপাঙ্গে।

পিয়ারা। উঃ—অপাঙ্গ প্রথম প্রথম কিছু কাজ করে' থাকতে পারে বটে, কিন্তু পরে সমস্ত জীবনটা স্বামীকে শাসিয়ে রাখে ঐ জিভে।

সুজা। না, তুমি আমাকে কথা কইবার অবকাশ দেবে না দেখতে পাচ্ছি। শোন কি বলতে যাচ্ছিলাম—

পিয়ারা। ঐ ত তোমাদের দোষ। এতখানি ভূমিকা কর, যে সেই অবকাশে তোমাদের বক্তব্যটা ভুলে ব'সে থাকে।

সুজা। তুমি আর খানিক যদি ঐ রকম বকে' যাও ত আমার বক্তব্যটা আমি সত্যই ভুলে যাবো।

পিয়ারা। তবে চট করে' বল! আর দেবী কোরো না।

সুজা। তবে শোন—

পিয়ারা। বল; কিন্তু সংক্ষেপে! মনে থাকে যেন—এক নিখাসে।

সুজা। এখন আমার বিরুদ্ধে এসেছে দারার পুত্র সোলেমান। আর তা'র সঙ্গে বিকানীরের মহারাজ জয়সিংহ আর সৈন্যাদ্যক্ষ দিলীর খাঁ।

পিয়ারা। বেশ, একদিন নিমন্ত্রণ করে' থাইয়ে দাও!

সুজা। না! তুমি ছেলেমানুষই করবে! এমন একটা গাঢ় ব্যাপার যুদ্ধ, তা তোমার কাছে—

পিয়ারা। তার জগ্নই ত তাকে একটু—হ্যাঁ—তরল করে নিচ্ছি। নৈলে হজম হবে কেন! বলে' যাও।

সুজা। এখনই মহারাজ জয়সিংহ আমার কাছে এসেছিলেন। তিনি বলেন যে সত্ৰাট সাজাহান মরেন নি। এমন কি তিনি সত্ৰাটের দস্তখতি পত্র আমায় দিলেন। সে পত্রে কি আছে জানো?

পিয়ারা। শীঘ্র বলে' ফেল আর আমার ধৈর্য থাকছে না।

সুজা। সে পত্রে তিনি লিখেছেন যে আমি যদি এখনও বঙ্গদেশে ফিরে যাই, তা হ'লে তিনি আমায় এই স্ববা থেকে চ্যুত করবেন না। নৈলে—

পিয়ারা। নৈলে চ্যাত কর্বেন! এই ত। বাক! তার পরে আর কিছু ত
বলবার নেই? আমি এখন গান গাই?

সুজা। আমি কি লিখে দিলাম জানো? আমি লিখে দিলাম—বেশ, আমি
বিনা যুদ্ধে বঙ্গদেশে ফিরে যাচ্ছি। পিতার প্রভুত্ব আমি মাথা পেতে নিতে সম্মত
আছি; কিন্তু দারার প্রভুত্ব আমি কোন মতেই মানবো না।

পিয়ারা। তুমি আমার গা হাতে দেবে না। নিজেই বকে' যাচ্ছ, আমি
গাইব না।

সুজা। না, গাও! আমি চূপ কবলাম!

পিয়ারা। দেখ, প্রতিজ্ঞা মনে রেখো। কি গাইব?

সুজা। যা ইচ্ছা।—না। একটা প্রেমের গান গাও—এমন একটা গান গাও,
যার ভাষায় প্রেম, ভাবে প্রেম, ভঙ্গিমায় প্রেম, মুর্ছনায় প্রেম, সমে প্রেম।—
গাও আমি শুনি।

পিয়ারা গীত আরম্ভ করিলেন

সুজা। দূরে একটা শব্দ শুনছো না পিয়ারা—যেন বারিদবর্ষণের শব্দ।—
ঐ যে।

পিয়ারা। না, তুমি গাইতে দেবে না। আমি চঞ্জাম।

সুজা। না, ও কিছু নয়, গাও।

পিয়ারার গীত

এ জীবনে পুরিল না সাধ ভালোবাসি'।

ক্ষুদ্র এ হৃদয় হয় ধরে না ধরে না তায়—

আকুল অসীম প্রেমরাশি।

তোমার হৃদয়খানি আমার হৃদয়ে আনি'

রাখি না কেনই যত কাছে,

যুগল হৃদয় মাঝে কি যেন বিরহ বাজে,

কি যেন অভাবই রহিয়াছে।

এ ক্ষুদ্র জীবন মোর এ ক্ষুদ্র ভুবন মোর,

হেথা কি দিব এ ভালোবাসা।

যত ভালোবাসি তাই আরও বাসিতে চাই—

দিয়ে প্রেম মির্টেনাক আশা।

হটুক অসীম স্থান হটুক অমর প্রাণ

ঘুচে বাক সব অবরোধ;

তখন মিটাব আশা দিব ঢালি' ভালোবাসা

জন্ম ঋণ করি পরিশোধ।

সুজা। এ জীবন একটা সুস্থিতি। মাঝে মাঝে স্বপ্নের মত স্বর্গ থেকে একটা

ভক্তিমা, একটা সঙ্কেত নেমে আসে, বাতে বৃষ্টিয়ে দেয়, এ স্থপতির আগরণ কি মধুর—সদীত সেই স্বর্গের একটা বন্ধার। নৈলে এত মধুর হয়!

নেপথ্যে কামানের শব্দ

সুজা। (চমকিয়া উঠিয়া) ও কি!

পিয়ারা। তাই ত! প্রিয়তম! এত রাজ্যে কামানের শব্দ—এত কাছে! শক্র ত ওপারে!

সুজা। এ কি! ঐ আবার! আমি দেখে আসি। প্রস্থান

পিয়ারা। তাই ত! বারবার ঐ কামানের ধ্বনি। ঐ পৈণ্ডলের নিনাদ, অস্ত্রের বনংকার—রাজির এই গভীর শাস্তি হঠাৎ যেন শেনবিদ্ধ হ'য়ে একটা মহা কোলাহলে আর্জুনাদ করে' উঠলো।—এ সব কি!

বেগে সুজার প্রবেশ

সুজা। পিয়ারা! সম্রাট সৈন্য শিবির আক্রমণ করেছে।

পিয়ারা। আক্রমণ করেছে! সে কি!

সুজা। হাঁ! বিশ্বাসঘাতক এই মহারাজ!—আমি যুদ্ধে যাচ্ছি। তুমি শিবিরে যাও। কোন ভয় নাই পিয়ারা—

প্রস্থান

পিয়ারা। কোলাহল ক্রমে বাড়তে চল। উঃ, এ কি—

প্রস্থান

নেপথ্যে কোলাহল

সোলেমান ও দিলীর খাঁর বিপরীত দিক হইতে প্রবেশ

সোলেমান। সুবাদার কৈ!

দিলীর। তিনি নদীর দিকে পালিয়েছেন!

সোলেমান। পালিয়েছেন? তাঁর পশ্চাদ্ভাবন কর দিলীর খাঁ।

দিলীর খাঁর প্রস্থান ও জয়সিংহের প্রবেশ

সোলেমান। মহারাজ! আমরা জয়লাভ করেছি।

জয়সিংহ। আপনি রাজ্যেই নদী পার হ'য়ে শক্রশিবির আক্রমণ করেছেন?

সোলেমান। কর্ব যে, তা'রা কিন্তু তা ভাবেনি—তবু এত শীঘ্র জয়লাভ কর্ব কখন মনে করিনি।

জয়সিংহ। স্থলতান সুজার সৈন্য একেবারে মোটেই প্রস্তুত ছিল না। যখন অর্ধেক সৈন্য নিহত হয়েছে, তখনও তা'দের সম্পূর্ণ ঘুম ভাঙে নি।

সোলেমান। তার কারণ, কাকা প্রকৃত যোদ্ধা। তিনি নৈশ আক্রমণের সম্ভাবনা জ্ঞানেন না?

জয়সিংহ। আমি সম্রাটের পক্ষ হতে তাঁর সঙ্গে সন্ধি করেছিলাম। তিনি বিনাযুদ্ধে বন্ধদেশে ফিরে যেতে সম্মত হয়েছিলেন, এমন কি যাবার জন্ত নৌকা প্রস্তুত কর্তে আজ্ঞা দিয়েছিলেন।

দিল্লীর খাঁর প্রবেশ

দিল্লীর। সাহাজাহাদা! সুলতান সুলজা সপরিবারে নৌকাযোগে পালিয়েছেন।

জয়সিংহ। ঐ—তবে সেই সজ্জিত নৌকায়।

সোলেমান। পশ্চাৎদাবন কর—যাও সৈন্যদের আজ্ঞা দাও।

দিল্লীর খাঁর প্রস্থান

সোলেমান। আপনি কার আজ্ঞায় এ সন্ধি করেছিলেন মহারাজ ?

জয়সিংহ। সত্ৰাটের আজ্ঞায়।

সোলেমান। পিতা ত আমাকে এ কথা কিছু লেখেন নি ? তা আপনিও আমার বলেন নি !

জয়সিংহ। সত্ৰাটের নিবেদন ছিল।

সোলেমান। তার উপরে মিথ্যা কথা !—যান !

জয়সিংহের প্রস্থান

সোলেমান। সত্ৰাটের এক আজ্ঞা আর আমার পিতার অন্তরূপ আজ্ঞা ! এ কি সম্ভব ?—যদি তাই হয় ! মহারাজকে হয় ত অগ্রায় ভৎসনা করেছি। যদি সত্ৰাটের একপই আজ্ঞা হয় !—এ দিকে পিতা লিখেছেন যে “সুলজাকে সপরিবারে বন্দী করে’ নিয়ে আসবে পুত্র।” না, আমি পিতার আজ্ঞা পালন করব ! তাঁর আজ্ঞা আমার কাছে ঈশ্বরের আজ্ঞা।

চতুর্থ দৃশ্য

স্থান—ঘোষণাপুরের দুর্গ। কাল—প্রভাত

মহামায়া ও চারগীগণ

মহামায়া। গাও আবার চারগীগণ !

সেথা গিয়াছেন তিনি সমরে, আনিতে জয়গৌরব জিনি

সেথা গিয়াছেন তিনি মহা আহ্বানে—

মানের চরণে প্রাণ বলিদানে,

মথিতে অমর মরণসিদ্ধু আজি গিয়াছেন তিনি।

সধবা অথবা বিধবা ভোমার রহিবে উচ্চ শির ;

উঠ বীরজায়া, বাঁধো কুস্তল, মুছ এ অশ্রুনার।

সেথা গিয়াছেন তিনি করিতে রক্ষা শত্রুর নিমন্ত্রণে।

সেথা বর্ষে বর্ষে কোলাকুলি হয়,

থড়ো থড়ো ভীম পরিচয়,

ক্রকুটির সহ গর্জন মিশে রক্ত রক্ত সনে।

সধবা অথবা—ইত্যাদি।

সেথা নাহি অহুন্নয় নাহি পলায়ন—সে ভীম সময় মাঝে ;

সেথা কধিরসিক্ত অসিত অঙ্গে,
 মৃত্যু নৃত্য করিছে রঙ্গে
 গভীর আর্ন্তনাদের সঙ্গে বিজয় বাস্ত বাঞ্চে ।
 সধবা অথবা—ইত্যাদি
 সেথা গিয়াছেন তিনি সে মহা আহবে জুড়াইতে সব জালা,
 হেথা হয়ত ফিরিতে জিনিয়া সমর ;
 হয়ত মরিয়া হইতে অমর ;
 সে মহিমা ক্রোড়ে ধরিয়া হাসিয়া তুমিও মরিবে বালা ।
 সধবা অথবা—ইত্যাদি ।

দুর্গপ্রহরীর প্রবেশ

প্রহরী । মহারাগী !

মহামায়া । কি সংবাদ সৈনিক !

প্রহরী । মহারাজ ফিরে এসেছেন ।

মহামায়া । এসেছেন ? যুদ্ধে জয়লাভ করে' এসেছেন ?

প্রহরী । না মহারাগী ! তিনি এ যুদ্ধে পরাজিত হ'য়ে ফিরে এসেছেন ।

মহামায়া । পরাজিত হ'য়ে ফিরে এসেছেন ? কি বলছ তুমি সৈনিক ! কে
 পরাজিত হ'য়ে ফিরে এসেছেন ?

প্রহরী । মহারাজ ।

মহামায়া । কি ! মহারাজ যশোবন্ত সিংহ পরাজিত হ'য়ে ফিরে এসেছেন ?
 এ কি শুন্ছি ঠিক ! বোধপুরের মহারাজ—আমার স্বামী—যুদ্ধে পরাজিত হয়ে
 ফিরে এসেছেন ! ক্ষত্রিয় শৌর্ধের কি এতদূর অধোগতি হয়েছে ! অসম্ভব !
 ক্ষত্রবীর যুদ্ধে পরাজিত হ'য়ে ফেরে না । মহারাজ যশোবন্ত সিংহ ক্ষত্রচূড়ামণি ।
 যুদ্ধে পরাজয় হয়েছে ; হ'তে পারে । তা হ'য়ে থাকে ত আমার স্বামী যুদ্ধক্ষেত্রে
 মরে' পড়ে আছেন । মহারাজ যশোবন্ত সিংহ যুদ্ধে পরাজিত হ'য়ে কখন ফিরে
 আসেন নি । যে এসেছে সে মহারাজ যশোবন্ত সিংহ নয় । সে তাঁর আকারধারী
 কোন ছদ্মবেশী । তাকে প্রবেশ কত্তে' দিও না । দুর্গদ্বার রুদ্ধ কর ।—গাও চারগী-
 গণ আবার গাও ।

চারগীগণের গীত

সেথা গিয়াছেন তিনি সে মহা আহবে জুড়াইতে সব জালা, ইত্যাদি ।

পঞ্চম দৃশ্য

স্থান—পরিত্যক্ত প্রাস্তর । কাল—রাত্রি

ঔরঙ্গীব একাকী

ঔরঙ্গীব । আকাশ মেঘাক্রম । ঝড় উঠবে । একটা নদী পার হয়েছে, এ

আর এক নদী—ভীষণ কল্লোলিত তরঙ্গসঙ্কুল। এত প্রশস্ত যে তার ও-পার দেখতে পাচ্ছি না। তবু পার হ'তে হবে—এই নৌকা নিয়েই।

মোরাদের প্রবেশ

ঔরংজীব। কি মোরাদ! কি সংবাদ!

মোরাদ। দাদার সঙ্গে এক লক্ষ ঘোড়সোয়ার আর এক শত কামান!

ঔরংজীব। তবে সংবাদ ঠিক!

মোরাদ। ঠিক; প্রত্যেক চরের ঐ একইরূপ অহুমান।

ঔরংজীব। (পাদচারণা করিতে করিতে) এষে—না—তাই ত!

মোরাদ। দারা ঐ পাহাড়ের পরপারে সেনানিবেশ করেছেন।

ঔরংজীব। ঐ পাহাড়?

মোরাদ। হাঁ দাদা!

ঔরংজীব। তাই ত! এক লক্ষ অখারোহী—আর—

মোরাদ। আমরা কাল প্রভাতেই—

ঔরংজীব। চূপ! কথা কোয়ো না! আমাকে ভাবতে দাও! এত সৈন্য দারা পেলেন কোথা থেকে। আর এক শত কামান।—আচ্ছা তুমি এখন যাও মোরাদ। আমায় ভাবতে দাও।

মোরাদের প্রস্থান

ঔরংজীব। তাই ত। এখন পিছোলে সর্বনাশ, আক্রমণ করলে ধ্বংস। এক শত কামান। যদি—না—তাই বা হবে কেমন করে'। হুঁ (দীর্ঘনিশ্বাস)—
ঔরংজীব। এবার তোমার উত্থান না পতন? পতন? অসম্ভব। উত্থান? কিন্তু কি উপায়ে? বুঝতে পাচ্ছি না।

মোরাদের প্রবেশ

ঔরংজীব। তুমি আবার কেন?

মোরাদ। দাদা, বিপক্ষ পক্ষ থেকে শায়েস্তা খাঁ তোমার সঙ্গে দেখা করতে এসেছেন।

ঔরংজীব। এসেছেন? উত্তম, সম্মানে নিয়ে এসো। না—আমি স্বয়ং যাচ্ছি।

প্রস্থান

মোরাদ। তাই ত। শায়েস্তা খাঁ আমাদের শিবিরে কি জন্ম। দাদা ভিতরে ভিতরে কি মতলব ঝাঁটছেন বুঝি না। শায়েস্তা খাঁ কি দারার প্রতি বিশ্বাসহস্তা হবে, দেখা যাক। (পরিক্রমণ)

ঔরংজীবের প্রবেশ

ঔরংজীব। ভাই মোরাদ! এই মুহূর্তে আগ্রায় যাবার জন্তে সসৈন্তে রওনা হতে হবে। প্রস্তুত হও।

মোরাদ । সে কি ! এই রাজ্জে !

ঔরঞ্জীব । হাঁ, এই রাজ্জে । শিবির যেমন আছে তেমনি থাকুক । দারার সৈন্য আমরা আক্রমণ করব না । ঐ পাহাড়ের অপর পার দিয়ে আগ্রায় যাবার একটি রাস্তা আছে । সেখান দিয়ে চলে যাবে । দারা সন্দেহ করবেন না । তাঁ'র আগে আমাদের আগ্রায় যেতে হবে । প্রস্তুত হও ।

মোরাদ । এই রাজ্জে !

ঔরঞ্জীব । তর্কের সময় নাই । সিংহাসন চাও ত দ্বিকল্পিত কোরো না ।
নৈলে সর্বনাশ—নিশ্চিত জেনো ।

উভয়ে নিঃশব্দ

ষষ্ঠ দৃশ্য

স্থান—এলাহাবাদে সোলেমানের শিবির । কাল—প্রাত্ন

জয়সিংহ ও দিলীর খাঁ

দিলীর । ঔরঞ্জীব শেষ যুদ্ধেও জয়ী হয়েছেন । শুনেছেন মহারাজ ?

জয়সিংহ । আমি আগেই জাস্তাম ।

দিলীর । শায়েষ্টা খাঁ বিশ্বাসঘাতকতা করে । আগ্রার কাছে তুমুল যুদ্ধ হয় । দারা তাতে পরাস্ত হয়ে দোয়াবের দিকে পালিয়েছেন । সঙ্গে মোটে একশ সর্দী আর ত্রিশ লক্ষ মুদ্রা ।

জয়সিংহ । পালাতেই হবে—আমি আগেই জাস্তাম ।

দিলীর । আপনি ত সবই জাস্তেন ।—দারা পালাবার সময় তাড়াতাড়িতে বেশী অর্থ নিয়ে যেতে পারেন নি ; কিন্তু তার পরেই শুনছি—বৃদ্ধ সম্রাট সাতায়টা অশ্ব বোঝাই করে স্বর্ণমুদ্রা দারার উদ্দেশে পাঠান । পথে জাঠরা তাও ডাকাতি করে' নিয়েছে ।

জয়সিংহ । আহা বেচারী ! কিন্তু আমি আগেই জাস্তাম ।

দিলীর । ঔরঞ্জীব ও মোরাদ বিজয়গর্বে আগ্রায় প্রবেশ করেছেন । এখন কলতঃ ঔরঞ্জীব সম্রাট ।

জয়সিংহ । এ সব আগেই জাস্তাম ।

দিলীর । ঔরঞ্জীব আমাদের পক্ষে লিখেছেন যে, আমি যদি সঠিক সোলেমানকে পরিত্যাগ করে' যাই, তা হ'লে তিনি আমায় পুরস্কার দেবেন । আপনাকেও বোধ হয় তাই লিখেছেন মহারাজ ?

জয়সিংহ । হাঁ ।

দিলীর । যুদ্ধের ভবিষ্যৎ ফল সম্বন্ধে আপনার কি ধারণা মহারাজ ?

জয়সিংহ । আমি কাল এক জ্যোতিষীকে দিয়ে এই যুদ্ধের ফলাফল নির্ণয়

করেছিলাম। তিনি বলেন, ভাগ্যের আকাশে এখন ঔরঞ্জীবের তারা উঠছে, আর দারার তারা নেমে যাচ্ছে !

দিলীর। তবে আমাদের এখন কর্তব্য কি মহারাজ ?

জয়সিংহ। আমি যা করি তাই দেখে যাও।

দিলীর। বেশ—এসব বিষয়ে আমার বুদ্ধিটা ঠিক খেলে না ; কিন্তু একটা কথা—

জয়সিংহ। চূপ্ ! সোলেমান আসছেন।

সোলেমানের প্রবেশ

জয়সিংহ ও দিলীর। বন্দেগি সাহাজাদা !

সোলেমান। মহারাজ ! পিতা পরাজিত, পলায়িত !—এই সম্রাট সাজাহানের পত্র। (পত্র দিলেন)

জয়সিংহ। (পত্রপাঠ পূর্বক) তাই ত কুমার !

সোলেমান। সম্রাট আমাকে পিতার সাহায্যে সৈন্যে অবিলম্বে যাত্রা কর্তে লিখেছেন। আমি এক্ষণেই যাবো। তাঁবু ভাঙ্গুন আর সৈন্যদের আদেশ দিউন যে—

জয়সিংহ। আমার বিবেচনায় কুমার আরও ঠিক খবরের জ্ঞান অপেক্ষা করা উচিত। কি বল খাঁ সাহেব ?

দিলীর। আমারও সেই মত।

সোলেমান। এর চেয়ে ঠিক খবর আর কি হ'তে পারে ? স্বয়ং সম্রাটের হস্তাক্ষর।

জয়সিংহ। আমার বোধ হয় ও জাল। বিশেষ সম্রাট অথর্ব ! তাঁ'র আজ্ঞা আজ্ঞাই নয়। আপনার পিতার আজ্ঞা ব্যতীত এখান থেকে এক পাও নড়তে পারি না। কি বল দিলীর খাঁ ?

দিলীর। সে ঠিক কথা।

সোলেমান। কিন্তু পিতা ত পলায়িত। আজ্ঞা দেবেন কেমন করে ?

জয়সিংহ। তবে আমাদের এখন তাঁর পদস্থ ঔরঞ্জীবের আজ্ঞার জ্ঞান অপেক্ষা কর্তে হবে। অবশ্য যদি এই সংবাদ সত্য হয়।

সোলেমান। কি ! ঔরঞ্জীবের আজ্ঞার জ্ঞান—আমার পিতার শত্রুর আজ্ঞার জ্ঞান—আমি অপেক্ষা করব ?

জয়সিংহ। আপনি না করেন, আমাদের তাই কর্তে হবে বৈকি—কি বল দিলীর খাঁ ?

দিলীর। তা—কথাটা ঐ রকমই দাঁড়ায় বটে।

সোলেমান। জয়সিংহ ! দিলীর খাঁ—আপনারা দু'জনে তা হ'লে ষড়যন্ত্র করেছেন ?

জয়সিংহ। আমাদের দোষ কি—বিনা সমুচিত আজ্ঞায় কি করে' কোনো কাজ করি! লাহোরে যুবরাজ দারার উদ্দেশে যাওয়ার সমুচিত আজ্ঞা এখনও পাই নি।

সোলেমান। আমি আজ্ঞা দিচ্ছি!

জয়সিংহ। আপনার আজ্ঞায় আমরা আপনার পিতার আজ্ঞা অবহেলা কর্তে পারি না। পারি খাঁ সাহেব?

দিলীর। তা কি পারি!

সোলেমান। বুঝেছি। আপনারা একটা চক্রান্ত করেছেন। আচ্ছা, আমি স্বয়ং সৈন্যদের আজ্ঞা দিচ্ছি।

দিলীর। কি বলেন মহারাজ?

জয়সিংহ। কোন ভয়ের কারণ নাই খাঁ সাহেব। আমি সৈন্যদের সব বশ করে' রেখেছি!

দিলীর। আপনার মত বিচক্ষণ কন্মঠ ব্যক্তি আমি কখনও দেখি নাই; কিন্তু এ কাজটা কি উচিত হচ্ছে?

জয়সিংহ। চুপ! এখন আমাদের কাজ হচ্ছে একটুখানি দাঁড়িয়ে দেখা। এখনও ঔরংজীবের পক্ষে একেবারে হেল্‌ছি না। একটু অপেক্ষা কর্তে হবে। কি জানি—

সোলেমানের পুনঃ প্রবেশ

সোলেমান। সৈন্যরাও এ চক্রান্তে যোগ দিয়েছে। আপনাদের বিনা আজ্ঞায় এক পাও নড়তে চায় না।

জয়সিংহ। তাই দস্তুর বটে।

সোলেমান। মহারাজ! সম্রাট আমার পিতার সাহায্যে আমায় যেতে লিখেছেন। পিতার কাছে যাবার জন্ত আমার প্রাণ বড় ব্যাকুল হয়েছে। আমি আপনাদের মিনতি কর্ছি দিলীর খাঁ। দারার পুত্র আমি করবোঁতে আপনাদের কাছে এই ভিক্ষা চাচ্ছি—যে আপনারা না যান—আমার সৈন্যদের আজ্ঞা দেন—আমার সঙ্গে পিতার কাছে লাহোরে যেতে। আমি দেখি এই রাজ্যাপহারী ঔরংজীবের কতখানি শোঁধ্য। আমার এই দ্বিধিজয়ী সৈন্য নিয়ে যদি এখনো কন্মক্ষেত্রে গিয়ে পড়তে পারি—মহারাজ!—দিলীর খাঁ! আজ্ঞা দেন। এই কুপার জন্ত আপনাদের কাছে আমি আমরণ বিক্রীত হয়ে থাকুবোঁ।

জয়সিংহ। সম্রাটের আজ্ঞা ভিন্ন আমরা এখন থেকে এক পাও নড়তে পারি না।

সোলেমান। দিলীর খাঁ—আমি জাহ পেতে—যুবরাজ দারার পুত্র আমি জাহ পেতে—ভিক্ষা চাচ্ছি (জাহ পাভিলেন)

দিলীর। উঠুন সাহায্যদা। মহারাজ আজ্ঞা না দেন আমি দিচ্ছি। আমি

দারার নিমক খেয়েছি। মুসলমান জাত, নেমকহারামের জাত নয়। আস্থন সাহাজাদা, আমি আমার অধীন সমস্ত সৈন্য নিয়ে—আপনার সঙ্গে লাহোর যাচ্ছি। আর শপথ করছি যে, যদি সাহাজাদা আমায় ত্যাগ না করেন আমি সাহাজাদাকে ত্যাগ করব না। আমি যুবরাজ দারার পুত্রের জন্তে প্রয়োজন হয় ত প্রাণ দেবো। আস্থন সাহাজাদা! আমি এই মুহূর্তেই আজ্ঞা দিচ্ছি।

সোলেমান ও দিলীরের প্রস্থান

জয়সিংহ। তাই ত! এক ফোঁটা চোখের জলে গলে গলে ধাঁ সাহেব! তোমার মজল তুমি বুঝলে না। আমি কি করব; আমার অধীন সৈন্য নিয়ে তবে আমি আশ্রয় যাত্রা করি।

সপ্তম দৃশ্য

সাজাহান ও জাহানারা

সাজাহান। জাহানারা! আমি সাগ্রহে ঔরংজীবের অপেক্ষা করছি। সে আমার পুত্র, আমার উদ্ধৃত পুত্র; আমার লজ্জা—আমার গৌরব!

জাহানারা। গৌরব পিতা! এত শঠ, এত মিথ্যাবাদী সে! সেদিন যখন আমি তা'র শিবিরে গেলাম, সে আপনার প্রতি প্রগাঢ় ভক্তি দেখালে; বলল যে, মহাপাপ করেছে; আর সঙ্গে ছ' এক ফোঁটা চোখের জলও ফেলে; বলল যে দারার পক্ষে ক্ষমতামূলী ব্যক্তিদের নাম জ্ঞান্তে পারলে সে নিঃশঙ্কচিত্তে পিতার আজ্ঞামত মোরাদকে ছেড়ে দারার পক্ষ নেবে। আমি সরলভাবে তা'র সে কথায় বিশ্বাস করে তা'কে অভাগা দারার হিতৈষীদের নাম দিয়েছিলান। পথে সে-পত্র সে হস্তগত করেছে। এত কপট! এত ধূর্ত!

সাজাহান। না জাহানারা, তা সে কর্তে পারে না। নানা না! আমি এ কথা বিশ্বাস করব না।

জাহানারা। আসুক সে একবার এই দুর্গে। আমি কৌশলে তা'কে আপনার চক্ষের সম্মুখে বন্দী করব।

সাজাহান। সে কি জাহানারা! সে আমার পুত্র, তোমার ভাই। জাহানারা, কাজ নাই। আসুক সে। আমি তাকে স্নেহে বশ করব। তা'তেও যদি সে বশ না হয়—তাহ'লে তা'র কাছে, পিতা আমি—তা'র সম্মুখে নতজাহ হ'য়ে আমাদের প্রাণভিক্ষা মেগে নেবো! বলবো আমরা আর কিছুই চাই না, আমাদের বাঁচতে দাও, আমাদের পরম্পরকে ভালোবাসার অবকাশ দাও।

জাহানারা। সে অপমান থেকে আমি আপনাকে রক্ষা করব বাবা!

সাজাহান। পুত্রের কাছে ভিক্ষায় অপমান নাই।

মহম্মদের প্রবেশ

সাজাহান। এই হে মহম্মদ! তোমার পিতা কৈ!

নিয়ে যাও। আমি ওর চেয়ে অনেক ভালো সংসর্গ পেয়েছি।

দিলদারের সজিত ঔরংজীবের প্রস্থান

মোরাদ। নাচো, গাও।

নৃত্য-গীত

আজি এসেছি—আজি এসেছি, এসেছি বঁধু হে

নিয়ে এই হাসি, রূপ গান।

আজি, আমার যা কিছু আছে, এনেছি তোমার কাছে,

তোমায় করিতে সব দান!

আজি তোমার চরণতলে রাখি এ কুসুমভার,

এ হার তোমার গলে দিই বঁধু উপহার,

সুখার আধার ভরি, তোমার অধরে ধরি—কর বঁধু কর তায় পান।

আজি হৃদয়ের সব আশা, সব স্নেহ ভালবাসা,

তোমাতে হউক অবসান।

ঐ ভেসে আসে কুসুমিত উপবন সৌরভ,

ভেসে আসে উচ্ছল জলদল-কলরব,

ভেসে আসে রাশি রাশি জ্যোৎস্নার মুহূর্তসি, ভেসে আসে পাণ্ডিত্য তান;

আজি এমন চাঁদের আলো—মরি যদি সেও ভাল,

সে মরণ স্বরগ সমান।

আজি তোমার চরণতলে লুটায় পড়িতে চাই,

তোমার জীবনতলে ডুবিয়ে মরিতে চাই,

তোমার নয়নতলে শয়ন লভিব বলে' আসিয়াছি তোমার নিধান।

আজি সব-ভাষা সব বাক্—নীরব হইয়া যাক্;

প্রাণে শুধু মিশে থাক্—প্রাণ।

মোরাদ শুনিতে শুনিতে স্তম্ভিত হইলেন ও ক্রমে নিত্রিত হইলেন

নর্ভকীগণের প্রস্থান ও প্রহরিগণসহ ঔরংজীবের প্রবেশ

ঔরংজীব। বাধো।

মোরাদ। কে দাদা! একি! বিশ্বাসঘাতকতা?—(উঠিলেন)

ঔরংজীব। যদি বাধা দেয়—তবে বধ কর্ত্তে বিধা ক'রো না।

প্রহরিগণ মোরাদকে বন্দী করিল

ঔরংজীব। আগ্রায় নিয়ে যাও। আমার পুত্র স্থলতান আর শায়ের্ত্তা খাঁর
জিন্দায় রাখবে, আমি পত্র লিখে দিচ্ছি।

মোরাদ। এর প্রতিফল পাবে—আমি তোমায় একবার দেখুবো।

ঔরংজীব। নিয়ে যাও।

সপ্রহরী মোরাদের প্রস্থান

ঔরংজীব। আমার হাত ধরে' কোথায় নিয়ে যাচ্ছ খোদা! আমি এ

সিংহাসন চাই নি। তুমি আমার হাত ধরে এ সিংহাসনে বসালে! কেন—তুমিই জান।

দ্বিতীয় দৃশ্য

স্থান—আগ্রার দুর্গ-প্রাসাদ। কাল—প্রভাত।

সাজাহান একাকী

সাজাহান। সূর্য উঠেছে। যেমন সেই প্রথম দিন উঠেছিল, সেই রকম উজ্জল, রক্তবর্ণ! আকাশ তেমনি নীল; ঐ যমুনা তেমনি ক্রীড়াময়ী কলশ্বরী; যমুনার পরপারে বৃক্ষরাজি তেমনি পত্রশ্রাম, পুষ্পোজ্জল; যেমন আমি আশৈশব দেখে এসেছি। সবই সেই। কেবল আমিই বদলিছি—(গাঢ়স্বরে) আমি আজ আমার পুত্রের হস্তে বন্দী—নারীর মত অসহায়, শিশুর মত দুর্বল। মাঝে মাঝে ক্রোধে গর্জন করে' উঠি, কিন্তু সে শরতের মেঘের গর্জন—একটা নিফল হাহাকার মাত্র। আমার নির্বিষ আফালনে আমি নিজেই ক্ষয় হ'য়ে বাই। উঃ! ভারত-সম্রাট সাজাহানের আজ—এ কি অবস্থা! (একটি স্তম্ভের উপর বাহ রাখিয়া দূরে যমুনার দিকে চাহিয়া রহিলেন)—ওকি শব্দ! ঐ! আবার! আবার!—এই যে জাহানারা!

জাহানারার প্রবেশ

সাজাহান। ও কি শব্দ জাহানারা? ঐ আবার!—কুন্‌হিস? (সৌৎসুক্যে দারা কি সৈন্ত কামান নিয়ে বিজয়গর্বে আগ্রায় ফিরে এলো? এসো পুত্র! এই অন্ডায় অবিচার নৃশংসতার প্রতিশোধ নাও।—কি জাহানারা! চোখ চাঙ্কুহিস যে! বুঝিছি মা—এ দারার বিজয় ঘোষণা নয়—এ নৃতন এক দুঃসংবাদ। তাই কি?

জাহানারা। হাঁ বাবা।

সাজাহান। জানি, দুর্ভাগ্য একা আসে না। যখন আরম্ভ হয়েছে, সে তার পালা শেষ না করে' যাবে না। বল কি দুঃসংবাদ কণ্ঠা! ও কিসের শব্দ!

জাহানারা। ঔরংজীব আজ সম্রাট হ'য়ে দিল্লীর সিংহাসনে বসেছে। আগ্রায় এ তারই উৎসবধ্বনি।

সাজাহান। (বেন শুনিতে পান নাই এই ভাবে) কি! ঔরংজীব—কি করেছে?

জাহানারা। আজ, দিল্লীর সিংহাসনে বসেছে।*

সাজাহান। জাহানারা কি বল্‌ছো! আমি জীবিত আছি, না মরে' গিয়েছি? ঔরংজীব—না—অসম্ভব! জাহানারা তুমি শুন্তে তুলেছো! এ কি হ'তে পারে!

ঔরংজীব—ঔরংজীব এ কাজ কর্তে পারে না তা'র পিতা এখনও জীবিত—
একটা ত বিবেক আছে, চক্ষুলাজ্ঞা আছে!

জাহানারা। (কম্পিত স্বরে) যে ব্যক্তি বুদ্ধ পিতাকে ছলে বন্দী করে'
জীবন্তে এট গোর দিতে পারে, সে আর কি না কর্তে পারে বাবা!

সাজাহান। তবুও—না।—হবে।—আশ্চর্য্য কি! আশ্চর্য্য কি! এ কি!
যা'টি থেকে একটা কাল ধোঁয়া আকাশে উঠছে। আকাশ কালীবর্ণ হয়ে গেল!
সংসার উন্টে গেল বুঝি।—ঐ—ঐ—না আমি পাগল হ'য়ে যাচ্ছি নাকি!—ঐ
ক সেই নীল আকাশ, সেই উজ্জল প্রভাত—হাস্ছে! কিছু হয় নি ত।—
আশ্চর্য্য! (কিছুক্ষণ শুকু থাকিয়া) জাহানারা!

জাহানারা। বাবা!

সাজাহান। (গদগদস্বরে) তুই বাইরে কি দেখে এলি!—সংসার কি ঠিক
সেই রকমই চল্ছে! জননী সম্ভানকে স্তন দিচ্ছে? স্ত্রী স্বামীর ঘর কর্ছে? ভৃত্য
প্রভুর সেবা কর্ছে? গৃহস্থ ভিখারীকে ভিক্ষা দিচ্ছে? দেখে এলি—যে বাড়ীগুলো
সেই রকম খাড়া আছে! রাস্তায় লোক চল্ছে! মা'হষে মা'হষ খাচ্ছে না! দেখে
এলি! দেখে এলি।

জাহানারা। নীচ সংসার সেই রকমই চল্ছে বাবা। বন্দী সাজাহানকে
নিয়ে কেউ মাথা ঘামাচ্ছে না।

সাজাহান। না?—সত্য কথা?—তা'রা বল্ছে না যে, 'এ ঘোরতর
অত্যাচার?' বল্ছে না—'আমাদের প্রিয় দয়ালু প্রজাবংশল সাজাহানকে কার
সাধ্য বন্দী করে' রাখে?'—ঠেচাচ্ছে না যে—'আমরা বিদ্রোহ কর'ব, ঔরংজীবকে
কারারুদ্ধ কর'ব, আগ্রার দুর্গপ্রাকার ভেঙে আমাদের সাজাহানকে নিয়ে এসে
আবার সিংহাসনে বসাবো?'—বল্ছে না? বল্ছে না?

জাহানারা। না বাবা। সংসার কাউকে নিয়ে ভাবে না। সবাই নিজের
নিজের নিয়ে ব্যস্ত। তা'রা এত আত্মগ্ন যে, কাল যদি এই সূর্য্য না উঠে, একটা
প্রচণ্ড অগ্নিদাহ আকাশ পুড়িয়ে দিয়ে যায়, ত তা'রই রক্তবর্ণ আলোকে তা'রা
পূর্ব্ববৎ নিজের নিজের কাজ করে' যাবে।

সাজাহান। যদি একবার দুর্গের বাইরে যেতে পার্তাম—একবার স্বেষণ
পাই না জাহানারা! একবার আমাকে চুরি করে' দুর্গের বাইরে নিয়ে যেতে
পারিস্?

জাহানারা। না বাবা। বাইরে সহস্র সতর্ক প্রহরী।

সাজাহান। তবু তা'রা একদিন আমাকে সম্রাট বলে' মান্তো। আমি
তা'দের সঙ্গে কখনও শত্রুতা করি নি। হয় ত তাদের মধ্যে অনেককে অনাহার
থেকে বাঁচিয়েছি, কারাগার থেকে মুক্ত করে' দিয়েছি, বিপদ থেকে রক্ষা
করেছি। বিনিময়ে—

জাহানারা। না বাবা।—মা'হষ খোসামুদে—কুতুবের মত খোসামুদে—

বে একখণ্ড মাংস দিতে পারে, তারই পায়ের তলায় সে দাঁড়িয়ে লেজ নাড়ে।—
এত নীচ! এত হেয়!

সাজ্জাহান। তবু আমি যদি তা'দের কাছে গিয়ে একবার দাঁড়াই? এই
শুভ্রশির মুকুট করে', যষ্টির উপর এই রোগবিকম্পিত দেহখানির ভার রেখে যদি
আমি তা'দের সম্মুখে দাঁড়াই? তা'দের দয়া হবে না? দয়া হবে না?

জাহানারা। বাবা সংসারে দয়া মায়া নাই। সব ভয়ে চলেছে। সাজ্জাহানের
সম্পৎকালে যারাই “জয় সজ্জাট সাজ্জাহানের জয়” বলে চীৎকারে আকাশ দীর্ণ
করে' দিত, তা'রাই যদি আজ আপনার এই স্থবির অথর্ব মূর্ত্তি দেখে, ত ঐ
মুখে ঘৃণায় থুংকার দেবে—আর যদি রূপাভরে থুংকার না দেয়, ত ঘৃণায় মুখ
ফিনিয়ে নিয়ে চলে' যাবে।

সাজ্জাহান। এতদূর! এতদূর!—(গম্ভীর-স্বরে) যদি এই আজ সংসারের
অবস্থা, তবে আজ এক মহাব্যাধি তা'র সর্ব্ব্ব্ব ছেয়েছে; তবে আর কেন?
ঈশ্বর আর তাকে রেখে না। এক্ষণেই তাকে গলা টিপে মেরে ফেলো। যদি
তাই হয়, তবে এখনও আকাশ—তুমি নীলবর্ণ কেন! স্বর্ঘ্য! তুমি এখনো
আকাশের উপরে কেন? নিলজ্জ! নেমে এসো। একটা মহা সংঘাতে তুমি চূর্ণ
হ'য়ে যাও। ভূমিকম্প! তুমি ভৈরব ছক্কারে জেগে উঠে এ পৃথিবীর বক্ষ ভেঙ্গে
খান খান করে' ফেল। একটা প্রকাণ্ড দাবানল জলে' উঠে সব জালিয়ে পুড়িয়ে
ভস্ম করে' দিয়ে চলে' যাও। আর একটা বিরাট ঘূর্ণী-ঝঞ্ঝা এসে সেই ভস্ম-রাশি
ঈশ্বরের মুখে ছড়িয়ে দাও।

তৃতীয় দৃশ্য

স্থান—রাজপুতানার মরুভূমির প্রান্তদেশ। কাল—দ্বিপ্রহর দিবা

বৃকতলে দারা, নাদিরা ও সিপার—একপাশে নিত্রিশু জহরৎউল্লিস।

নাদিরা। আর পারি না প্রভু!—এইখানেই খানিক বিশ্রাম কর।

সিপার। হাঁ বাবা—উঃ কি পিপাসা!

দারা। বিশ্রাম নাদিরা! এ সংসারে আমাদের বিশ্রাম নাই! ঐ মরুভূমি
দেখ্‌ছো—যা আমরা পার হ'য়ে এলাম? দেখ্‌ছো নাদিরা!

নাদিরা। দেখ্‌ছি—ওঃ—

দারা। আমাদের পেছনে যেমন মরুভূমি, আমাদের সম্মুখে সেইরূপ
মরুভূমি। জল নাই, ছায়া নাই, শেষ নাই—ধূ ধূ কর্ছে।

সিপার। বাবা! বড় পিপাসা—একটু জল!

দারা। জল আর নেই সিপার!

সিপার। বাবা! জল! জল না খেলে আমি বাঁচবো না!

দারা। (রুদ্ধভাবে) হুঁ!

সিপার। উঃ! জল! জল!

নাদিরা। দেখ প্রভু, কোনখানে যদি একটু জল পাও, দেখ! বাছা মুর্ছা যাবার উপক্রম হয়েছে। আমারও তৃষ্ণার ছাতি ফেটে যাচ্ছে—

দারা। কেবল তোমাদেরই বৃষ্টি যাচ্ছে নাদিরা! আমার যাচ্ছে না? কেবল নিজের কথাই ভাবছো!

নাদিরা। আমার জন্তু বলছি না নাথ!—এই বেচারী—আহা—

দারা। আমাবও ভিতরে একটা দাহ! ভীষণ! আগুন ছুটছে। তার উপর বেচারীর গুফ তালু দেখছি—কথা সরছে না—দেখছি—আর ভাবছো কি নাদিরা—সে আমার পরম সুখ হচ্ছে! কিন্তু কি করব—জল নাই। এক ক্রোশের মধ্যে জলের দেখা নাই, চিহ্ন নাই। উঃ! কি অবস্থায়ই আমাকে ফেলেছো দয়াময়! আর যে পারি না।

সিপার। আর পারি না বাবা!

নাদিরা। আহা বাছা—আমিও মরি—আর সহ হয় না—

দারা। মর—তাই মর—তোমরা মর—আমিও মরি—আজ এইখানে আমাদের সব শেষ হ'য়ে যাক—তাই যাক!

সিপার। মা—ওঃ আর কথা সরে না! কি বহুণা মা!

নাদিরা। উঃ কি বহুণা!

দারা। না, আর দেখতে পারি না। আমি আজ ঈশ্বরের উপর প্রতিশোধ নেবো! আর তাঁর এই পচা অন্তঃসারশূন্য সৃষ্টি কেটে ফেলে তাঁর প্রকাণ্ড জোচ্ছোরি বের ক'রে দেখাবো। আমি মরব; কিন্তু তার আগে নিজের হাতে তোদের শেষ করব! তোদের মেরে মরব!

ছুরিকা বাহির করিলেন

সিপার। মাকে মেরো না—আমায় মারো!

নাদিরা। না না—আমায় আগে মারো—আমায় চক্ষের সগুখে বাছার বুকে ছুরি দিতে পাবে না—আমায় আগে মারো।

সিপার। না, আমায় আগে মারো বাবা!

দারা। একি দয়াময়!—এ আবার—মাঝে মাঝে কি দেখাও! অন্ধকারের মাঝখানে মাঝে মাঝে এ কি আলোকের উজ্জ্বল! ঈশ্বর! দয়াময়! তোমার রচনা এমন সুন্দর অথচ এমন নিষ্ঠুর! এই মাঝের আর ছেলের পরস্পরকে রক্ষা করবার জন্তু এই কান্না—অথচ কেউ কাউকে রক্ষা কর্তে পারছে না। এত প্রবল, কিন্তু এত দুর্বল। এত উচ্চ, কিন্তু এত নীচে পড়ে'। এ যে আকাশের একখানা মাদিক মাটিতে ছটকে এসে পড়েছে। এ যে স্বর্গ আর নরক এক সঙ্গে! এ কি প্রাণহেলিকা দয়াময়!

সিপার। বাবা বাবা—উঃ! (পড়িয়া গেল)

নাদিরা। বাছা আমার! (তাহাকে গিয়া ক্রোড়ে লইলেন) *

দারা। এই আবার সেই নরক! না—না—না—এ আলোকভ্রান্তি, এ শয়তানী! এ ছল! অঙ্ককার কত গাঢ় তাই দেখাবার জন্ত এ এক জলন্ত অঙ্কারখণ্ড। কিছু না। আমি তোমাদের বধ করে' মর্ক! (জহরতের দিকে চাহিয়া) ও ঘুমোচ্ছে। ওটাকেও মার্ক। তার পরে—তোমাদের মৃতদেহগুলি জড়িয়ে আমি মর্ক।—এসো একে একে।

নাদিরাকে মারিবার জন্ত ছুরিকা উত্তোলন

সিপার। মেরো না, মেরো না।

দারা। (সিপারকে এক হাতে ধরিয়া দূরে রাখিয়া নাদিরাকে ছুরি মারিতে উত্ত) তবে!

নাদিরা। মর্কার আগে আমাদের একবার প্রার্থনা কর্তে দাও।

দারা। প্রার্থনা!—কার কাছে? ঈশ্বরের কাছে? ঈশ্বর নাই। সব ভগামি! ধান্নাবাজি! ঈশ্বর নাই। কৈ কৈ! কে বলে ঈশ্বর আছেন? আছেন? ভালো! কর প্রার্থনা।

নাদিরা। আয় বাছা, মর্কার আগে প্রার্থনা করি।

উভয়ে জাহ্নু পাতিয়া বসিলেন। চক্ষু মুদ্রিত করিয়া রহিলেন

নাদিরা। দয়াময়! বড় দুঃখে আজ তোমায় ডাকছি। প্রভু! দুঃখ দিয়েছো, দিয়েছো! তুমি যা দাও মাথা পেতে নেবো! তবু—তবু—মর্কার সময় যদি পুত্রকন্যাকে আর স্বামীকে স্থখী দেখে মর্তে পার্তাম!

দারা। (দেখিতে দেখিতে সহসা জাহ্নু পাতিয়া বসিলেন) ঈশ্বর রাজাধি-রাজ! তুমি আছো! তুমি না থাকো ত এমন একটা বিশ্ব-জগৎকে চালাচ্ছে কে! কোথা থেকে সে নিয়ম এলো, যার বলে এমন পবিত্র জিনিস দু'টি জগতে প্রস্ফুটিত হয়েছে—মা আর ছেলে! ঈশ্বর তোমাকে অনেকবার স্মরণ করেছি; কিন্তু এমন দুঃখে, এমন দীন ভাবে, এমন কাতর হৃদয়ে আর কখন ডাকি নি। দয়াময়! রক্ষা কর!

গোরক্ষক ও গোরক্ষক-রমণীর প্রবেশ

গোরক্ষক। কে তোমরা?

দারা। এ কার স্বর (চক্ষু খুলিয়া) কে তোমরা! একটু জল দাও, একটু জল দাও!—আমায় না দাও—এই নারী আর—এই বালককে দাও—

গোরক্ষক-রমণী। আহা বেচারীরা। আমি জল আনছি এখনি! একটু সবুজ কর বাবা!

প্রস্থান

গোরক্ষক। আহা! বাছা ধুক্চে!

দারা। জহরৎ! জহরৎ মরে' গিয়েছে!

গোরক্ষক। না মরে নি। বাছা আমার!

দারা। জ্বরং!

জ্বরং। (ক্ষীণস্বরে) বাবা!

রমণীর প্রবেশ ও জলদান এবং সকলের জলপান

গোরক্ষক-রমণী। এসো বাবা, আমাদের বাড়ী এসো।

গোরক্ষক। এসো বাবা!

দারা। কে তোমরা? তোমরা কি স্বর্গের দেবতা! ঈশ্বর পাঠিয়েছেন?

গোরক্ষক। না বাবা, আমি একজন রাখাল!—এ আমার স্ত্রী!

দারা। তা'দের এত দয়া! মাহুষের এত দয়া! এও কি সম্ভব!

গোরক্ষক। কেন বাবা! তোমরা কি কখন মাহুষ দেখ নি? শয়তানই দেখে এসেছো?

দারা। তাই কি ঠিক? তা'রা কি সব শয়তান?

গোরক্ষক-রমণী। এত মাহুষেরই কাজ বাবা। অনাথকে আশ্রয় দেওয়া, যে খেতে পায় নি তাকে খেতে দেওয়া, যে জল পায় নি তাকে জল দেওয়া—এ ত মাহুষেরই কাজ বাবা। কেবল শয়তানই করে না। যদিও তারও যে তা মাঝে মাঝে কর্তে ইচ্ছা হয় না, তা বিশ্বাস করি না, এসো বাবা—

নিষ্ক্রান্ত

চতুর্থ দৃশ্য

স্থান—মুক্তের দুর্গ-প্রাসাদমঞ্চ। কাল—জ্যোৎস্না রাত্রি

পিয়ারা বেড়াইয়া বেড়াইয়া গাঁহতেছেন

গীত

স্বপ্নের লাগিয়া এ ঘর বাঁধিছ

অনলে পুড়িয়া গেল।

অমিয় সাগরে সিনান করিতে

সকলি গরল ভেল।

সখি রে, কি মোর করমে লেখি।

শীতল বলিয়া ও চাঁদ সেবিছ।

ভাহুর কিরণ দেখি!

হাজার প্রবেশ

স্বপ্না। তুমি এখানে! এদিকে আমি খুঁজে খুঁজে সারা।

(পিয়ারার গীত চলিল) নিচল ছাড়িয়া উচলে উঠিতে

পড়িছ অগাধ জলে।

সুজা। তারগরে তোমার স্বর শুনে বুঝলাম যে তুমি এখানে।

(পিয়ারার গীত চলিল) লছমি চাহিতে দারিদ্র্য বেড়ল

মাণিক হারান্ন হেলে।

সুজা। শোন কথা—আঃ—

(পিয়ারার গীত চলিল) পিয়াস লাগিয়া জলদ সেবিছ

বজর পড়িয়া গেল।

সুজা। শুন্বে না? আমি চলাম!

(পিয়ারার গীত চলিল) জ্ঞানদাস কহে, কাছুর পীরিত্তি,

মরণ অধিক শেল।

সুজা। আঃ জালাতন কর্লে! কেউ যেন দ্বিতীয় পক্ষে বিবাহ না করে। স্বামীগুলোকে পেয়ে বসে। প্রথম পক্ষের হ'লে তোমাকে কি একটা কথা শে.ন্বার জন্ত এত সাধস্তাম!

পিয়ারা। আঃ আমার এমন কীর্তনটা মাটি করে' দিলে! সংসারে কেউ যেম না দোজবরে বিয়ে করে। নৈলে কেউ এমন কীর্তনটা মাটি করে! আঃ জালাতন কর্লে! দিবারাত্রি যুদ্ধের সংবাদ শুন্তে হবে! তার উপর না জানো ব্যাকরণ, না বোঝ গান। জালাতন।

সুজা। গান বুঝিনে কি রকম!

পিয়ারা। এমন কীর্তনটা! আহা হা হা!

সুজা। তুমি যে নিজে গেয়ে নিজেই মোহিত!

পিয়ারা। কি করি, তুমি ত বুঝবে না! তাই আমি নিজেই গায়িকা নিজেই শ্রোতা।

সুজা। ব্যাকরণ ভুল।

পিয়ারা। কি রকম?

সুজা। শ্রোতা হবে না—শ্রোত্রী।

পিয়ারা। (খতমত খাইয়া) তবেই ত মাটি করেছে।

সুজা। এখন কথা হচ্ছে এই যে সোলেমান যুদ্ধের দুর্গ ছেড়ে চলে' গিয়েছে কেন তা জানো?

পিয়ারা। তাই ত!

সুজা। তা'র বাপ দারা তা'কে ডেকে পাঠিয়েছেন। অথচ এ দিকে—

পিয়ারা। তা ও রকম হয়! অশুদ্ধ হয় নি!

সুজা। দারা দুইবারই যুদ্ধে ঔরংজীবের দ্বারা পরাজিত হয়েছেন।

পিয়ারা। ব্যাকরণ ভুল হয়নি।

সুজা। তুমি কথাটা শুন্বে না?

পিয়ারা। আগে স্বীকার কর যে আমার ব্যাকরণ ভুল হয় নি।

সুজা। আলবৎ হয়েছে।

পিয়ারা। আলবৎ হয়নি।

সুজা। চল—কাকে জিজ্ঞাসা কর্বে কর।

পিয়ারা। দেখ, আপোষে মেটাও বল্ছি, নৈলে আমি এই নিয়ে রসাতল কর্বে। সারারাত এমনি চেঁচাব যে, দেখি তুমি কেমন ঘুমাও। আপোষে মেটাও!

সুজা। তা হলে আমার বক্তব্যটা শুনবে?

পিয়ারা। শুনবো।

সুজা। তবে তোমার ব্যাকরণ ভুল হয়নি। বিশেষ যখন তুমি দ্বিতীয় পক্ষ। এখন শোন. বিশেষ কথা আছে। গুরুতর! তোমার কাছে পরামর্শ চাই।

পিয়ারা। চাও নাকি? তবে রোস, আমি প্রস্তুত হ'য়ে নেই। (চেহারা ও শোষাক ঠিক করিয়া লইয়া) এখানে একটা উঁচু আসনও নেই ছাই। বাক—দাঁড়িয়ে দাঁড়িয়েই শুনবো। বল। আমি প্রস্তুত।

সুজা। আমার বিশ্বাস যে পিতা মৃত।

পিয়ারা। আমারও তাই বিশ্বাস।

সুজা। জয়সিংহ আমাকে সত্ৰাটের যে দস্তখৎ দেখিয়েছিলেন—সে দস্তখৎ দারার জাল।

পিয়ারা। নিশ্চয়ই—

সুজা। স্বীকার করুছ?

পিয়ারা। স্বীকার আমি কিছু কর্ছি না। ব'লে যাও।

সুজা। দ্বিতীয় যুদ্ধেও ঔরংজীবের হাতে দারার পরাজয় হয়েছে, শুনেছ?

পিয়ারা। শুনেছি।

সুজা। কার কাছে শুনলে?

পিয়ারা। তোমার কাছে।

সুজা। কখন?

পিয়ারা। এখনই!

সুজা। দারা আগ্রা ছেড়ে পালিয়েছে! আর ঔরংজীব বিজয় গর্বে আগ্রায় প্রবেশ করে' পিতাকে বন্দী করেছে, আর মোরাদকেও কারারুদ্ধ করেছে।

পিয়ারা। বটে!

সুজা। ঔরংজীব এখন আমার সঙ্গে যুদ্ধ নাম্বে।

পিয়ারা। খুব সম্ভব।

সুজা। আর ঔরংজীবের সঙ্গে যদি আমার যুদ্ধ হয়—ত সে বেশ একটু শক্ত রকম যুদ্ধ হবে।

পিয়ারা। শক্ত বলে' শক্ত!

সুজা। আমার তার জন্তে এখন থেকেই প্রস্তুত হ'তে হয়।

পিয়ারা। তা হয় বৈকি!

সুজা। কিন্তু—

পিয়ারা। আমারও ঠিক ঐ মত—ঐ কিন্তু—

সুজা। তুমি যে কি বলছো তা আমি বুঝতে পারছি নে।

পিয়ারা। সত্যি কথা বলতে কি সেটা আমিও বড় একটা পারছি নে।

সুজা। দু—তোমার কাছে পরামর্শ চাওয়াই বৃথা।

পিয়ারা। সম্পূর্ণ।

সুজা। যুদ্ধের বিষয় তুমি কি বুঝবে?

পিয়ারা। আমি কি বুঝবো?

সুজা। কিন্তু এদিকে আবার একটা মুশ্কিল হয়েছে।

পিয়ারা। সে মুশ্কিলটা কি রকম?

সুজা। মহম্মদ ত আমায় স্পষ্ট লিখেছে যে সে আমার কন্যাকে বিবাহ করবে না।

পিয়ারা। তা কি করে' করবে?

সুজা। কেন করবে না? আমার কন্যার সঙ্গে তার বিবাহের সম্বন্ধ ঠিক হয়েছে। এখন কথা ফিরিয়ে নিলে কি চলে?

পিয়ারা। ওমা তা কি চলে?

সুজা। কিন্তু সে এখন বিবাহ কর্তে চায় না।

পিয়ারা। তা ত চাইবেই না।

সুজা। লিখেছে যে তা'র পিতৃশক্রর কন্যাকে সে বিবাহ করবে না।

পিয়ারা। তা কি করে' করবে!

সুজা। কিন্তু তাতে আমার মেয়ে যে এদিকে বিষম দুঃখিত হবে।

পিয়ারা। তা হবে বৈ কি! তা আর হবে না!

সুজা। আমি যে কি করি—কিছুই বুঝতে পারছি নে!

পিয়ারা। আমিও পারছি নে!

সুজা। এখন কি করা যায়!

পিয়ারা। তাই ত!

সুজা। তোমার কাছে কোন বিষয়ে উপদেশ চাওয়া বৃথা।

পিয়ারা। বুঝেছো? কেমন করে' বুঝলে? হ্যাঁগা কেমন করে' বুঝলে? কি বুদ্ধি!

সুজা। এখন কি করি! ঔরংজীবের সঙ্গে যুদ্ধ তা'র সঙ্গে তা'র বীর পুত্র মহম্মদ। মহা সমস্তার কথা। তাই ভাবছি। তুমি কি উপদেশ দাও?

পিয়ারা। প্রিয়তম! আমার উপদেশ শুনবে? শোন ত বলি।

সুজা। বল, শুনি।

পিয়ারা। তবে শোন, আমি উপদেশ দেই, যুদ্ধে কাজ নাই।

সুজা। কেন ?

পিয়ারা। কি হবে সাম্রাজ্যে নাথ ? আমাদের কিসের অভাব ? চেয়ে দেখ এই শস্যশ্যামলা, পুষ্পভূষিতা, সহস্র-নিব্বারবন্ধিত অমরাবতী—এই বন্ধভূমি ! কিসের সাম্রাজ্য ! আব আমার স্বয়ং-সিংহাসনে তোমায় বসিয়ে রেখেছি, তার কাছে কিসের সেই ময়ূব-সিংহাসন ? যখন আমরা এই প্রাসাদশিখরে দাঁড়িয়ে—করে কর, বক্ষে বক্ষ—বিহ্বলমেব ঝঙ্কার শুনি, ঐ গন্ধার দিগন্ত প্রসারিত ধূসর বক্ষ দেখি, ঐ অনন্ত নীল-আকাশের উপর দিয়ে আমাদের মিলিত মুগ্ধ-দৃষ্টির নৌকা ভাসিয়ে দিয়ে চলে' বাই—সেই নীলিমাব এক নিভৃত প্রান্তে কল্পনা দিয়ে একটি মোহময়শাস্তিময় দ্বীপ সৃষ্টি করি, আর তার মধ্যে এক স্বপ্নময় কুঞ্জে বসে' পরস্পরের দিকে চেয়ে পরস্পরের প্রাণ পান করি—তখন মনে হয় না নাথ, যে কিসের ঐ সাম্রাজ্য ? নাথ ! এ যুদ্ধে কাজ নাই ! হয় ত যা আমাদের নাই তা পাবো না ; যা আছে তা হাবাবো।

সুজা। তবেই ত তুমি ভাবিয়ে দিলে ! একেই ভেবে ভেবে আমার মাথা গবন হয়েছে, তার উপর—না, দারার প্রভুত্ব বরং মানতে পার্তাম। ঔরং-জীবের—আমার ছোট ভাইএর প্রভুত্ব—কখন স্বীকার করব না—না কখন না।

প্রহান

পিয়ারা। তোমায় উপদেশ দেওয়া বুধা ! বীর তুমি ! সাম্রাজ্যের জ্ঞান তুমি যদিও যুদ্ধ না কর্তে, যুদ্ধ করবার জ্ঞান তুমি যুদ্ধ কর্তে। তোমায় আমি বেশ চিনি—যুদ্ধের নামে তুমি নাচো।

পঞ্চম দৃশ্য

স্থান—দিল্লীতে দরবার-কক্ষ। কাল—প্রাণ

সিংহাসনারূঢ় ঔরংজীব। পার্শ্বে মীরজুমলা, শায়েরস্তা থা ইত্যাদি।

সৈন্যাধ্যক্ষগণ. অমাত্যবর্গ, জরসিংহ ও দেহরক্ষী,

সম্মুখে যশোবন্ত সিংহ

যশোবন্ত। জাঁহাপানা ! আমি এসেছিলাম—সুলতান সুজাব বিরুদ্ধে যুদ্ধে জাঁহাপানাকে আমার সৈন্যসাহায্য দিতে ; কিন্তু এখানে এসে আমার আর সে প্রবৃত্তি নাই। আমি আজ যোধপুরে যাচ্ছি।

ঔরংজীব। মহারাজ যশোবন্ত সিংহ ! আপনি নর্মদায়ুদ্ধে দারার পক্ষে যুদ্ধ করেছিলেন বলে' আমার অপ্রীতিভাজন নহেন। মহারাজের রাজ-ভক্তির নিদর্শন পেলে আমরা মহারাজকে আত্মীয় বলে' গণ্য করব।

যশোবন্ত। যশোবন্ত সিংহ জাঁহাপানার অপ্রীতিভাজন হোক কি প্রীতি-

ভাঙ্গন হোক, তাতে তা'র কিছুমাত্র যায় আসে না। আর আমি আজ এ সভায় জাঁহাপনার দয়ার ভিখারী হ'য়ে আসি নাই।

ঔরংজীব। তবে এখানে আসা মহারাজের উদ্দেশ্য ?

যশোবন্ত। উদ্দেশ্য একবার আপনাকে জিজ্ঞাসা করা যে, কি অপরাধে আমাদের দয়ালু সম্রাট সাজাহান আজ বন্দী ; আর কি স্বহস্তে আপনি পিতা বর্তমানে তাঁর সিংহাসনে বসেছেন।

ঔরংজীব। তার কৈফিয়ৎ কি আমায় এখন মহারাজকে দিতে হবে ?

যশোবন্ত। দেওয়া না দেওয়া আপনার ইচ্ছে ! আমি জিজ্ঞাসা কর্তে এসেছি মাত্র।

ঔরংজীব। কি উদ্দেশ্যে ?

যশোবন্ত। জাঁহাপনার উত্তরের উপর আমার ভবিষ্যৎ আচরণ নির্ভর কর্ছে।

ঔরংজীব। কিরূপ ? কৈফিয়ৎ যদি না দিই ?

যশোবন্ত। তা হ'লে বুঝবো জাঁহাপনার দেওয়ার মত কৈফিয়ৎ কিছু নাই।

ঔরংজীব। আপনার যেরূপ ইচ্ছা বুঝুন ; তাতে ঔরংজীবের কিছু যায় আসে না। ঔরংজীব তার কাষ্যাবলীর জগু এক খোদার কাছে ভিন্ন আর কারো কাছে কৈফিয়ৎ দেয় না।

যশোবন্ত। উত্তম ! তবে খোদার কাছেই কৈফিয়ৎ দিবেন।

গমনোচ্ছত

ঔরংজীব। দাঁড়ান মহারাজ ! আমার কৈফিয়ৎ না পেলে আপনি কি কর্বেন ?

যশোবন্ত। সাধ্যমত চেষ্টা কর্বে—সম্রাট সাজাহানকে মুক্ত কর্তে—এই মাত্র। পারি, না পারি, সে স্বতন্ত্র কথা ; কিন্তু আমার কর্তব্য আমি কর্বে।

ঔরংজীব। বিদ্রোহ কর্বেন ?

যশোবন্ত। বিদ্রোহ ! সম্রাটের পক্ষে যুদ্ধ করার নাম বিদ্রোহ নয়। বিদ্রোহ করেছেন আপনি। আমি সেই বিদ্রোহীর শাসন কর্বে—যদি পারি।

ঔরংজীব। মহারাজ, এতক্ষণ ধ'রে পরীক্ষা কর্ছিলাম যে আপনার স্পর্ধা কতদূর উঠে। পূর্বে শুনেছিলাম, এখন দেখুছি—আপনি নির্ভীক ! মহারাজ ! ভারতসম্রাট ঔরংজীব যোধপুরাধিপতি যশোবন্ত সিংহের শত্রুতাকে ভয় করে না। সমরক্ষেত্রে আর একবার ঔরংজীবের পরিচয় চান, পাবেন।—বুঝেছি, নর্থদায়ুকে ঔরংজীবের সঙ্গে মহারাজের সম্যক পরিচয় হয় নাই।

যশোবন্ত। নর্থদায়ু যুদ্ধ জাঁহাপনা ! আপনি সেই জয়ের গৌরব করেন ? যশোবন্ত সিংহ অহুকম্পাভরে আপনার পথশ্রান্ত হীনবল সৈন্ত আক্রমণ করে নাই। নইলে আমার সৈন্তের শুদ্ধ মিলিত নিশ্বাসে ঔরংজীব সসৈন্তে উড়ে

যেতেন। এতখানি অহুকম্পার বিনিময়ে যশোবস্ত সিংহ ঔরংজীবের শাঠ্যের জ্ঞান প্রস্তুত ছিল না। এই তার অপরাধ। সেই জয়ের গৌরব কর্ছেন জাঁহাঁপনা!

ঔরংজীব। মহারাজ যশোবস্ত সিংহ! সাবধান! ঔরংজীবেরও ধৈর্যের সীমা আছে। সাবধান!

যশোবস্ত। সত্ৰাট! চোখ রাঙাচ্ছেন কাকে? চোখ রাঙিয়ে জয়সিংহের মত ব্যক্তিকে শাসন করে রাখতে পারেন! যশোবস্ত সিংহের প্রকৃতি অস্ত্র ধাতু দিয়ে গড়া জানবেন! যশোবস্ত সিংহ জাঁহাঁপনার রক্তবর্ণ চক্ষু আর অগ্নিময় গোলাকে সমানই তুচ্ছ জ্ঞান করে।

মীরজুমলা। মহারাজ! এ কি স্পর্ধা!

যশোবস্ত। স্তব্ধ হও মীরজুমলা! যখন রাজায় রাজায় যুদ্ধ, তখন বনু-শৃগাল তাদের মধ্যে এসে দাঁড়ায় কি হিসাবে? আমরা এখনও কেউ মরি নি। তোমাদের সময় যুদ্ধের পরে—তুমি আর এষ্ট শায়েষ্তা থা—

শায়েষ্তা থা ও মীরজুমলা তরবারি বাতির করিলেন ও কহিলেন—

সাবধান কাফের!

শায়েষ্তা। আজ্ঞা দিউন জাঁহাঁপনা!

ঔরংজীব ইঙ্গিতে নিবেদন করিলেন

যশোবস্ত। বেশ জুড়ি মিলেছে—মীরজুমলা আর এই শায়েষ্তা থা—উজীর আর সেনাপতি। দুই নেমকহারাম্। যেমন প্রভু তেমনি ভৃত্য।

শায়েষ্তা। আস্পর্ধা এই কাফেরের জাঁহাঁপনা—যে ভারতসম্রাটের সপুখে—

যশোবস্ত। কে ভারতের সম্রাট?

শায়েষ্তা। ভারতের সম্রাট—বাদশাহ্, গাজী আলমগীর!

অকণ্ঠিষ্ঠা জাহানারার প্রবেশ

জাহানারা। মিথ্যা কথা। ভারতের সম্রাট ঔরংজীব নয়। ভারতের সম্রাট শাহনশাহ্, সাজাহান।

মীরজুমলা। কে এ নারী!

জাহানারা। কে এ নারী? এ নারী সম্রাট সাজাহানের কন্যা জাহানারা। (মুখ উন্মুক্ত করিলেন)—কি ঔরংজীব! তোমার মুখ সহসা ছাইয়ের মত শাদা হয়ে গেল যে!

ঔরংজীব। তুমি এখানে ভয়ী!

জাহানারা। আমি এখানে কেন—একথা ঔরংজীব, আজ ঐ সিংহাসনে ধীরভাবে বসে' মাহুঘের স্বরে জিজ্ঞাসা কর্তে পার্ছ? আমি এখানে এসেছি ঔরংজীব, তোমাকে মহারাজজোহিতার অপরাধে অভিযুক্ত কর্তে।

ঔরংজীব। কার কাছে?

জাহানারা। ঈশ্বরের কাছে। ঈশ্বর নাই ভেবেছো ঔরংজীব ? শয়তানের চাকরি করে' ভেবেছো যে ঈশ্বর নাই ? ঈশ্বর আছেন।

ঔরংজীব। আমি এখানে বসে' সেই খোদারই ফকিরি করছি—

জাহানারা। স্তব্ধ হও ভণ্ড ! খোদার পবিত্র নাম তোমার জিহ্বায় উচ্চারণ কোরো না। জিহ্বা পুড়ে যাবে। বজ্র ও ঝাঝা, ভূমিকম্প ও জলোচ্ছাস, অগ্নিদাহ ও মডক—তোমরা ত লক্ষ লক্ষ নিরীহ নরনারীর ঘর উড়িয়ে পুড়িয়ে ভাসিয়ে ভেঙ্গে চুরে চলে যাও। শুধু এদেরই কিছু কর্তে পার না।

ঔরংজীব। মহম্মদ ! এ উম্মাদিনী নারীকে এখান থেকে নিয়ে যাও ! এ—রাজসভা, উম্মাদাগার নয়—মহম্মদ।

জাহানারা। দেখি, এই সভাস্থলে কার সাধ্য আছে যে সম্রাট সাজাহানের কণ্ঠকে স্পর্শ করে। সে ঔরংজীবের পুত্রই হোক, আর স্বয়ং শয়তানই হোক।

ঔরংজীব। মহম্মদ ! নিয়ে যাও !

মহম্মদ। মার্জনা কর্বেন পিতা। সে স্পর্ধা আমার নেই।

যশোবন্ত। বাদশাহজাদীর প্রতি রুঢ় আচরণ আমরা সহ্য করবো না !

অন্ত সককে। কখনই না।

ঔরংজীব। সত্য বটে ! আমি ক্রোধে কি জ্ঞান হারিয়েছি। নিজের ভগ্নীর—সম্রাট সাজাহানের কণ্ঠার প্রতি এই রুঢ় ব্যবহার করবার আজ্ঞা দিচ্ছি ! ভগ্নি অন্তঃপুরে যাও ! এ প্রকাশ্য দরবারে, শত কুৎসিত দৃষ্টির সম্মুখে এসে দাঁড়ানো সম্রাট সাজাহানের কণ্ঠার শোভা পায় না। তোমার স্থান অন্তঃপুর।

জাহানারা। তা জানি ঔরংজীব ; কিন্তু যখন একটা প্রকাণ্ড ভূমিকম্পে হর্ষ্যরাজি ভেঙে পড়ে, তখন অস্বর্ধ্যস্পশরূপা মহিলা যে—সেও নিঃশব্দে রাস্তায় এসে দাঁড়ায়। আজ ভারতবর্ষের সেই অবস্থা। আজ একটা বিরাট অত্যাচারে একটা সাম্রাজ্য ভেঙে পড়েছে। এখন আর সে নিয়ম খাটে না। আজ সে অশ্রয়-নীতির মহাবিপ্লব, যে দুর্ভিক্ষ অত্যাচার—ভারতবর্ষের রক্তমঞ্জে অভিনীত হয়ে' যাচ্ছে, তা এর পূর্বে বুঝি কুত্রাপি হয় নাই। এত বড় পাপ, এত বড় শাস্তি আজ ধর্মের নামে চলে' যাচ্ছে ! আর মেঘশাবকগণ শুদ্ধ অনিমেঘ নেত্রে তার পানে চেয়ে আছে ! ভারতবর্ষের মানুষগুলো কি আজ শুদ্ধ চাবুকে চলেচে ? দুর্নীতির প্রাবনে কি শ্রায়, বিবেক, মনুষ্যত্ব—মানুষের যা কিছু উচ্চ প্রবৃত্তির সব ভেসে গিয়েছে ? এখন নীচ স্বার্থসিদ্ধিই কি মানুষের ধর্মনীতি ? সৈন্যধাক্-গণ ! অমাত্যগণ ! সভাসদগণ ! তোমাদের সম্রাট সাজাহান জীবিত থাকতে তোমরা কি স্পর্ধায় তাঁর সিংহাসনে তাঁর পুত্র ঔরংজীবকে বসিয়েছো আমি জাস্তে চাই।

ঔরংজীব। আমার ভগ্নী যদি এখান থেকে যেতে অস্বীকৃত হন, সভাসদগণ, আপনারা বাইরে যান ! সম্রাটের কণ্ঠার মর্ধ্যাদা রক্ষা করুন।

সকলে বাহিরে যাইতে উভত

জাহানারা। দাঁড়াও। আমার আঞ্জা—দাঁড়াও! আমি এখানে তোমাদের ক্ষাছে নিষ্ফল ক্রন্দন কর্তে আসি নি। আমি নিজের কোন হুংখও তোমাদের কাছে নিবেদন কর্তে আসি নি! আমি নারীর লজ্জা, সঙ্কোচ, সন্ত্রম ত্যাগ করে' এসেছি—আমার বৃদ্ধ পিতার জন্ত। শোন।

সকলে। আঞ্জা করুন।

জাহানারা। আমি একবার মুখোমুখি তোমাদের জিজ্ঞাসা কর্তে এসেছি, যে তোমরা তোমাদের সেই বীর, দয়ালু, প্রজ্ঞাবৎসল সম্রাট সাজাহানকে চাও? না, এই ভণ্ড পিতৃদ্রোহী, পরস্বাপহারী ঔরংজীবকে চাও? জেনো, এখনও ধর্ম লুপ্ত হয় নি। এখনও চন্দ্র সূর্য্য উঠছে! এখনও পিতা পুত্রের সম্বন্ধ আছে। আজ কি একদিনে একজনের পাপে তা উর্টে যাবে? তা হয় না। ক্ষমতা কি এত দৃপ্ত হয়েছে যে তার বিজয়-ক্রন্দুভি তপোবনের পবিত্র শাস্তি লুটে নেবে? অর্থের আস্পর্ধা এত বেশী হয়েছে যে, সে নির্ঝরোধে স্নেহ দয়া ভক্তির বক্ষেব উপর দিয়ে তার রক্তাক্ত শকট চালিয়ে যাবে?—বলো! তোমরা ঔরংজীবের ভয় করছ? কে ঔরংজীব? তার দুই ভুজ্জে কত শক্তি? তোমরাই তার বল। তোমরা ইচ্ছে করলে তাকে ওখানে রাখতে পারো; ইচ্ছা করলে তাকে ওখান থেকে টেনে এনে পক্ষে নিক্ষেপ কর্তে পারো। তোমরা যদি সম্রাট সাজাহানকে এখনও ভালো বাসো, সিংহ স্তম্বির বলে' তাকে পদাঘাত কর্তে না চাও, তোমরা যদি মাগুধ হও ত বলো সমস্তের “জয় সম্রাট সাজাহানের জয়।” দেখবে ঔরংজীবের হাত থেকে রাজদণ্ড খসে পড়ে যাবে!

সকলে। জয় সম্রাট সাজাহানের জয়—

জাহানারা। উত্তম, তবে—

ঔরংজীব। (সিংহাসন হইতে নামিয়া) উত্তম! তবে এই মুহূর্ত্তে আমি সিংহাসন ত্যাগ করলাম! সভাসদগণ! পিতা সাজাহান রুগ্ন, শাসনে অক্ষম। তিনি যদি শাসনক্ষম হতেন, তা হ'লে আমার দাক্ষিণাত্য ছেড়ে এখানে আসার প্রয়োজন ছিল না। আমি রাজ্যের রশ্মি সাজাহানের হাত থেকে নিই নাই—দারার হাত থেকে নিয়েছি। পিতা পূর্ক্ববৎই স্থখে স্বচ্ছন্দে আগ্রার প্রাসাদে আছেন। আপনাদের যদি এই ইচ্ছা হয়, যে দারা সম্রাট হোন, বলুন আমি তাঁকে ডেকে পাঠাচ্ছি। দারা কেন? যদি মহারাজ যশোবন্ত সিংহ এই সিংহাসনে বসতে চান, যদি তিনি বা মহারাজ জয়সিংহ বা আর কেউ শাসনের মহাদায়িত্ব নিতে প্রস্তুত থাকেন—আমার আপত্তি নাই। একদিকে দারা, অত্রদিকে স্বজা, আর একদিকে মোরাদ, এই শত্রু ঘাড়ে করে' সিংহাসনে বসতে চান, বসুন। আমার বিশ্বাস ছিল যে, আপনাদের সম্মতিক্রমে ও অল্পরোধে আমি এখানে বসেছি। মনে কর্কেন না যে, এ সিংহাসন আমার পুরস্কার। এ আমার শাস্তি! আমি আজ সিংহাসনের উপর বসে' নাই,

বারুদের স্তুপের উপর বসে আছি। তার উপর এর জগ্ন আমি মক্কায় বাবার স্তূথ থেকে বঞ্চিত আছি। আপনাদের যদি ইচ্ছা হয়, যে দারা সিংহাসনে বসুন, হিন্দুস্থান আবার অরাজক ধর্ষহীন হোক, আমি আজই মক্কায় যাচ্ছি। সে ত আমার পরম স্তূথ! বলুন—

সকলে নিস্তরু রহিল

ঔরংজীব। এই আমি আমার রাজমুকুট সিংহাসনের পদতলে রাখলাম। আমি এ সিংহাসনে বসেচি আজ—সম্রাটের নামে—কিন্তু তাও বেশী দিনের জগ্ন নয়! সাম্রাজ্যে শাস্তি স্থাপন করে দারার বিশৃঙ্খল রাজ্যে শৃঙ্খলা এনে, পরে আপনারা যার হাতে বলেন, তার হাতে রাজ্য ছেড়ে দিয়ে, আমি সেই মক্কায়ই যেতে চাই। আমি এখানে বসেও সেই দিকেই চেয়ে আছি—আমার জাগ্রতে চিন্তা, নিদ্রায় স্বপ্ন, জীবনের ধ্যান—সেই মহাতীর্থের দিকেই চেয়ে আছি! আপনাদের যদি এই ইচ্ছা হয়, আমি আজই রাজ্যের রশ্মি ছেড়ে দিয়ে মক্কায় চলে' যাই। সে ত আমার পরম সৌভাগ্য। আমার জগ্ন ভাববেন না। আপনারা নিজেদের দিকে চেয়ে বলুন যে পীড়ন চান, না শাসন চান? বলুন আমি আপনাদের ইচ্ছার বিরুদ্ধে শাসনদণ্ড গ্রহণ কর্তে পার্ক না, আর আপনাদের ইচ্ছাক্রমেও এখানে দাঁড়িয়ে দারার উচ্ছৃঙ্খল অত্যাচার দেখতে পার্ক না! বলুন, আপনাদের কি ইচ্ছা!—চল মহম্মদ! মক্কায় বাবার জগ্ন প্রস্তুত হও—বলুন, আপনাদের কি অভিপ্রায়!

সকলে। জয় সম্রাট! ঔরংজীবের জয়—

ঔরংজীব। উত্তম! আপনাদের অভিমত জানলাম। এখন আপনারা বাইরে যান। আমার ভগ্নীর—সাজাহানের কন্যার অমর্যাদা কর্কেন না

ঔরংজীব ও জাহানারা ভিন্ন সকলের প্রস্থান

জাহানারা। ঔরংজীব।

ঔরংজীব! ভগ্নী!

জাহানারা। চমৎকার! আমি প্রশংসা না করে' থাকতে পার্কি না। এতক্ষণ আমি বিশ্বাসে নির্বাক হয়ে' ছিলাম; তোমার ভেঙ্কি দেখ'ছিলাম। বখন চমক ভাঙ্ক'লো তখন সব হারিয়ে বসে' আছি! চমৎকার!

ঔরংজীব। আমি প্রতিজ্ঞা কর্কি, আল্লার নামে শপথ কর্কি, যে আমি যতদিন সম্রাট আছি, তোমার আর পিতার কোন অভাব হবে না।

জাহানারা। আবার বলি—চমৎকার!

তৃতীয় অঙ্ক

প্রথম দৃশ্য

স্থান—খিজুরার ঔরঞ্জীবের শিবির। কাল—রাত্রি

ঔরঞ্জীব একখণ্ড পত্রিকা হস্তে লইয়া দেখিতেছিলেন

ঔরঞ্জীব। কিস্তি। না গজ দিয়ে ঢেকে দেবে। আচ্ছা—না। ঔঠসাই কিস্তিতে আমার দাবা যাবে! কিন্তু—দেখি—উহঃ! আচ্ছা এই গজের কিস্তি—চেপে দেবে। তার পর—এই কিস্তি। এই পদ। তার পর এই কিস্তি! কোথায় যাবে! মাং (সোৎসাহে) মাং (পরিক্রমণ)

মীরজুমলার প্রবেশ

ঔরঞ্জীব। আমরা এ যুদ্ধে জিতেছি উজীর সাহেব!

মীরজুমলা। সে কি জাঁহাপনা!

ঔরঞ্জীব। প্রথম, কামান চালাবেন আপনি। তার পরে, আমি হাতী নিয়ে সেই চকিত সৈন্তের উপর পড়বো। তার পরে মহম্মদের অশ্বারোহী। এই তিন কিস্তিতে মাং।

মীরজুমলা। আর যশোবন্ত সিংহ?

ঔরঞ্জীব। তার উপর এবার তত নির্ভর করি না। তাকে চোখে চোখে রাখতে হবে—আমাদের আর সজ্জার সৈন্তের মধ্যে; অনিষ্ট না কর্তে পারে! তার পশ্চাতে থাকবে তোমার কামান! আমি আর মহম্মদ তার দুই পাশে থাকবো। বিপক্ষের আক্রমণ হবে প্রধানতঃ যশোবন্তের রাজপুত্র সৈন্তের উপর। তা'রা যুদ্ধ করে ভালো; নৈলে পিছনে তোমার কামান রৈল। তা যায়—দাবা যাক্। আমরা জয়লাভ করব। তবে কাল প্রত্যুষে প্রস্তুত থাকবেন—এখন যেতে পারেন।

প্রস্থান

মীরজুমলা। যে আঙ্কে।

ঔরঞ্জীব। যশোবন্ত সিংহ! এটা শুদ্ধ পরীক্ষা।

মহম্মদের প্রবেশ

ঔরঞ্জীব। মহম্মদ! তোমার স্থান হচ্ছে সম্মুখে, যশোবন্ত সিংহের দক্ষিণে। তুমি সব শেষে আক্রমণ করবে। শুদ্ধ প্রস্তুত থাকবে। এই দেখ নজ্জা। (মহম্মদ দেখিলেন)

ঔরঞ্জীব। বুঝলে?

মহম্মদ। হাঁ পিতা।

ঔরঞ্জীব। আচ্ছা যাও। কাল প্রত্যুষে।

মহম্মদের প্রস্থান

ঔরঞ্জীব। সজ্জার লক্ষ সৈন্ত অশিক্ষিত। বেশী কষ্ট পেতে হবে না বোধ

হয়। একবার ছত্রভঙ্গ কর্তে পালে' হয়।—এই যে মহারাজ !

দিলদারের সহিত যশোবন্ত সিংহ প্রবেশ করিয়া হুনিশ করিলেন

ঔরংজীব। মহারাজ ! আপনাকে একবার ডেকে পাঠিয়েছিলাম। আমি অনেক ভেবে সমস্ত সৈন্তের পুরোভাগে আপনাকে দিলাম।

যশোবন্ত। আমাকে ?

ঔরংজীব। তাতে আপত্তি আছে ?

যশোবন্ত। না, আপত্তি নাই।

ঔরংজীব। আপনি যে ইতস্ততঃ কচ্ছেন!

যশোবন্ত। কুমার মহম্মদ সৈন্তের পুরোভাগে থাকবে কথা ছিল।

ঔরংজীব। আমি মত বদলেছি। তিনি থাকবেন আপনার দক্ষিণ পাশে।

যশোবন্ত। আর মীরজুমলা ?

ঔরংজীব। আপনার পশ্চাতে। আমি আপনার বাম পাশে থাকুবো।

যশোবন্ত। ও! বুঝেচি! জাঁহাপনা আমার সন্দেহ করেন।

ঔরংজীব। মহারাজ চতুর। মহারাজের সঙ্গে চাতুরী নিষ্ফল। মহারাজকে সঙ্গে এনেছি, তার কারণ এ নয়, যে মহারাজকে আমরা পরমাশ্রয়ী জ্ঞান করি। সঙ্গে এনেছি এই কারণে যে আমার অল্পপস্থিতিতে মহারাজ আগ্রায় বিভ্রাট না বাধান—সেটা বেশ জ্ঞানেন বোধ হয়।

যশোবন্ত। না অতদূর ভাবি নি। জাঁহাপনা! আমি চতুর বলে আমার একটা অহঙ্কার ছিল; কিন্তু দেখলাম যে সে বিষয়ে জাঁহাপনার কাছে আমি শিশু।

ঔরংজীব। এখন মহারাজের অভিপ্রায় কি ?

যশোবন্ত। জাঁহাপনা! রাজপুত জাতি বিশ্বাসঘাতকের জাতি নয়। কিন্তু আপনারা—অন্ততঃ আপনি তাদের বিশ্বাসঘাতক করে' তুলছেন, কিন্তু সাবধান জাঁহাপনা। এই রাজপুত জাতিকে ক্ষিপ্ত কর্কেঁন না। বন্ধুত্বে রাজপুতের মত মিত্র কেউ নেই! আবার শত্রুতায় রাজপুতের মত ভয়ঙ্কর শত্রু কেউ নেই। সাবধান।

ঔরংজীব। মহারাজ ! ঔরংজীবের সম্মুখে জ্রুকুটি করে' কোন লাভ নাই। যান। আমার এই আজ্ঞা। পালন কর্কেঁন। নৈলে জানেন ঔরংজীবকে!

যশোবন্ত। জানি। আর আপনিও জানেন যশোবন্ত সিংহকে। আমি কারো ভৃত্য নই। আমি ও আজ্ঞা পালন কর্কেঁ না।

ঔরংজীব। মহারাজ ! নিশ্চিত জানবেন ঔরংজীব কখন কাউকে ক্ষমা করে না! বুঝে কাজ কর্কেঁন।

যশোবন্ত। আর আপনিও নিশ্চিত জানবেন যে, যশোবন্ত সিংহ কাউকে ক্ষম করে না। বুঝে কাজ কর্কেঁন।

ঔরংজীব। এও কি সম্ভব।

যশোবন্ত । ঔরংজীব !

ঔরংজীব । যদি তোমার এই মুহূর্তে আমি বন্দী করি, তোমার কে রক্ষা করে ?

যশোবন্ত । এই তরবারি ! জেনো ঔরংজীব, এই দুর্দিনেও মহারাজ যশোবন্ত সিংহের এক ইচ্ছিতে বিশ সহস্র রাজপুত-তরবারি এক সঙ্গে সূর্য্যকিরণে ঝলসে উঠে ! আর এ দুর্দিনেও রাজপুত—রাজপুত !

প্রস্থান

ঔরংজীব । লক্ষ্যভ্রষ্ট হয়েছি । একটু বেশী গিয়েছি । এই রাজপুত জাতটাকে আমি সম্যক্ চিনলাম না । এত তার দর্প ! এত অভিমান !—চিনলাম না ।

দিলদার । চিনবেন কেমন করে জাঁহাপনা ! আপনার শাঠ্যের রাজ্যেই বাস । আপনি দেখে আসছেন শুধু জোড়োড়ি, খোসামুদি, নেমকহারামি ! তাদের বশ কর্তে আপনি পটু, কিন্তু এ আলাদা রকমের রাজ্য । এ রাজ্যের প্রজাদের কাছে প্রাণের চেয়ে মান বড় ।

ঔরংজীব । হুঁ—দেখি এখনও যদি প্রতিকার কর্তে পারি ; কিন্তু বোধ হচ্ছে—রোগ এখন হাকিমির বাইরে ।

প্রস্থান

দিলদার । দিলদার ! তুমি সোধিয়েছিলে ছুঁচ হ'য়ে—এখন ফাল হ'য়ে না বেরোও ! আমার সেই ভয় । প্রথমে পাঠক ! তার পরে বিদূষক ! তার পর রাজনৈতিক ! তার পরে বোধ হয় দার্শনিক ! তার পরে ?

কথা কহিতে কহিতে ঔরংজীব ও মীরজুমলার পুনঃ প্রবেশ

ঔরংজীব । কেবল দেখবেন অনিষ্ট না কর্তে পারে ।

মীরজুমলা । যে আজ্ঞা ।

ঔরংজীব । তার চক্ষে একটা বড় বেশী রক্তবর্ণ দীপ্তি দেখেছি । আর একেবারে প্রাণের ভয় নেই । সমস্ত রাজপুত জাতটাই তাই ।

মীরজুমলা । আমি দেখেছি জাঁহাপনা, যে একটা কামানের চেয়েও একটা রাজপুত ভয়ঙ্কর !

ঔরংজীব । দেখবেন খুব সাবধান !

মীরজুমলা । যে আজ্ঞা ।

ঔরংজীব । ঠিকবার মহম্মদকে পাঠান—না, আমিই তার শিবিরে বাচ্চি ।

প্রস্থান

মীরজুমলা । এই যুদ্ধে ঔরংজীব যেরূপ বিচলিত হয়েছেন, এর পূর্বে আমি তাঁকে এরকম বিচলিত হ'তে কখন দেখি নি !—ভা'য়ে ভা'য়ে যুদ্ধ—তাই বোধহয় ।—ওঃ ভা'য়ে ভা'য়ে বিবাদ কি অস্বাভাবিক ! কি ভয়ঙ্কর !

দিলদার । আর কি উত্তেজক ! এ নেশা সব নেশার চরম । উল্লীর-সাহেব !

আমি এইটে কোন রকমেই বুঝতে পারি না যে শত্রুতা বাড়ার জন্য মানুষ কেন এতগুলো ধর্মের সৃষ্টি করেছিল—যখন ঘরে এত বড় শত্রু ! কারণ ভাইয়ের মত শত্রু আর কেউ নয় ।

মীরজুমলা । কেন ?

দিলদার । এই দেখুন উজীরসাহেব, হিন্দু আর মুসলমান, এদের কি মেলে ? প্রথমতঃ ভগবানের দান যে এ চেহারাখানা, টেনে-বুনে যতখানি আলাদা করা যায় তা তা'রা করেছে । এরা রাখে দাড়ি সম্মুখে—ওরা রাখে টিকি পিছনে (তাও সম্মুখে রাখবে না) । এরা পশ্চিমে মুখ ফিরিয়ে নেওয়ার পড়ে, ওরা পূর্বদিকে মুখ ফিরিয়ে প্রার্থনা করে । এরা কাছা দেয় না, ওরা দেয় । এরা লেখে ডান দিক থেকে বাঁয়ে, ওরা লেখে বাঁয়ে থেকে ডাইনে—লেখে না !

মীরজুমলা । হাঁ, তাই কি ?

দিলদার । তবু হিন্দুরা মুসলমানের অধীনে এক রকম স্মৃতি আছে বলতে হবে ; কিন্তু ভাই ভাইয়ের প্রভু স্বীকার করবে না ।

মীরজুমলা হাসিলেন

দিলদার । (যাইতে যাইতে) কেমন ঠিক কি না ?

মীরজুমলা । (যাইতে যাইতে) হাঁ ঠিক ।

নিষ্ক্রান্ত

স্থান—খিজুরায় সজার শিবির । কাল—সন্ধ্যা

সজা একখানি মানচিত্র দেখিতেছিলেন । পুষ্পমালা হস্তে পিয়ারা

গাহিতে গাহিতে প্রবেশ করিলেন

পিয়ারার গীত

আমি সারা সকালটি বসে' বসে' এই সাধের মালাটি গাঁথিছি ।
আমি, পরাব বলিয়ে তোমারি গলায় মালাটি আমার গাঁথিছি ।
আমি সারা সকালটি করি নাই কিছু, করি নাই কিছু বঁধু আর ;
শুধু বকুলের তলে বসিয়ে বিরলে মালাটি আমার গাঁথিছি ।
তখন গাহিতেছিল সে তরুশাখা পরে স্নানলিত স্বরে পাণিয়া,
তখন ছলিতেছিল সে তরুশাখা ধীরে প্রভাত-সমীরে কাঁপিয়া ।
তখন প্রভাতের হাসি, পড়েছিল আসি কুসুমকুঞ্জভবনে ;
আমি তান্নি মাঝখানে, বসিয়া বিজনে মালাটি আমার গাঁথিছি ।
বঁধু মালাটি আমার গাঁথা নহে শুধু বকুল কুসুম কুড়ায়ে ;
আছে প্রভাতের শ্রীতি সমীরণ গীতি কুসুমে কুসুমে জড়ায়ে ;
আছে, সবার উপরে মাথা তায় বঁধু তব মধুময় হাসি গো ;
ধর, গলে ফুলহার, মালাটি তোমার, তোমারই কারণে গাঁথিছি ।

পিয়ারা মালাটি হাজার গলার দিলেন

সুজা। (হাসিয়া) এ কি আমার বরমালা পিয়ারা? আমি ত যুঁকে এখনও জয়লাভ করি নি!

পিয়ারা। কি যায় আসে। আমার কাছে তুমি চিরজীবী। তোমার প্রেমের কারণে আমি বন্দিনী। তুমি আমার প্রভু, আমি তোমার ক্রীতদাস—কি আজ্ঞা হয়? (জাহ্নু পাতিলেন)

সুজা। এ একটা বেশ নতুন রকমের চং করেছো ত পিয়ারা। আচ্ছা যাও বন্দিনী, আমি তোমায় মুক্ত করে দিলাম।

পিয়ারা। আমি মুক্তি চাই না। আমার এ মধুর দাসত্ব!

সুজা। শোনো। আমি একটা ভাবনায় পড়েছি।

পিয়ারা। সে ভাবনাটা হচ্ছে কি?—দেখি আমি যদি কোন উপায় কর্তে পারি।

সুজা। (মানচিত্র দেখাইয়া) দেখ পিয়ারা—এইখানে মীরজুমলার কামান, এইখানে মহম্মদের পাঁচ হাজার অখারোহী, আর এইখানে ঔরংজীব।

পিয়ারা। কৈ আমি ত শুধু একখানা কাগছ দেখছি। আর ত কিছুই দেখতে পাচ্ছি না।

সুজা। এখন এইরকম ভাবে আছে, কিন্তু কাল যুদ্ধের সময় কে কোথায় থাকবে বলা যাচ্ছে না।

পিয়ারা। কিছু বলা যাচ্ছে না।

সুজা। ঔরংজীবের দস্তুর এই যে যখন তার পক্ষে কামানের গোলা বর্ষণ হয়, তার ঠিক পরেই সে ঘোড়া ছুটিয়ে এসে আক্রমণ করে।

পিয়ারা। বটে! তা হ'লে ত বড় সহজ কথা নয়।

সুজা। তুমি কিছু বোঝ না!

পিয়ারা। ধরে ফেলেছো।—কেমন করে জানলে? হাঁ পা—বল না কেমন করে জানলে? আশ্চর্য্য! একেবারে ঠিক ধরেছো!

সুজা। আমার সৈন্য অশিক্ষিত। আমি বশোবস্ত সিংহকে ভজ্ঞাতে পারি—একবার লিখে দেখবো। কিন্তু—আচ্ছা, তুমি কি উপদেশ দেও?

পিয়ারা। আমি তোমাকে উপদেশ দেওয়া ছেড়ে দিয়েছি।

সুজা। কেন?

পিয়ারা। কেন! তোমায় উপদেশ দিলে ত তুমি তা কখন শোনো না। আমি তোমায় বেশ জানি। তুমি বিষয় একগুঁয়ে। আমাকে আমার মত বিজ্ঞাসা কর বটে, কিন্তু তোমার বিপরীত মত দিলেই চটে যাও।

সুজা। তা—হাঁ—তা—হাঁই বটে।

পিয়ারা। তাই সেই থেকে, স্বামী যা বলেন তাতেই আমি পত্তিব্রতা হিন্দু ধর্মের মত হাঁ দিবে লেবে দিই।

সুজা। তাই ত! দোষ আমারই বটে। পরামর্শ চাই বটে, কিন্তু অল্পকূল পরামর্শ না দিলেই চটে যাই।—ঠিক বলেছো! কিন্তু শোধরাবারও উপায় নাই।

পিয়ারা। না। তোমার উদ্ধারের উপায় থাকলে আমি তোমার উদ্ধার কর্তাম। তাই আমি আর সে চেষ্টাও করি নে। আপন মনে গান গাই।

সুজা। তাই গাও। তোমার গান যেন সুরা। শত দুঃখে শত স্বপ্না ভুলিয়ে দেয়। কঠিন ঘটনার রাজ্য থেকে উড়িয়ে নিয়ে যায়। তখন আমার বোধ হয় যেন একটা বান্ধার আমার ঘিরে রয়েছে। আকাশ, মর্ত্য—আর কিছুই দেখতে পাই না। গাও—কাল যুদ্ধ। সে অনেক দেরি। যা হবার তাই হবে। পেয়ে যাও।

পিয়ারা। তবে তা শুনবার আগে এই পূর্ণজ্যোৎস্নালোকে তোমার মনকে স্নান করিয়ে নাও। তোমার বাসনাপুষ্পগুলিকে প্রেমচন্দন মাখিয়ে নাও—তার পরে আমি গান গাই—আর তুমি তোমার সেই পুষ্পগুলি আমার চরণে দান কর!

সুজা। হাঃ! হাঃ! হাঃ! তুমি বেশ বলেছো—যদিও আমি তোমার উপমার ঠিক রসগ্রহণ কর্তে পারি না।

পিয়ারা। চূপ! আমি গান গাই, তুমি শোনো। প্রথমতঃ এই জায়গাটায় হেলান দিয়ে—এই রকম করে' বোসো! তার পরে হাতটা এই জায়গায় এই রকম ভাবে রাখো! তারপরে চোখ বোজো—যেমন খুঁটানেরা প্রার্থনা করবার সময় চোখ বোজে—মুখে যদিও বলে অন্ধকার থেকে আলোকে নিয়ে যাও—কিন্তু কার্যতঃ যেটুকু ঈশ্বরের আলো পাচ্ছিল, চোখ বুজে তাও অন্ধকার করে' ফেলে।

সুজা। হাঃ! হাঃ! হাঃ! তুমি অনেক কথা বলে বটে, কিন্তু যখন এই বক ধার্মিকদের ঠাট্টা কর, তখন যেমন মিষ্টি লাগে—কারণ আমি কোন ধর্মই মানি নে।

পিয়ারা। ব্যাকরণ ভুল। যেমন বলেই তেমন বলা চাই—

সুজা। দারা হিন্দুধর্মের পক্ষপাতী—ভণ্ড। ঔরংজীর গোড়া মুসলমান—ভণ্ড। মোরাদও মুসলমান—গোড়া নয়—ভণ্ড।

পিয়ারা। আর তুমি কোন ধর্মই মানো না—ভণ্ড।

সুজা। কিসে?—আমি কোন ধর্মেরই ভান করি নে। আমি সোজাসজি বলি যে, আমি সত্ৰাট হতে চাই।

পিয়ারা এইটেই ভণ্ডামি।

সুজা। ভণ্ডামি কিসে! আমি দারার প্রভুত্ব স্বীকার কর্তে রাজি ছিলাম; কিন্তু আমি ঔরংজীব আর মোরাদের প্রভুত্ব মানতে পারি নে। আমি তাদের বড় ভাই।

পিয়ারা। ভণ্ডামি—বড় ভাই হওয়া ভণ্ডামি।

সুজা। কিসে? আমি আগে জন্মেছিলাম।

পিয়ারা। আগে জন্মানো ভঙামি। আর আগে জন্মানোতে তোমার নিজের কোন বাহাদুরী নেই। তার দরুণ তুমি সিংহাসন বেশী দাবী কর্তে পারো না।

স্বজ্ঞা। কেন ?

পিয়ারা। আমাদের বাবুর্চি ঐ রহমৎউল্লা তোমার অনেক আগে জন্মেছে। তবে তোমার চেয়ে সিংহাসনের উপর তার দাবী বেশী।

স্বজ্ঞা। সে ত আর সম্রাটের পুত্র নয়।

পিয়ারা। হতে কতক্ষণ।

স্বজ্ঞা। হাঃ! হাঃ! হাঃ! তুমি ঐ রকম তর্ক কর্বে? না তুমি গান গাও—যা পারো!

পিয়ারার গীত

তুমি বাঁধিয়া কি দিয়ে রেখেছ হৃদি এ,

(আমি) পারি না যেতে ছাড়ায়ে,

এ যে বিচিত্র নিগূঢ় নিগূড় মধুর—

(কি) প্রিয় বাহিত্তি কারা এ।

এ যে যেতে বাঞ্জে চরণে এ যে বিরহ বাঞ্জে স্মরণে

কোথা যায় মিলিয়া সে মিলনের হাসে

চুষনের পাশে হারায়ে।

স্বজ্ঞা। পিয়ারা! ঈশ্বর তোমাকে তৈরি করেছিলেন কেন? ঐ রূপ, ঐ রসিকতা, ঐ সজ্জীত! এমন একটা ব্যাপার ঈশ্বর এই কঠিন মর্ত্যভূমে তৈরি করেছিলেন কেন?

পিয়ারা। তোমারি জগৎ প্রিয়তম!

স্থান—আমেদাবাদ। দারার শিবির। কাল—রাত্রি

দারা। আশ্চর্য্য! যে দারা একদিন সেনাপতি নরপতির উপরে হুকুম চালাত, সে নগর হ'তে নগরে প্রতাড়িত হ'য়ে আজ পরের দুয়ারে ভিখারী, আর তার দুয়ারে ভিক্ষারী, যে ঔরঞ্জীবের আর মোরাদের খণ্ডর। এত নীচে নেমে যেতে হবে তা ভাবি নি।

নাদিরা। পুত্র সোলেমানের খবর পেয়েছ কিছূ ?

দারা। তার খবর সেই এক। মহারাজ জয়সিংহ তাকে পরিত্যাগ করে' সসৈন্তে ঔরঞ্জীবের সঙ্গে যোগ দিয়েছে। বেচারী পুত্র জনকতক অবশিষ্ট সজ্জীমাত্র নিয়ে, (তাকে আর সৈন্ত বলা যায় না) হরিষারের পথে শাহোরে আমার উদ্দেশে আসছিল! পথে ঔরঞ্জীবের এক সৈন্তদল তাকে স্ত্রীনগরের প্রান্তে তাড়িয়ে নিয়ে যায়। সোলেমান এখন স্ত্রীনগরের রাজা পৃথ্বীসিংহের দ্বারে

ভিখারী। কি নাদিরা- -কাঁদছ ?

নাদিরা। না প্রভু!

দারা। . না কাঁদো। সান্ত্বনা পাবে।—যদি কাঁদতেও পার্তাম!

নাদিরা। আবার ঔরংজীবের সঙ্গে যুদ্ধ করবে ?

দারা। করবে। যতদিন এ দেহে প্রাণ আছে, ঔরংজীবের প্রভুত্ব স্বীকার করব না। যুদ্ধ করবে। সে আমার বৃদ্ধ পিতাকে কারারুদ্ধ করে' তাঁর সিংহাসন অধিকার করেছে; আমি যতদিন না পিতাকে কারামুক্ত কর্তে পারি, যুদ্ধ করবে। কি নাদিরা! মাথা হেঁট করলে যে! আমার এ সঙ্কল্প তোমার পছন্দ হচ্ছে না!—কি করবে!

নাদিরা। না নাথ! তোমার ইচ্ছাই আমার ইচ্ছা, তবে—

দারা। তবে ?

নাদিরা। নাথ! নিত্য এই আতঙ্ক, এই প্রয়াস, এই পলায়ন কেন ?

দারা। কি করবে বল, যখন আমার হাতে পড়েছো তখন সৈতে হবে বৈকি ?

নাদিরা। আমি আমার জ্ঞান বলছি না প্রভু! আমি তোমারই জ্ঞান বলছি। একবার আয়নায় নিজের চেহারাখানি দেখ দেখি নাথ—এই অস্থিসার দেহ, এই নিশ্চিন্ত দৃষ্টি, এই শুভ্রায়িত কেশ—

দারা। আজ যদি আমার এ চেহারা তোমার পছন্দ না হয়—কি করবে।

নাদিরা। আমি কি তাই বলছি!

দারা। তোমাদের জাতির স্বভাব। তোমাদের কি! তোমরা কেবল অলুপোগ কর্তে পারো। তোমরা আমাদের স্তখে বিন্ন, দুঃখে বোঝা!

নাদিরা। (ভগ্নস্বরে) নাথ! সত্যই কি তাই! (হস্তধারণ)

দারা। যাও! এ সময়ে আর নাকি-স্বর ভালো লাগে না।

হাত ছাড়াইয়া প্রস্থান

নাদিরা। (কিছুক্ষণ চক্ষু বস্ত্র দিয়া রহিলেন। পরে গাঢ়স্বরে কহিলেন) দয়াময় আর কেন!—এইখানে যবনিকা ফেলে দাও! সাম্রাজ্য হারিয়েছি, প্রাসাদ সন্তোষ ছেড়ে এসেছি, পথে—রোদ্দ্রে, শীতে, অনশনে, অনিদ্রায় কতদিন কাটিয়েছি; সব হেসে সহ্য করেছি, কারণ স্বামীর সোহাগ হারাই নাই।—কিন্তু আজ—(কণ্ঠরুদ্ধ হইল) তবে আর কেন! আর কেন! সব সহিতে পারি, শুধু, এইটে সহিতে পারি নে। (ক্রন্দন)

সিপারের প্রবেশ

সিপার। মা—এ কি ? তুমি কাঁদছ মা!

নাদিরা। না বাবা আমি কাঁদছি না—ওঃ, সিপার! সিপার! (ক্রন্দন)

সিপার কাছে আসিয়া নাদিরার গলদেশে হাত দিয়া চক্ষুর বস্ত্র সরাইতে গেল

সিপার। মা কাঁদছো কেন ? কে তোমার হৃদয়ে আঘাত দিচ্ছে ? আমি

তাকে কখনও ক্ষমা করবো না—আমি—তাকে—

এই বলিয়া সিপার নাদিরার গলদেশ জড়াইয়া তাঁহার বক্ষে মুখ লুকাইয়া কাঁদিতে লাগিল।
নাদিরা তাহাকে বক্ষে চাপিয়া ধরিলেন

জহরৎ উল্লিঙ্গার প্রবেশ

জহরৎ। এ কি!—মা কাঁদছে কেন, সিপার?

নাদিরা। না জহরৎ! আমি কাঁদছি না।

জহরৎ। মা! তোমার চক্ষে জল ত কখন দেখি নাই। জ্যোৎস্নার মত—
রাত্রি যত গভীর, তোমার হাসিটি তত উজ্জ্বল দেখেছি। অনশনে অনিদ্ৰায়
চেয়ে দেখেছি, যে তোমার অধরে সে হাসিটি হৃদ্বিনের বন্ধুর মত লেগেই
আছে—আজ এ কি মা?

নাদিরা। যন্ত্রণা বাক্যের অতীত জহরৎ। আজ আমার দেবতা বিমুখ
হয়েছেন!

দারার পুনঃপ্রবেশ

দারা। নাদিরা! আমায় ক্ষমা কর! আমার অপরাধ হয়েছে। বাহিরে
গিয়েই বুঝতে পেরেছি।

নাদিরা প্রবলতর বেগে কাঁদিতে লাগিলেন

দারা। নাদিরা! আমি অপরাধ স্বীকার করছি! ক্ষমা চাচ্ছি। তবু—
ছিঃ! নাদিরা যদি জ্ঞাস্তে, যদি বুঝতে যে এ অস্তরে কি জ্বালা দিবারাত্র
জ্বলছে—তা হ'লে আমার এই অপরাধ নিতে না।

নাদিরা। আর তুমি যদি জ্ঞাস্তে প্রিয়তম, যে আমি তোমায় কত ভালো-
বাসি, তা হ'লে এত কঠিন হ'তে পার্ভে না!

সিপার। (অক্ষুটস্বরে) তোমায় যে আমি দেবতার মত ভক্তি করি বাবা!

নাদিরা। বৎস! তোমার বাবা আমায় কিছু বলেন নি! আমি বড়
বেশী অভিমানিনী—আমারই দোষ।

বাদীর প্রবেশ

বাদী। বাহিরে একজন লোক ডাকছেন, খোদাবন্দ!

দারা। কে তিনি?

বাদী। শুনলাম তিনি গুজরাটের সুবাদার।

দারা। সুবাদার এসেছেন?

নাদিরা। আমি ভিতরে যাই।

প্রস্থান

দারা। তাঁকে এইখানেই নিয়ে এসো সিপার।

বাদীর সহিত সিপারের প্রস্থান

দেখা বাক্—বদি আশ্রয় পাই।

শাহা নাবাজ ও সিপারের প্রবেশ

সাহা নাবাজ । বন্দেগি যুবরাজ !

দারা । বন্দেগি সুলতানসাহেব !

সাহা নাবাজ । জাঁহাপনা আমার স্মরণ করেছেন ?

দারা । হাঁ সুলতানসাহেব ! আমি একবার আপনার সাক্ষাৎ চেয়েছিলাম !

সাহা নাবাজ । আজ্ঞা করুন !

দারা । আজ্ঞা কর্ব্ব ! সে দিন গিয়েছে সুলতানসাহেব ; আজ ভিক্ষা কর্ত্তে এসেছি । আজ্ঞা কর্ব্বে এখন—ঔরংজীব ।

সাহা নাবাজ । ঔরংজীব ! তার আজ্ঞা আমার জ্ঞান নয় ।

দারা । কেন সুলতানসাহেব ! আজ ঔরংজীব ভারতের সম্রাট ।

সাহা নাবাজ । ভারতের সম্রাট ঔরংজীব ? সে স্বার্থত্যাগের মুখোস প'রে বৃদ্ধ পিতার বিপক্ষে যুদ্ধ করে, স্নেহের মুখোস পরে' ভাইকে বন্দী করে, ধর্ম্মের মুখোস পরে' সিংহাসন অধিকার করে—সে সম্রাট ? আমি বরং এক অন্ধ পঙ্গুকে সেই সিংহাসনে বসিয়ে তাকে সম্রাট বলে' অভি বাদন কন্তে' রাজি আছি ; কিন্তু ঔরংজীবকে নয় ।

দারা । সে কি সুলতানসাহেব ! ঔরংজীব আপনার জামাতা ।

সাহা নাবাজ । ঔরংজীব যদি আপনার জামাতানা হ'য়ে আমার পুত্র হোত, আর সেই পুত্র আমার একমাত্র সন্তান হোত ত আমি তা'র সঙ্গে সখ্য ত্যাগ কর্ত্তাম ! অধর্ম্মকে কখনো বরণ কর্ত্তে পারি না—আমার জীবন থাকতে না ।

দারা । কি কর্ব্বেন স্থির করেছেন ?

সাহা নাবাজ । যুবরাজ দারার পক্ষে যুদ্ধ কর্ব্ব । পূর্ব্ব থেকেই তার জ্ঞান প্রস্তুত হচ্ছি । আমার এই সামান্য সৈন্য দিয়ে ঔরংজীবের সঙ্গে যুদ্ধ করা অসম্ভব । তাই আমি সৈন্য সংগ্রহ করছি ।

দারা । কি রকমে ?

সাহা নাবাজ । মহারাজ যশোবন্ত সিংহের কাছে সাহায্য ভিক্ষা ক'রে পাঠিয়েছি ।

দারা । তিনি সাহায্য কন্তে' স্বীকৃত হয়েছেন ?

সাহ নাবাজ । হয়েছেন।—কোন ভয় নাই সাহজাদা । আহ্নন —আপনি আজ আমার অতিথি—সম্রাটের জ্যেষ্ঠপুত্র । আপনি তাঁর মনোনীত সম্রাট । আমি একজন বৃদ্ধ রাজভক্ত প্রজা । বৃদ্ধ সম্রাটের জ্ঞান যুদ্ধ কর্ব্ব । জয়লাভ না কর্ত্তে পারি, প্রাণ দিতে পার্ব্ব ! বৃদ্ধ হয়েছি, একটা পুণ্য করে, পাথের কিছু সংগ্রহ করে' নিয়ে যাই ।

দারা । তবে আপনি আমার আশ্রয় দিচ্ছেন ?

সাহা নাবাজ । আশ্রয় যুবরাজ ! আজ থেকে আমার বাড়ী আপনার বাড়ী । আমি যুবরাজের ভৃত্য ।

দারা। আপনি অতি মহৎ ব্যক্তি।

সাহা নাবাজ। সাহাজাদা! আমি মহৎ নই—আমি একজন মাহুব। আর আমি আজ যা করছি একটা মহা স্বার্থত্যাগ করছি যে তা মানি না। সাহাজাদা! আজ আমি এত বুক হয়েছি—তবু সাহস করে বলতে পারি যে, জেনে অধর্ম করি নি; কিন্তু ভালো কাজও বড় একটা করি নি। আজ যদি স্বযোগ পেয়েছি—ছাড়বো কেন? উভয়ে নিঃশব্দ

জহরৎ উম্মিনার পুনঃ প্রবেশ

জহরৎ। এত তুচ্ছ অসার অকর্মণ্য আমি! পিতার কোন কাজেই লাগি না। শুধু একটা বোঝা!—হা রে অধম নারীজাতি! পিতামাতার এই অবস্থা দেখছি, কিছু করতে পাচ্ছি না। মাঝে মাঝে কেবল উষ্ণ অশ্রুপাত।—কিন্তু আমি যাহোক একটা কিছু করব, একটা কিছু—যা পর্বত শিখর হ'তে বস্পের মত অসমসাহসিক—তার মত ভয়ঙ্কর। —দেখি।

চতুর্থ দৃশ্য

স্থান—কাশ্মীরের মহারাজা পৃথ্বীসিংহের প্রমোদোত্তান। কাল—সন্ধ্যা

সোলেমান একাকী

সোলেমান। এলাহাবাদ থেকে পালিয়ে শেষে এই ছুর পার্বত্য কাশ্মীরে আসতে হ'লো। পিতার সাহায্যে বেরিয়েছিলাম। নিষ্ফল হয়েছি।—সুন্দর এই দেশ! যেন একটা কুসুমিত সঙ্গীত, একটা চিত্রিত স্বপ্ন, একটা অলস সৌন্দর্য স্বর্গের একটি অপ্সরা যেন মর্ত্যে নেমে এসে, ভ্রমণে শ্রান্ত হ'য়ে, পা ছড়িয়ে হিমালয়ের গায়ে হেলে, বাম করতলে কপোল রেখে, নীল-আকাশের দিকে চেয়ে আছে! এ কি সঙ্গীত!

দূরে সঙ্গীত

এ যে ক্রমেই কাছে আসছে। ঐ যে একখানি সজ্জিত নৌকায় কয়টি সজ্জিত নারী নিজেরাই নৌকা বেয়ে গাইতে গাইতে আসছে।—কি সুন্দর! কি মধুর!

একখানি সজ্জিত তরণীর উপর সজ্জিত রমণীদিগের প্রবেশ ও গীত

বেলা ব'য়ে যায়—

ছোট্ট মোদের পান্‌সীতরী সঙ্কেতে কে যাবি আর।
দোলে হার—বকুল যুঁথি দিয়ে গাঁথা সে,
রেশমী পাল উড়ছে মধুর মধুর বাতাসে;
হেলছে তরী জ্বলছে তরী—ভেসে যাচ্ছে দরিয়ায়।
যাত্রী সব নতন প্রেমিক, নতন প্রেমে ভোর,
মুখে সব হাসির রেখা, চোখে ঘূমের ঘোর,
বান্ধীর ধনি, হাসির ধনি উঠছে ছুটে কোয়ারায়।

পশ্চিমে জ্বলছে আকাশ সাঁঝের তপনে,
পূর্বে ঐ বুনছে চন্দ্র মধুর স্বপনে ;
কর্ছে নদী কুলুধনি, বইছে মুহু মধুর বায় ॥

১ম নারী । স্তম্ভর যুবা ! কে আপনি ?

সোলেমান । আমি দারা সেকোর পুত্র সোলেমান ।

১ম নারী । সম্রাট সাজাহানের পুত্র দারা সেকো ! তাঁর পুত্র আপনি !

সোলেমান । হাঁ আমি তাঁর পুত্র ।

১ম নারী । আর আমি কে, তা যে জিজ্ঞাসা কর্ছনা সোলেমান ? আমি কাশ্মীরের প্রধানা নর্তকী—রাজার প্রেয়সী গণিকা । এরা আমার সহচরী !—এসো আমাদের সঙ্গে নৌকায় ।

সোলেমান । তোমার সঙ্গে ? হায় হতভাগিনী নারী ! কি জন্ত ?

১ম নারী । সোলেমান ! তুমি এত শিশু নও কিছু ! তুমি আমাদের ব্যবসাবৃত্তি ত জানো ।

সোলেমান । জানি ! জানি বলেই ত আমার এত অহুকম্পা । এ রূপ, এ যৌবন কি ব্যবসার সামগ্রী ? রূপ—শরীর, ভালোবাসা তার প্রাণ । প্রাণ-হীন শরীর নিয়ে কি কর্ছ নারী ?

১ম নারী । কেন ! আমরা কি ভালোবাসতে জানি না ?

সোলেমান । শিখবে কোথা থেকে বল দেখি ! যারা রূপকে পণ্য করেছে, যারা হাসিটি পর্যন্ত বিক্রয় করে,—তা'রা ভালোবাসবে কেমন করে ? ভালোবাসা যে কেবল দিতে চায়—সে যে ত্যাগীর স্বথ—সে স্বথ তোমরা কি করে' বুঝবে মা !

১ম নারী । তবে আমরা কি কখন ভালোবাসি না ?

সোলেমান । বাসো—তোমরা ভালোবাসো কিংখাবের পাগড়ি, হীরার অংটি, কার্পেটের জুতো, হাতীর দাঁতের ছড়ি । তোমরা হৃদমন্দ ভালোবাসতে পারো—কোঁকড়া চুল, পটলচেরা চোখ, সরল নাসা, সরস অধর । আমার এই গোরবর্ণ চেহারাখানি দেখেছো, কিংবা আমি সম্রাটের পৌত্র শুনেছো, বুঝি তাই মুগ্ধ হয়েছো । এ ত ভালোবাসা নয় । ভালোবাসা হয় আত্মায় আত্মায় ।—যাও মা !

২য় নারী । ঐ রাজা আসছেন ।

১ম নারী । আজ এ হেন অসময়ে ?—চল ।—যুবক !—এর প্রতিফল পাবে ।

সোলেমান । কেন ক্রুদ্ধ হও মা ? তোমাদের প্রতি আমার কোন ঘৃণা বিদ্বেষ নেই ! কেবল একটা অহুকম্পা—অসীম—অতলম্পর্শ ।

গাইতে গাইতে নারীগণের প্রস্থান

সোলেমান । কি আশ্চর্য—ঐ অপার্থিব রূপ, নয়নের ঐ জ্যোতি, অন্দর-

সম্ভব গঠন, ঐ কিম্বদন্তি—এত স্নন্দর—কিন্তু এত কুৎসিত !

পরিক্রমণ

শ্রীনগরের রাজা পৃথ্বীসিংহের প্রবেশ

রাজা। ছিঃ কুমার !

সোলেমান। কি মহারাজ ?

রাজা। আমি তোমাকে নিরাশ্রয় দেখে আশ্রয় দিয়েছিলাম, আর যথাসম্ভব স্নেহে রেখেছিলাম। তোমার জন্ম ঔরংজীবের সৈন্যের সঙ্গে যুদ্ধ করেছি।

সোলেমান। আমি ত কখনও অস্বীকার করি নাই মহারাজ !

রাজা। এখনও শায়েস্তা খাঁ তোমাকে ধরিয়ে দেবার জন্তে সন্ন্যাসীদের পক্ষ হ'য়ে অনেক অহুন্নয় করছিলেন, প্রলোভন দেখাচ্ছিলেন। আমি তবু স্বীকৃত হই নি।

সোলেমান। আপনার কাছে আমি কৃতজ্ঞ।

রাজা। কিন্তু তুমি এত অহুন্নয়, লঘুচিত্ত, উচ্ছৃঙ্খল তা জ্ঞাস্তাম না।

সোলেমান। সে কি মহারাজ !

রাজা। আমি তোমাকে আমার বহিষ্কৃত্যন বেড়াবার জন্ত ছেড়ে দিয়েছি ; কিন্তু তুমি যে তা ছেড়ে আমার প্রমোদ-উত্তানে প্রবেশ করে' আমার রক্ষিতাদের সঙ্গে হাস্যলাপ কর্কে, তা কখন ভাবি নাই।

সোলেমান। মহারাজ আপনি ভুল বুঝেছেন—

রাজা। তুমি স্নন্দর, সুবা রাজপুত্র ; কিন্তু তাই বলে'—

সোলেমান। মহারাজ ! মহারাজ—আমি—

রাজা। যাও, যুবরাজ ! কোন দোষক্ষালনের চেষ্টা নিফল।

উভয়ে বিপরীত দিকে নিষ্কাশ

পঞ্চম দৃশ্য

স্থান—এলাহাবাদে ঔরংজীবের শিবির। কাল—রাত্রি

ঔরংজীব একাকী

ঔরংজীব। কি অসমসাহসিক এই মহারাজ যশোবন্ত সিংহ ! খিঞ্জুরা যুদ্ধক্ষেত্রে শেষ রাত্রে আমার মহিলাশিবির পর্য্যন্ত লুণ্ঠন করে' একটা জলোচ্ছ্বাসের মত আমার সৈন্যের উপর দিয়ে চ'লে গেল !—অদ্ভুত ! যা হোক, সূজার সঙ্গে এ যুদ্ধে জয়ী হয়েছি !—কিন্তু ওদিকে আবার মেঘ করে' আসছে। আর একটা ঝড় উঠবে। সাহা নাবাজ আর দারা—সঙ্গে যশোবন্ত সিংহ। ভয়ের কারণ আছে। যদি—না তা কর্কে না। এই জয়সিংহকে দিয়েই কর্কে হবে।—এই যে মহারাজ !

মহারাজ জয়সিংহের প্রবেশ

জয়সিংহ। জাহাপনা আমাকে স্মরণ করেছিলেন ?

ঔরঞ্জীব। হাঁ, আমি এতক্ষণ ধরে' আপনার প্রতীকা করছিলাম। আহ্ন—
উঃ বিষম গরম পড়েছে।

জয়সিংহ। বিষম গরম! কি রকম একটা ভাপ্ উঠ্ছে যেন!

ঔরঞ্জীব। আমার সর্কাদে আগুনের ফুঙ্কি উড়ে যাচ্ছে! আপনার শরীর
ভালো আছে?

জয়সিংহ। জাঁহাপনার মেহেরবানে—বান্দা ভালো আছে।

ঔরঞ্জীব। দেখুন মহারাজ! আমি কাল প্রাত্যুষে দিল্লী ফিরে যাচ্ছি,
আপনিও আমার সঙ্গে ফিরে যাচ্ছেন কি?

জয়সিংহ। যেরূপ আজ্ঞা হয়—

ঔরঞ্জীব। আমার ইচ্ছা যে আপনি আমার সঙ্গে যান।

জয়সিংহ। যে আজ্ঞে, আমি অষ্টপ্রহরই প্রস্তুত। জাঁহাপনার আজ্ঞা
পালন করাই আনন্দ।

ঔরঞ্জীব। তা জানি মহারাজ! আপনার মত বন্ধু সংসারে বিরল।
আর আপনি আমার দক্ষিণ হস্ত।

জয়সিংহ সেলাম করিলেন

ঔরঞ্জীব। মহারাজ! অতি দুঃখের বিষয়, যে মহারাজ যশোবন্ত সিংহ
আমার ভাণ্ডার শিবির লুট করে'ই ক্ষান্ত নহেন। তিনি বিদ্রোহী সাহা নাবাজ
আর দারার সঙ্গে যোগ দিয়েছেন।

জয়সিংহ। তাঁর বিমুঢ়তা।

ঔরঞ্জীব। আমি নিজের জ্ঞান দুঃখিত নহি। মহারাজই নিজের সর্কনাশকে
নিজের ঘরে টেনে আনছেন।

জয়সিংহ। অতি দুঃখের বিষয়!

ঔরঞ্জীব। বিশেষ, আপনি তাঁর অস্তরঙ্গ বন্ধু। আপনার খাতিরে তাঁর
অনেক উদ্ধত ব্যবহার মার্জ্জনা করেছি। এমন কি তাঁর শিবির লুণ্ঠনব্যাপারও
মার্জ্জনা কর্তে প্রস্তুত আছি—শুদ্ধ আপনার খাতিরে—যদি তিনি এখনও নিরস্ত
হ'ন।

জয়সিংহ। আমি কি একবার তাঁর সঙ্গে সাক্ষাৎ করে' বল্‌বো?

ঔরঞ্জীব। বলে ভাল হয়। আমি আপনার জ্ঞান চিন্তিত। তিনি আপ-
নার বন্ধু বলে' আমি তাঁকে আমার বন্ধু কর্তে চাই! তাঁকে শান্তি দিতে আমার
বড় কষ্ট হবে।

জয়সিংহ। আজ্ঞা, আমি একবার বুঝিয়ে বল্‌ছি!

ঔরঞ্জীব। হাঁ বল্‌বেন। আর এ কথাও জানাবেন যে, তিনি এ যুদ্ধে যদি
কোন পক্ষই না নেন ত আপনার খাতিরে তাঁর সব অপরাধ মার্জ্জনা কর্‌ব, আর
তাকে গুজ্জর হুবা দান কর্তে প্রস্তুত আছি—শুদ্ধ আপনার খাতিরে জান্‌বেন।

জয়সিংহ। জাঁহাপনা উদার!—আমি তাঁকে নিশ্চিত রাজি কর্তে পার্‌কো।

ঔরংজীব। দেখুন—তিনি আপনার বন্ধু! আপনার উচিত তাঁকে রক্ষা করা!

জয়সিংহ। নিশ্চয়ই।

ঔরংজীব। তবে আপনি এখন আসুন মহারাজ! দিল্লি যাত্রা করবার জন্ত প্রস্তুত হোন!

জয়সিংহ। যে আজ্ঞা।

প্রস্থান

ঔরংজীব। “শুধু আপনার খাতিরের।” অভিনয় মন্দ করি নাই! এই রাজপুত্র জাতি বড় সরল, আর ঔদার্যের বশ! আমি সে বিচ্ছাটাও অভ্যাস করছি। বড় ভয়ঙ্কর এ যোগ! সাহা নাবাজ আর যশোবন্ত সিংহ।—আমি কিন্তু প্রধান আশঙ্কা করছি এই মহম্মদকে। তার চেহারা—(খাড়া নাড়িলেন) কম কথা কয়। আমার প্রতি একটা অবিস্থাসের বীজ তার মনে কে বপন করে’ দিয়েছে। জাহানারা কি?—এই যে মহম্মদ!

মহম্মদের প্রবেশ

মহম্মদ। পিতা আমার ডেকেছিলেন?

ঔরংজীব। হাঁ, আমি কাল রাজধানীতে ফিরে যাচ্ছি, তুমি স্বজার অহসরণ করবে। মীরজুমলাকে তোমার সাহায্যে রেখে গেলাম।

মহম্মদ। যে আজ্ঞে পিতা।

ঔরংজীব। আচ্ছা যাও। দাঁড়িয়ে রইলে যে? সে বিষয়ে কিছু বলবার আছে?

মহম্মদ। না পিতা। আপনার আজ্ঞাই যথেষ্ট।

ঔরংজীব। তবে?

মহম্মদ। আমার একটা আর্জি আছে পিতা!

ঔরংজীব। কী!—চূপ করে’ রইলে যে। বল পুত্র!

মহম্মদ। কথাটা অনেক দিন থেকে জিজ্ঞাসা করব’ মনে করছি; কিন্তু এ সংশয় আর বন্ধে চেপে রাখতে পারি না। ঔদ্ধত্য মার্জনা করব’ন।

ঔরংজীব। বল।

মহম্মদ। পিতা! সম্রাট সাজাহান কি বন্দী?

ঔরংজীব। না! কে বলেছে?

মহম্মদ। তবে তাঁকে প্রাসাদে রুদ্ধ করে’ রাখা হয়েছে কেন?

ঔরংজীব। সেরূপ প্রয়োজন হয়েছে।

মহম্মদ। আর ছোট কাকা—তাঁকে এরূপে বন্দী করে’ রাখা কি প্রয়োজন?

ঔরংজীব। হাঁ।

মহম্মদ। আর আপনার এই সিংহাসনে বস।—পিতামহ বর্তমানে?

ঔরংজীব। হাঁ পুত্র!

মহম্মদ। পিতা! (বলিয়াই মুখ নত করিলেন)

ঔরঞ্জীব। পুত্র! রাজনীতি বড় কুট। এ বয়সে তা বুঝতে পারেন না।
সে চেষ্টা করো না।

মহম্মদ। পিতা! ছলে সরল ভ্রাতাকে বন্দী করা, স্নেহময় পিতাকে সিংহাসনচ্যুত করা, আর ধর্মের নামে এসে সেই সিংহাসনে বসা—এর নাম যদি রাজনীতি হয়, তা হ'লে সে রাজনীতি আমার জ্ঞান নয়।

ঔরঞ্জীব। মহম্মদ! তোমার কি কিছু অস্থব্ব করেছে? নিশ্চয়!

মহম্মদ। (কম্পিতস্বরে) না পিতা! আপাততঃ আমার চেয়ে সুস্থকায় ব্যক্তি বোধ হয় ভারতবর্ষে আর কেহই নাই।

ঔরঞ্জীব। তবে!

মহম্মদ নীরব রহিলেন

আমার প্রতি তোমার অটল বিশ্বাস কে বিচলিত করেছে পুত্র?

মহম্মদ। আপনি স্বয়ং।—পিতা! যতদিন সম্ভব আপনাকে আমি বিশ্বাস করে' এসেছি, কিন্তু আর সম্ভব নয়। অবিশ্বাসের বিষে জর্জরিত হয়েছি।

ঔরঞ্জীব। এই তোমার পিতৃভক্তি!—তা হবে। প্রদীপের নীচেই সর্দাপেক্ষা অন্ধকার!

মহম্মদ। পিতৃভক্তি!—পিতা! পিতৃভক্তি কি আজ আমায় আপনার কাছে শিখতে হবে! পিতৃভক্তি!—আপনি আপনার বৃদ্ধ পিতাকে বন্দী করে, তাঁর যে সিংহাসন কেড়ে নিয়েছেন, আমি পিতৃভক্তির খাতিরে সেই সিংহাসন পায় ঠেলে দিয়েছি। পিতৃভক্তি! আমি যদি পিতৃভক্ত না হতাম, ত দিল্লীর সিংহাসনে আজ ঔরঞ্জীব বসতেন না, বসতো এই মহম্মদ!

ঔরঞ্জীব। তা জানি পুত্র! তাই আশ্চর্য হচ্ছি।—পিতৃভক্তি হারিও না বৎস।

মহম্মদ। না আর সম্ভব নয় পিতা! পিতৃভক্তির বড় মহৎ, বড় পবিত্র জিনিস, কিন্তু পিতৃভক্তির উপরেও এমন একটা কিছু আছে, যার কাছে পিতা মাতা ভাতা, সব খর্ব্ব হ'য়ে যায়।

ঔরঞ্জীব। তোমার পিতৃভক্তি হারিও না বলছি পুত্র! জেনো ভবিষ্যতে এই রাজ্য তোমার!

মহম্মদ। আমায় রাজ্যের লোভ দেখাচ্ছেন পিতা? বলি নাই যে, কর্তব্যের জ্ঞান ভারত সাম্রাজ্যটা আমি লোষ্ট্রখণ্ডের মত দূরে নিক্ষেপ করেছি? পিতামহ সেদিন এই রাজ্যের লোভ দেখাচ্ছিলেন, আপনি আজ আবার এই রাজ্যের লোভ দেখাচ্ছেন? হায়! পৃথিবীতে সাম্রাজ্য কি এতই মহার্ঘ? আর বিবেক কি এতই স্থলভ? সাম্রাজ্যের জ্ঞান বিবেক খোঁচাবো? পিতা! আপনি বিবেক বর্জন করে' সাম্রাজ্য লাভ করেছেন, সে সাম্রাজ্য কি পরকালে নিয়ে যেতে পারেন? কিন্তু এই বিবেকটুকু বর্জন না কলে' সঙ্গে যেত।

ঔরংজীব। মহম্মদ!

মহম্মদ। পিতা!

ঔরংজীব। এর অর্থ কি?

মহম্মদ। এর অর্থ এই যে, আমি যে আপনার জন্ত সব হারিয়ে বসে আছি, সেই আপনাকেও আজ আর হৃদয়ের মধ্যে খুঁজে পাচ্ছি না—বুঝি তাও হারালাম। আজ আমার মত দরিদ্র কে! আর আপনি—আপনি এই ভারত-সাম্রাজ্য পেয়েছেন বটে! কিন্তু তার চেয়ে বড় সাম্রাজ্য আজ হারালেন।

ঔরংজীব। সে সাম্রাজ্য কি?

মহম্মদ। আমার পিতৃভক্তি! সে যে কি রত্ন, সে যে কি সম্পদ—কি যে হারালেন—আজ আর বুঝতে পাচ্ছেন না। একদিন পার্বেঁন বোধ হয়।

প্রস্থান

ঔরংজীব ধীরে ধীরে অপর দিকে প্রস্থান করিলেন

ষষ্ঠ দৃশ্য

স্থান—যোধপুরের প্রাসাদ-কক্ষ। কাল—মধ্যাহ্ন

যশোবন্ত সিংহ ও জয়সিংহ

জয়সিংহ। কিন্তু এই রক্তপাতে লাভ?

যশোবন্ত। লাভ? লাভ কিছু নাই।

জয়সিংহ। তবে কেন বুঝা রক্তপাত! যখন ঔরংজীবের এ যুদ্ধে জয় হবেই!

যশোবন্ত। কে জানে!

জয়সিংহ। ঔরংজীবকে কখন কোন যুদ্ধে পরাজিত হ'তে দেখেছেন কি?

যশোবন্ত। না ঔরংজীব বীর বটে! সেদিন আমি তাকে নর্মদা যুদ্ধক্ষেত্রে অশ্রাব্ধ দেখেছিলাম মনে আছে—সে দৃশ্য আমি জীবনে কখন ভুলবো না—মৌন তীক্ষ্ণদৃষ্টি, জ্রুটিকুটিল—তার চারিদিক দিয়ে তার গোলাগুলি ছুটে যাচ্ছে, তার দিকে দৃকপাত নাই। আমি তখন বিদ্বেষে ফেটে মরে' যাচ্ছি কিন্তু অন্তরে তাকে সাধুবাদ না দিয়ে থাকতে পারলাম না।—ঔরংজীব বীর বটে!

জয়সিংহ। তবে?

যশোবন্ত। তবে আমি খিজুরার আপমানের প্রতিশোধ চাই।

জয়সিংহ। সে প্রতিশোধ ত আপনি তাঁর শিবির লুট করে' নিয়েছেন।

যশোবন্ত। না সম্পূর্ণ হয় নি! কারণ, ঔরংজীবের সেই শূন্য ভাণ্ডার পূর্ণ কর্তে কতক্ষণ! যদি লুট করে' চলে' না এসে স্বজার সঙ্গে যোগ দিতাম তাহ'লে খিজুরা-যুদ্ধে স্বজার পরাজয় হত না। কিংবা যদি আগ্রায় এসে সম্রাট সাজাহানকে মুক্ত করে দিতাম!—কি ভ্রমই হয়ে গিয়েছিল!

জয়সিংহ। কিন্তু তা'তে আপনার কি লাভ হোত? সম্রাট দারা হৌন, স্বজা হৌন বা ঔরংজীব হৌন—আপনার কি?

বশোবস্ত । প্রতিশোধ!—আমি তাদের সব বিষচক্ষে দেখি; কিন্তু সব চেয়ে বিষচক্ষে দেখি—এই খল ঔরংজীবকে ।

জয়সিংহ । তবে আপনি খিজুয়া-যুদ্ধে তাঁ'র সঙ্গে যোগ দিয়েছিলেন কেন ?

বশোবস্ত । সেদিন দিল্লীর রাজসভায় তা'র সমস্ত কথায় বিশ্বাস করেছিলাম । হঠাৎ এমন মহত্বের ভাণ করলে, এমন ত্যাগের অভিনয় করলে, এমন আন্তরিক দৈন্ত আবিষ্কার করে'বে আমি চমৎকৃত হ'য়ে গেলাম ! ভাবলাম—‘এ কি ! আমার আজন্ম ধারণা, আমার প্রকৃতিগত বিশ্বাস কি সব ভুল ! এমন ত্যাগী, মহৎ, উদার, ধার্মিক মানুষকে আমি পাপী কল্পনা করেছিলাম !’ এমন ভোজ-বাকী খেলে—যে সর্বপ্রথম আমিই চোঁচিয়ে উঠলাম, “জয় ঔরংজীবের জয় !” তা'র সেনানিকার জয় নর্দদা কি খিজুয়া-যুদ্ধ জয়ের চেয়েও অদ্ভূত ; কিন্তু সেদিন খিজুয়া-যুদ্ধক্ষেত্রে আবার আসল মানুষটা দেখলাম—সেই কুট, খল, চক্রী, ঔরংজীব ।

জয়সিংহ । মহারাজ ! খিজুয়া-ক্ষেত্রে আপনার প্রতি রুঢ় আচরণের জন্ত সত্রাট্ট পরে ষথার্থ-ই অহুতপ্ত হয়েছিলেন !

বশোবস্ত । এই কথা আমার বিশ্বাস কর্তে বলেন মহারাজ !

জয়সিংহ । কিন্তু সে কথা যাক্ ; সত্রাট্ট তা'র জন্ত আপনার কাছের ক্ষমাও চান না, ভিক্ষাও চান না । তিনি বিবেচনা করেন যে, আপনার আচরণে সে অস্ত্রায়ের শোধ হয়ে গিয়েছে । তিনি আপনার সাহায্য চান না । তিনি চান যে, আপনি দারার পক্ষও নেবেন না, ঔরংজীবের পক্ষও নেবেন না । বিনিময়ে তিনি আপনাকে গুর্জর রাজ্য দিবেন—এইমাত্র । আপনি একটা কল্পিত অস্ত্রায়ের প্রতিশোধ নিতে গিয়ে নিজের শক্তি ক্ষয় করে' ফ্রয় কর্বেন—ঔরংজীবের বিদেষ । আর হাত গুটিয়ে বসে' দেখার বিনিময়ে পাবেন, একটা প্রকাণ্ড উর্কর স্ববা—গুর্জর । বেছে নেন । আপনার সর্বস্ব দিয়ে যদি প্রতিহিংসা নিতে চান—নেন । এ সহজ ব্যবসার কথা, শুদ্ধ কেনা বেচা—দেখুন !

বশোবস্ত । কিন্তু দারা—

জয়সিংহ । দারা আপনার কে ? সেও মুসলমান; ঔরংজীবও মুসলমান । আপনি যদি নিজের দেশের জন্ত যুদ্ধ যেতেন ত আমি কথাটি কইতাম না ! কিন্তু দারা আপনার কে ? আপনি কার জন্ত রাজপুত রক্তপাত কর্তে যাচ্ছেন ? দারাই যদি জয়ী হয়—তাতে আপনারই বা কি লাভ, আপনার জন্মভূমিরই বা কি লাভ !

বশোবস্ত । তবে আহ্ন, আমরা দেশের জন্ত যুদ্ধ করি ! মেবারের রাণা রাজসিংহ, বিকানীরের মহারাজ আপনি, আর আমি যদি মিলিত হই ত এই তিন জনেই যোগল সাম্রাজ্য ফুৎকারে উড়িয়ে দিতে পারি—আহ্ন ।

জয়সিংহ । তারপরে সত্রাট্ট হবেন কে ?

যশোবন্ত । কে! রাণা রাজসিংহ ।

জয়সিংহ । আমি ঔরংজীবের প্রভূষ মান্তে পারি, কিন্তু রাজসিংহের প্রভূষ স্বীকার কর্তে পারি না ।

যশোবন্ত । কেন মহারাজ ? তিনি স্বজাতি বলে ?

জয়সিংহ । তা বৈকি । জাতির দুর্ভাগ্য সইব না ! আমি কোন উচ্চ প্রযুক্তির ভাগ করি না ! সংসার আমার কাছে একটা হাট । যেখানে কম দামে বেশী পাবো, সেইখানেই যাবো । ঔরংজীব কম দামে বেশী দিচ্ছে ! এই ক্রম সম্পৎ ভ্যাগ করে' অনিশ্চিতের মধ্যে যেতে চাই না ।

যশোবন্ত । হঁ !—আচ্ছা মহারাজ আপনি বিশ্রাম করুন গে । আমি ভেবে কাল উত্তর দিব ।

জয়সিংহ । সে উত্তম কথা । ভেবে দেখবেন—এ শুদ্ধ সাংসারিক কেনা বেচা ! আজ আমরা স্বাধীন রাজা না হ'তে পারি, রাজভক্ত প্রজা ত হ'তে পারি । রাজভক্তিও ধর্ম ।

প্রহান

যশোবন্ত । হিন্দুর সাম্রাজ্য কবির স্বপ্ন । হিন্দুর প্রাণ বড়ই শুক, বড়ই হিম হ'য়ে গিয়েছে । আর পরস্পর জোড়া লাগে না । “স্বাধীন রাজা না হ'তে পারি, রাজভক্ত প্রজা ত হ'তে পারি ।” ঠিক বলেছো জয়সিংহ ! কার জগ্ন যুদ্ধ কর্তে যাবো । দারা আমার কে ?—নর্দনার প্রতিশোধ বিজুয়ায় নিয়েছি ।

মহামায়ার প্রবেশ

মহামায়া । একে প্রতিশোধ বল মহারাজ ! আমি এতক্ষণ অন্তরালে দাঁড়িয়ে তোমার এই অপোক্ষ—সমভার নিক্তির আধারের মত এই আন্দোলন দেখছি !—খাসা ! চমৎকার ! বেশ বুঝে গেলে যে প্রতিশোধ নিয়েছো । একে প্রতিশোধ বল মহারাজ ? ঔরংজীবের পক্ষ হ'য়ে তা'র শিবির লুঠ করে' পালানোর নাম প্রতিশোধ ? এর চেয়ে যে পরাজয় ছিল ভালো । এ যে পরাজয়ের উপর পাপের ভার । রাজপুতজাতি যে বিশ্বাসঘাতক হ'তে পারে তা তুমিই এই প্রথম দেখালে !

যশোবন্ত । লুঠ করবার আগে আমি ঔরংজীবের পক্ষ পরিত্যাগ করেছি মহামায়া ।

মহামায়া । আর তা'র পশ্চাতে তা'র সম্পত্তি লুঠ করেছো ।

যশোবন্ত । যুদ্ধ করে' লুঠ করেছি, অপহরণ করি নাই ।

মহামায়া । একে যুদ্ধ বল ?—ধিক্ !

যশোবন্ত । মহামায়া ! তোমার এই ছাড়া কি আর কথা নাই ? দিবারাজ তোমার তিক্ত ভৎসনা শুন্বার জগ্নই কি তোমায় বিবাহ করেছিলাম ?

মহামায়া । নহিলে বিবাহ করেছিলে কেন মহারাজ ?

যশোবন্ত । কেন ! আশ্চর্য প্রশ্ন !—লোকে বিবাহ করে আবার কেন ?

মহামায়া। হাঁ, কেন? সন্তোষের জন্ম? বিলাস-প্রবৃত্তি চরিতার্থ করবার জন্ম? তাই কি?—তাই কি?

যশোবন্ত। (ঈষৎ ইতস্ততঃ করিয়া) হাঁ—এক রকম তাই বলতে হবে বৈকি।

মহামায়া। তবে একজন গণিকা রাখো না কেন?

যশোবন্ত। ঝড় উঠছে বুঝি!

মহামায়া। মহারাজ! যদি তোমার পাশব প্রবৃত্তি চরিতার্থ কর্তে চাও, যদি কামের সেবা করতে চাও ত তার স্থান কুলাঙ্গনার পবিত্র অন্তঃপুর নয়—তার স্থান বারাক্‌দনার সজ্জিত নরক। সেইখানে যাও। তুমি রৌপ্য দিবে সে রূপ দিবে। তুমি তার কাছে যাবে লালসার তাড়নায় আর সে তোমার কাছে আসবে ভঠরের জালায়। স্বামী-স্ত্রীর সে সঙ্ঘ নয়।

যশোবন্ত। তবে?

মহামায়া। স্বামী-স্ত্রীর সঙ্ঘ ভালোবাসার সঙ্ঘ। সে যেমন তেমন ভালোবাসা নয়। সে ভালোবাসা প্রিয়জনকে দিন দিন হেয় করে না, দিন দিন প্রিয়তম করে, সে ভালোবাসা নিজের চিন্তা ভুলে যায়, আর তা'র দেবতার চরণে আপনাকে বলি দেয়, সে ভালোবাসা প্রভাত সূর্য্যরশ্মির মত যার উপরে পড়ে তাকেই স্বর্ণ-বর্ণ করে' দেয়, ভাগীরথীর বারিরাশির মত যার উপরে পড়ে তাকেই পবিত্র করে' দেয়, দেবতার বরের মত যার উপরে পড়ে তাকেই ভাগ্যবান করে—এ সেই ভালোবাসা; অচঞ্চল, অহুদ্বিগ্ন, আনন্দময়—কারণ, উৎসর্গময়।

যশোবন্ত। তুমি আমাকে কি রকম ভালোবাসো মহামায়া?

মহামায়া। বাসি! তোমার গৌরব কোলে করে' আমি মর্ত্তে পারি—তা'র জন্ম আমার এত চিন্তা, এত আগ্রহ যে, সে গৌরব ব্লান হ'য়ে গেছে দেখবার আগে আমার ইচ্ছা হয় যেন আমি অন্ধ হ'য়ে যাই! রাজপুত-জাতির গৌরব—মাড়বারের গৌরব তোমার হাতে নিঃস্ব হয়ে যাচ্ছে দেখবার আগে আমি মর্ত্তে চাই! আমি তোমায় এত ভালোবাসি।

যশোবন্ত। মহামায়া!

মহামায়া। চেয়ে দেখ—ঐ রৌদ্রদীপ্ত গিরিশ্রেণী—দূরে ঐ ধূসর বালু-স্তূপ। চেয়ে দেখ—ঐ পর্কৃতশ্রোতস্বতী—যেন সৌন্দর্য্যে কাঁপুচ্ছে। চেয়ে দেখ—ঐ নীল আকাশ যেন সে নীলিমা নিংড়ে বার করছে! ঐ ঘুঘুর ডাক শোন; আর সঙ্গে সঙ্গে ভাবো যে এই স্থানে একদিন দেবতারা বাস করতেন। মাড়বার আর মেবার বীরেশ্বর সমজপুত্র; মহেশ্বর নৈশাকাশে বৃহস্পতি ও শুক্র তারা। ধীরে ধীরে সে মহিমার সমারোহ আমার সম্মুখ দিয়ে চলে' যাচ্ছে। এসো চারণ-বালকগণ। গাও সেই গান।

যশোবন্ত। মহামায়া!

মহামায়া। কথা কয়ো না। ঐ ইচ্ছা যখন আমার মনে আসে আমার মনে হয় যে তখন আমার পূজার সময়! শব্দ ঘণ্টা বাজাও; কথা কয়ো না।

বশোবস্ত। নিশ্চয় মস্তিষ্কের কোন রোগ আছে!

ধীরে ধীরে চলিরা গেলেন

মহামায়া। কে তুমি সুন্দর, সৌন্দ্য, শাস্ত, আমার সম্মুখে এসে দাঁড়ালে!
(চারণবালকগণের প্রবেশ) গাও বালকগণ! সেই গান গাও—আমার জন্মভূমি।

বালকদিগের প্রবেশ ও গীত—

ধনধান্য পুষ্পভরা আমাদের এই বসুন্ধরা ;
তাহার মাঝে আছে দেশ এক—সকল দেশের সেরা ;
ও সে স্বপ্ন দিয়ে তৈরী সে দেশ স্মৃতি দিয়ে ঘেরা ,
এমন দেশটি কোথাও খুঁজে পাবে নাক তুমি,
সকল দেশের রাণী সে যে—আমার জন্মভূমি ।
চন্দ্র সূর্য্য গ্রহ তারা, কোথায় উজল এমন ধারা !
কোথায় এমন খেলে তড়িত এমন কালো মেঘে !
তার পাখীর ডাকে ঘুমিয়ে উঠি, পাখীর ডাকে জেগে—
এমন দেশটি—ইত্যাদি—
এমন সিন্ধু নদী কাহার, কোথায় এমন ধূত্র পাহাড় ।
কোথায় এমন হরিৎক্ষেত্র আকাশ তলে মেঘে ।
এমন ধানের উপর চেউ খেলে যায় বাতাস কাহার দেশে ।
এমন দেশটি—ইত্যাদি—
পুষ্পে পুষ্পে ভরা শাখী ; কুঞ্জে কুঞ্জে গাহে পাখী,
গুঞ্জরিয়া আসে অলি পুঞ্জে পুঞ্জে ধেয়ে—
তা'রা ফুলের উপর ঘুমিয়ে পড়ে ফুলের মধু খেয়ে !
ভায়ের মায়ের এত স্নেহ কোথায় গেলে পাবে কেহ ?
—ওমা তোমার চরণ দু'টি বন্ধে আমার ধরি'
আমার এই দেশেতে জন্ম—যেন এই দেশেতে মরি—
এমন দেশটি—ইত্যাদি—

চতুর্থ অঙ্ক

প্রথম দৃশ্য

স্থান—টাণ্ডায় সজ্জার প্রাসাদ-কক্ষ। কাল—সন্ধ্যা;
পিয়ারা গাহিতেছিলেন—

সই কেবা শুনাইল শ্রাম নাম !
কানের ভিতর দিয়া মরমে পশিল গো
আকুল করিল মোর প্রাণ।
না জানি কতেক মধু শ্রাম নামে আছে গো,
বদন ছাড়িতে নাহি পারে।
জপিতে জপিতে নাম অবশ করিল গো,
কেমনে পাইব সই তারে।

সজ্জার প্রবেশ

সজ্জা। শুনেছ পিয়ারা, যে দারা ঔরংজীবের কাছে শেষ যুদ্ধেও পরাজিত
হয়েছেন ?

পিয়ারা। হয়েছেন নাকি !

সজ্জা। ঔরংজীবের শস্ত্র তরোয়াল হাতে দারার পক্ষে লড়ে' মারা গিয়েছে
—খুব জমকালো রকম না ?

পিয়ারা। বিশেষ এমন কি !

সজ্জা। নয় ? বৃদ্ধ যোদ্ধা নিজের জামাইএর বিপক্ষে লড়ে' মারা গেল—শুদ্ধ
ধর্মের খাতিরে। সোভানাম্না !

পিয়ারা। এতে আমি 'কেয়াবৎ' পর্যন্ত বলতে রাজি আছি। তা'র উপরে
উঠতে রাজি নই।

সজ্জা। যশোবন্ত সিংহ যদি এবার দারার সঙ্গে সসৈন্তে যোগ দিত—তা দিলে
না। দারাকে সাহায্য কর্তে স্বীকৃত হ'য়ে শেষে কিনা পিছু হটলে।

পিয়ারা। আশ্চর্য্য ত !

সজ্জা। এতে আশ্চর্য্য হচ্ছ কি পিয়ারা ? এতে আশ্চর্য্য হবার কিছু নাই।

পিয়ারা। নেই নাকি ? আমি ভাবলাম বুঝি আছে; তাই আশ্চর্য্য
হচ্ছিলাম।

সজ্জা। মহারাজ যেমন এই খিজুরা-যুদ্ধে বিশ্বাসঘাতকতা করেছিল, এবার
দারাকে ঠিক সেই রকম প্রতারণা করেছে। এর মধ্যে আবার আশ্চর্য্য কি !

পিয়ারা। তা আর কি—আমি আশ্চর্য্য হচ্ছি—

সজ্জা। আবার আশ্চর্য্য !

পিয়ারা। না না ! তা নয়। আগে শেষ পর্যন্ত শোনই।

সজ্জা। কি ?

পিয়ারা। আমি এই ভেবে আশ্চর্য হচ্ছি—যে আগে আশ্চর্য হচ্ছিলাম কি ভেবে ?

সুজা। আশ্চর্য যদি বল তবে আশ্চর্য হবার ব্যাপার একটা হয়েছে।

পিয়ারা। সেটা হচ্ছে কি ?

সুজা। সেটা হচ্ছে এই যে, ঔরংজীবের পুত্র মহম্মদ, আমার মেয়ের জন্ম তা'র বাপের পক্ষ ছেড়ে আমার পক্ষে যোগ দিল কি ভেবে।

পিয়ারা। তা'র মধ্যে আশ্চর্য কি ! প্রেমের জন্ম লোকে এর চেয়ে অনেক বেশী শক্ত কাজ করেছে। প্রেমের জন্ম লোক পাঁচিল টপ্কেছে, ছাদ থেকে লাফিয়েছে, সাঁতারে নদী পার হয়েছে, আগুনে ঝাঁপ দিয়েছে, বিষ খেয়ে মরেছে ! এটা ত একটা তুচ্ছ ব্যাপার ! বাপকে ছেড়েছে। ভারি কাজ করেছে। ও ত সবাই করে। আমি এতে আশ্চর্য হ'তে রাজি নই।

সুজা। কিন্তু—না—এ বেশ একটু আশ্চর্য ! সে বাহো'ক্ কিন্তু মহম্মদ আর আমি মিলে এবারে ঔরংজীবের সৈন্যকে বঙ্গদেশ থেকে তাড়িয়েছি।

পিয়ারা। তোমার কি যুদ্ধ ভিন্ন কথা নাই ? আমি যত তোমায় ভুলিয়ে রাখতে চাই, তুমি ততই শিষ্ণু তোলা। রাশ মান্তে চাও না।

সুজা। যুদ্ধে একটা বিরাট আনন্দ আছে। তার উপরে—

বান্দীর প্রবেশ

বান্দী। এক ফকির দেখা কর্তে চায় জাঁহাপনা।

পিয়ারা। কি রকম ফকির—লম্বা দাড়ি ?

বান্দী। হাঁ মা ! যে বলে যে বড় দরকার, এক্ষণই !

সুজা ! আচ্ছা এখানেই নিয়ে এসো।—পিয়ারা তুমি ভেতরে যাও।

পিয়ারা। বেশ, তুমি আমায় তাড়িয়ে দিচ্ছ ! বেশ। আমি যাচ্ছি !

প্রস্থান

সুজা। যাও এখানে তাকে পাঠিয়ে দাও।

বান্দীর প্রস্থান

সুজা। পিয়ারা এক হাশ্বের ফোয়ারা—একটা অর্ধশূন্য বাক্যের নদী। এই রকম করে' সে আমাকে যুদ্ধের চিন্তা থেকে ভুলিয়ে রাখে।

দিলদারের প্রবেশ

দিলদার। বন্দেগি সাহাজাদা ! সাহাজাদার একখানি চিঠি !

পত্র প্রদান

সুজা। (পত্র লইয়া খুলিয়া পাঠ) এ কি ! তুমি কোথা থেকে এসেছো ?

দিলদার। পত্রে দস্তখত নেই কি সাহাজাদা !—চেহারা দেখলেই সাহাজাদার বুকি টের পাওয়া যায় ! খুব চাল চেলেছেন।

সুজা। কি চাল ?

দিলদার। সাহাজাদা যে স্বজ্ঞার মেয়ে বিয়ে করে'—উঃ—খুব ফিকির করেছেন। সম্মুখ থেকে তীর মারার চেয়ে পিছন দিক্ থেকে—উঃ! বাপ্কা বেটা কি না।

স্বজ্ঞা। পিছন থেকে তীর মাচ্ছে'কে ?

দিলদার। ভয় কি—আমি কি এ কথা স্বজ্ঞা সুলতানকে বলতে যাচ্ছি। চিঠিটা যেন তাঁকে ভুলে দেখিয়ে ফেলবেন না সাহাজাদা!

স্বজ্ঞা। আরে ছাই আমিই যে সুলতান স্বজ্ঞা ; মহম্মদ ত আমার জামাই।

দিলদার। বটে! চেহারা ত বেশ যুবা পুরুষের মত রেখেছেন। শুচন—বেশী চালাকী কর্কেঁন না। আপনি যদি মহম্মদ হন যা' বলছি ঠিক বুঝতে পারছেন। আর—যদি সুলতান স্বজ্ঞা হন, তা' যা' বলছি তা'র এক বর্ণও সত্য নয়।

স্বজ্ঞা। আচ্ছা, তুমি এখন যাও। এর বিহিত আমি এখনই কর্ছি—তুমি বিশ্রাম করগে যাও।

দিলদার। যে

দিলদারের প্রস্থান

স্বজ্ঞা। এ ত মহাসম্রাট পড়্লাম! বাহিরের শত্রুর জালায়ই অস্থির। তার উপর ঔরঞ্জীব আবার ঘরে শত্রু লাগিয়েছে, কিন্তু যাবে কোথায়! হাতে হাতে ব্যবস্থা কর্ছি। ভাগ্যিস এই পত্র আমার হাতে পড়েছিল—এই যে মহম্মদ!

মহম্মদের প্রবেশ

স্বজ্ঞা। মহম্মদ! পড় এই পত্র।

মহম্মদ। (পড়িয়া) এ কি! এ কার পত্র?

স্বজ্ঞা। তোমার পিতার! স্বাক্ষর দেখছো না? তুমি ঈশ্বরকে সাক্ষী করে' তাঁকে পত্র লিখেছিলে যে, তুমি যে তোমার পিতার বিরুদ্ধাচরণ করছো, সে অন্যায় তোমার স্বপ্তরের অর্থ' আমার প্রতি শাঠ্য দিয়ে পরিশোধ কর্কেঁ।

মহম্মদ। আমি তাঁকে কোন পত্রই লিখি নি। এ কপট পত্র।

স্বজ্ঞা। বিশ্বাস কর্কেঁ পার্লাম না! তুমি আজই এই দণ্ডে আমার বাড়ি পরিত্যাগ কর।

মহম্মদ। সে কি! কোথায় যাবো?

স্বজ্ঞা। তোমার পিতার কাছে।

মহম্মদ। কিন্তু আমি শপথ কর্ছি—

স্বজ্ঞা। না, ঢের হয়েছে—আমি সম্মুখ যুদ্ধে পারি কি হারি—সে স্বতন্ত্র কথা। ঘরে শত্রু পুষতে পারি না।

মহম্মদ। আমি—

স্বজ্ঞা। কোন কথা শুনে চাই না। যাও, এখন যাও।

মহম্মদের প্রস্থান

সুজা। হাতে হাতে ব্যবস্থা করেছি। ভারি বুদ্ধি করেছিলে দাদা; কিন্তু যাবে কোথায়! তুমি বেড়াও ভালে ভালে, আর আমি বেড়াই পাতায় পাতায়!—এই যে পিয়ারা।

পিয়ারার প্রবেশ

সুজা। পিয়ারা! ধরে' ফেলেছি।

পিয়ারা। কাকে?

সুজা। মহম্মদকে। বেটা মতলব ফেঁদে এসেছিল। তোমাকে এখন বলছিলাম না যে, এ বেশ একটু খটকা! এখন সেটা বোঝা যাচ্ছে। জলের মত সাফ হ'য়ে গিয়েছে। তাকে বাড়ী থেকে তাড়িয়ে দিয়েছি!

পিয়ারা। কাকে?

সুজা। মহম্মদকে।

পিয়ারা। সে কি?

সুজা। বাইরে শত্রু, ঘরে শত্রু—ধন্য ভায়া—বুদ্ধি করেছিলে বটে! কিন্তু পালেনা। ভারি ধরেছি!—এই দেখ পত্র!

পিয়ারা। (পত্র পড়িয়া) তোমার মাথা ধরাপ হয়েছে! হাকিম দেখাও।

সুজা। কেন?

পিয়ারা। এ ছল—কপট পত্র বুঝতে পারছি না? ঔরংজীবের ছল। এইটে বুঝতে পারছি না?

সুজা। না, সেটা ঠিক বুঝতে পারছি নে।

পিয়ারা। এই বুদ্ধি নিয়ে তুমি গিয়েছো—ঔরংজীবের সঙ্গে যুদ্ধ কর্তে! হেলে ধর্তে পার না, কেউটে ধর্তে যাও। তা' আমাকে একবার জিজ্ঞাসাও করলে না; জামাইকে দিলে তাড়িয়ে! চল, এখন মেয়ে জামাইকে বোঝাইগে।

সুজা। পত্র কপট? তাই নাকি? কৈ তা ত তুমি বললে না—তা সাবধান হওয়া ভাল।

পিয়ারা। তাই জামাইকে দিলে তাড়িয়ে!

সুজা। তাই ত! তা হ'লে ভারি ভুল হ'য়ে গিয়েছে বলতে হবে। যা' হোক শোন এক ফিকির করেছি। মেয়েকে তার সঙ্গে দিচ্ছি! আর যথারীতি যৌতুক দিচ্ছি! দিয়ে মেয়েকে তার সঙ্গে খন্ডরবাড়ী পাঠাচ্ছি, এতে দোষ নাই। ভয় কি—চল জামাইকে তাই বুঝিয়ে বলি। তাই বলে' তাকে বিদায় দেই।

পিয়ারা। কিন্তু বিদায় দেবে কেন?

সুজা। সময় ধরাপ। সাবধান হওয়া ভাল। বোঝ না—চল বোঝাইগে।

দ্বিতীয় দৃশ্য

স্থান—জিহন খাঁর গৃহে দরবার-কক্ষ । কাল—রাত্রি
সিপার ও জহরৎ দণ্ডায়মান

জহরৎ । সিপার !

সিপার । কি জহরৎ !

জহরৎ । দেখ্‌ছো !

সিপার । কি !

জহরৎ । যে আমরা এই রকম বস্ত্র জঙ্ঘর মত বন হ'তে বনাঙ্করে প্রতাড়িত ; হত্যাকারীর মত এক গহ্বর থেকে পালিয়ে আর এক গহ্বরে গিয়ে মাথা লুকোচ্ছি ; পথের ভিখারীর মত এক গৃহস্থের দ্বারে পদাহত হ'য়ে আর এক গৃহস্থের দ্বারে মুষ্টিভিক্ষা কুড়িয়ে বেড়াচ্ছি ।—দেখ্‌ছো ?

সিপার । দেখ্‌ছি ; কিন্তু উপায় কি ?

জহরৎ । উপায় কি ? পুরুষ তুমি—স্থির স্বরে বল্‌ছো “উপায় কি ?” আমি যদি পুরুষ হতাম, ত এর উপায় কর্তাম ।

সিপার । কি উপায় কর্তে ?

জহরৎ । (ছোঁরা বাহির করিয়া) এই ছোঁরা নিয়ে গিয়ে দস্যু গুঁরংজীবের বৃকে বসিয়ে দিতাম ।

সিপার । হত্যা !

জহরৎ । ই্যা হত্যা ; চম্কে উঠলে যে ?—হত্যা । নাও এই ছোঁরা, দিল্লী যাও । তুমি বালক, তোমায় কেউ সন্দেহ কর্বে না—যাও !

সিপার । কখন না । হত্যা কর্বে না ।

জহরৎ । ভীৰু ! দেখ্‌ছো—মা মর্ছেন ! দেখ্‌ছো—বাবা উন্মাদের মত হ'য়ে গিয়েছেন । বসে' বসে' দেখ্‌ছো !

সিপার । কি কর্বে !

জহরৎ । কাপুরুষ !

সিপার । আমি কাপুরুষ নই জহরৎ ! আমি যুদ্ধক্ষেত্রে পিতার পার্শ্বে হস্তিপৃষ্ঠে বসে' যুদ্ধ করেছি । প্রাণের ভয় করি না ; কিন্তু হত্যা কর্বে না ।

জহরৎ । উত্তম !

প্রহান

সিপার । এ নিষ্ফল ক্রোধ ভয়ি ! কোন উপায় নাই !

প্রহান

তৃতীয় দৃশ্য

স্থান—নাদিরার কক্ষ । কাল—রাত্রি

খটাঙ্গের উপর নাদিরা শয়ান । পার্শ্বে দারা—অস্ত্র পার্শ্বে সিপার ও জহরৎ

দারা । নাদিরা ! সংসার আমাদেরকে পরিত্যাগ করেছে—ঈশ্বর আমাদের

পরিত্যাগ করেছেন। এক তুমি আমার এতদিন পরিত্যাগ কর নাই। তুমিও আমার ছেড়ে চলে!

নাদিরা। আমার জগৎ অনেক সহ করেছ নাথ! আর—

দারা। নাদিরা! দুঃখের জ্বালায় ক্ষিপ্ত হ'য়ে তোমায় অনেক কুবাক্য বলেছি—

নাদিরা। নাথ! তোমার দুঃখের সঙ্গিনী হওয়াই আমার পরম গৌরব। সে গৌরবের স্মৃতি নিয়ে আমি পরলোকে চললাম—সিপার—বাবা! মা—জহরৎ! আমি যাচ্ছি—

সিপার। তুমি কোথায় যাচ্ছ মা?

নাদিরা। কোথায় যাচ্ছি তা আমি জানি না। তবে যেখানে যাচ্ছি সেখানে বোধ হয় কোন দুঃখ নাট—ক্ষুধা তৃষ্ণার জ্বালা নাই, রোগ তাপ নাই, দ্বেষ ঘৃণা নাই।

সিপার। তবে আমরাও সেখানে যাবো মা—চল বাবা! আর সহ্য হয় না।

নাদিরা। আর কষ্ট পেতে হবে না বাছা। তোমরা জিহ্না খাঁর আশ্রয়ে এসেছো! আর দুঃখ নাই।

সিপার। এই জিহ্না খাঁ কে বাবা?

দারা। আমার একজন পুরাতন বন্ধু।

নাদিরা। তাঁকে তোমার বাবা ছ'বার মৃত্যু থেকে বাঁচিয়েছিলেন। তিনি তোমাদের আদর যত্ন কর্ছেন।

সিপার। কিন্তু আমি তাকে কখনও ভালোবাসবো না।

দারা। কেন সিপার?

সিপার। তা'র চেহারা ভাল নয়। এখনই সে তা'র এক চাকরকে ফিস্-ফিস্ করে কি বলছিল—আর আমার দিকে এ রকম চোরা চাহনি চাচ্ছিল—যে আমার বড় ভয় কর্ণ মা। আমি ছুটে তোমার কাছে পালিয়ে এলাম।

দারা। সিপার সত্য বলেছে নাদিরা! জিহ্নার মুখে একটা কুটিল হাসি দেখেছি, তা'র চক্ষে একটা হিংস্র দীপ্তি দেখেছি, তা'র নিম্নস্বরে বোধ হচ্ছিল যেন সে একখানা ছোরা শানাচ্ছে। সেদিন যখন সে আমার পদতলে পড়ে' তার প্রাণভিক্ষা চেয়েছিল, তখন সে চেহারা এক রকমের; আর এ আর এক রকমের চেহারা। এ চাহনি, এ স্বর, এ ভঙ্গিমা—আমার অপরিচিত।

নাদিরা। তবু তাকে তুমি ছ'বার বাঁচিয়েছিলে। সে মাহুষ ত, সর্প ত নয়।

দারা। মাহুষকে আর বিশ্বাস নেই নাদিরা! দেখছি সে সর্পের চেয়েও খল হয়। তবে মাঝে মাঝে—কি নাদিরা! বড় যত্নগা হচ্ছে!

নাদিরা। না, কিছু না! আমি তোমার কাছে আছি। তোমার স্নেহ দৃষ্টির অনুরোধে সব যত্নগা গলে যাচ্ছে; কিন্তু আমার আর সময় নেই—তোমার

হাতে সিপারকে সঁপে দিয়ে গেলাম—দেখো !—পুত্র সোলেমানের সঙ্গে—আর
দেখা হ'লো না—ঈশ্বর ! (মৃত্যু)

দারা। নাদিরা! নাদিরা!—না। সব হিম স্তব্ধ!

সিপার। মা! মা!

দারা। দীপ নির্বাণ হয়েছে।

জহরৎ নিজের বক্ষ সবলে চাপিয়া উদ্ধৃদিকে একদৃষ্টে চাহিয়া রহিল।
চারিজন সৈনিক সহ জিহন খাঁর প্রবেশ

দারা। কে তোমরা; এ সময় এ স্থানে এসে কলুষিত কর?

জিহন। বন্দী কর।

দারা। কি! আমায় বন্দী করবে জিহন খাঁ!

সিপার। (দেওয়াল হইতে তরবারি লইয়া) কার সাধ্য?

দারা। সিপার তরবারি রাখো!—এ বড় পবিত্র মুহূর্ত; এ মহাপুণ্য তীর্থ!
এখনও নাদিরার আত্মা এখানে পক্ষ গুটিয়ে আছে—পৃথিবীর স্রষ্ট্রঃখ থেকে
বিদায় নেবার পূর্বে একবার চারিদিকে চেয়ে শেষ দেখা দেখে নিচ্ছে। এখনও
স্বর্গ থেকে দেবীরা তা'কে সেখানে নিয়ে যাবার জন্তে এসে পৌঁছে নি! তা'কে
ত্যক্ত করো না—আমায় বন্দী কর্তে চাও জিহন খাঁ?

জিহন। হাঁ সাহাজাদা।

দারা। গুরংজীবের আজায় বোধ হয়!

জিহন। হাঁ সাহাজাদা।

দারা। নাদিরা! তুমি শুভে পাচ্ছ না তা! তা হ'লে স্বণায় তোমার
মৃতদেহ নড়ে উঠবে, তুমি নাকি ঈশ্বরকে বড় বিশ্বাস কর্তে!

জিহন। এ'কে শৃঙ্খল দিয়ে বাঁধো। যদি কোন বাধা দেন ত তরবারি
ব্যবহার কর্তে দ্বিধা করবে না।

দারা। আমি বাধা দিচ্ছি না। আমায় বাঁধো। আমি কিছু আশ্রয় হচ্ছি
না। আমি এইরূপই একটা কিছু প্রত্যাশা করে' আস'ছিলাম। অস্ত্রে হয়ত
অগ্ররূপ আশা কর্তে। অস্ত্রে হয়ত ভাব'তো যে এ কত বড় কৃতজ্ঞতা যে, যাকে
আমি দু'বার বাঁচিয়েছি, সে আমায় কপট আশ্রয় দিয়ে বন্দী করে—এ কত বড়
নৃশংসতা। আমি তা ভাবি না। আমি জানি জগতে সব—সব উচ্চ প্রবৃত্তি সাপের
ভয়ে মাটির মধ্যে মাথা লুকিয়ে ফুঁপিয়ে কাঁদছে—উপর দিকে চোখ তুলে চাইতেও
সাহস কর্তে না। আমি জানি পৃথিবীতে ধর্ম এখন স্বার্থসিদ্ধি, নীতি—শাঠ্য,
পূজা—খোসামোদ, কর্তব্য—জোচ্চোরি। উচ্চ প্রবৃত্তিগুলো এখন বড় পুরাতন
হ'য়ে গিয়েছে। সত্যতার আলোকে ধর্মের অন্ধকার সরে গিয়েছে! সে ধর্ম
-যা কিছু আছে এখন বোধ হয় কৃষকের কুটির, ভীল কোল মুণ্ডাদের অসভ্যতার
মধ্যে—কর জিহন খাঁ, আমায় বন্দী কর।

সিপার। তবে আমায়ও বন্দী কর।

জিহন। তোমায়ও ছাড়ু'চি না সাহাজাদা! সম্রাটের কাছে প্রচুর-
পুরস্কার পাব।

দারা। পাবে বৈকি! এত বড় কৃতজ্ঞতার দাম পাবে না? তাও কখনও
হয়? প্রচুর অর্থ পাবে। আমি কল্পনায় তোমার সেই দীপ্ত মুখখানি দেখতে
পাচ্ছি। কি আনন্দ!—প্রচুর অর্থ পাবে! সজ্জ করে' পরকালে নিয়ে যেও।

জিহন। তবে আর কি—বন্দী কর।

দারা। কর।—শা এখানে না! বাইরে চল! এ স্বর্গে নরকের অভিনয় কেন!
এত বড় অভিনয় এখানে! মা বহুস্করা! এতখানি বহন করছ! নীরবে সহ করছ
দেখর! হাত দু'খানি গুটিয়ে বেশ এই সব দেখু'ছো—চল জিহন থা, বাইরে চল।

সকলে যাইতে উত্তত

দারা। দাঁড়াও, একটা অহুরোধ করে' যাই জিহন থা! রাখ'বে কি?
জিহন থা, এই দেবীর মৃতদেহ লাহোরে পাঠিয়ে দিও! সেখানে সম্রাট পরিবারের
কবর ভূমিতে যেন তাকে গোর দেওয়া হয়। দেবে কি? আমি তোমাকে
দু'বার বাঁচিয়েছি বলেই এ দান ভিক্ষা চাইছি। নৈলে এতটুকুও তোমার কাছে
চাইতে পার্তাম না—দেবে কি?

জিহন। যে আঞ্জো যুবরাজ! এ কাজ না করলে আমার প্রভু ঔরংজীব যে
জুক হবেন!

দারা। তোমার প্রভু ঔরংজীব! হুঁ—আমার আর কোন ক্ষোভ নাই!
চল—(ফিরিয়া) নাদিরা!

এই বলিয়া দারা ফিরিয়া আসিয়া সহসা নাদিরার শয্যাপার্শ্বে জাহু পাতিয়া বসিয়া
হস্তদ্বয়ের উপর মুখ ঢাকিলেন, পরে উঠিয়া জিহন থাকে কহিলেন—

চল জিহন থা!

সকলে বাহিরে চলিলেন। সিপার নাদিরার মৃতদেহের প্রতি চাহিয়া কাঁদিয়া ফেলিল
দারা (ক্রুদ্ধভাবে) সিপার!

সিপারের রোদন ভয়ে খামিয়া গেল। সকলে নারবে বাহিরে চলিয়া গেলেন

চতুর্থ দৃশ্য

স্থান—যোধপুরের প্রাসাদ। কাল—সায়াহ

যশোবন্ত সিংহ ও মহামায়া দণ্ডায়মান

মহামায়া। হতভাগ্য দারার প্রতি কৃতজ্ঞতার পুরস্কার স্বরূপ গুর্জর প্রদেশ
পেয়ে সন্তুষ্ট আছো ত মহারাজ?

যশোবন্ত। তাতে আমার অপরাধ কি মহামায়া?

মহামায়া। না অপরাধ কি? এ তোমার মহৎ সন্মান, পরম গৌরব।

যশোবন্ত। গৌরব না হ'তে পারে, তবে, তার মধ্যে অগ্রায় আমি কিছু দেখি নি। দারার সঙ্গে যোগ দেওয়া না দেওয়া আমার ইচ্ছা অনিচ্ছা। দারা আমার কে ?

মহামায়া। আর কেউ নয়—প্রভু মাত্র !

যশোবন্ত। প্রভু ! এককালে ছিলেন বটে ; আর কেউ নয়।

মহামায়া। সত্যই ত ! দারা আজ নিয়তিচক্রের নীচে, ভাগ্যের লাক্ষিত, মানবের বিকৃত। আর তাঁ'র সঙ্গে তোমার সম্বন্ধ কি ? দারা তোমার প্রভু ছিলেন—যখন তিনি পুরস্কার দিতে পার্তেন, বেত্রাঘাত কর্তে পার্তেন।

যশোবন্ত। আমাকে !

মহামায়া। হায় মহারাজ ! 'ছিলেন' এর কি কোন মূল্য নাই ? অতীতকে কি একেবারে লুপ্ত করে' দিতে পারো ? বর্তমান থেকে একেবারে কি তাকে বিচ্ছিন্ন করে' দিতে পারো ? একদিন যিনি তোমার দয়াল প্রভু ছিলেন, আজ তোমার কাছে কি তাঁ'র কোন মূল্য নাই ? ধিক !

যশোবন্ত। মহামায়া ! তোমার সঙ্গে আমার তর্ক কর্তার সম্বন্ধ নয়। আমি যা উচিত বিবেচনা করছি তাই করে' যাচ্ছি। তোমার কাছে উপদেশ চাই না।

মহামায়া। তা চাইবে কেন ? যুদ্ধে পরাজিত হ'য়ে ফিরে এসে, বিশ্বাসঘাতক হয়ে ফিরে এসে, কৃতঘ্ন হয়ে ফিরে এসে—তুমি চাও, আমার ভক্তি ! না ?

যশোবন্ত। সে কি বড় বেশী প্রত্যাশা মহামায়া !

মহামায়া। না সম্পূর্ণ স্বাভাবিক। ক্ষত্রিয় বীর তুমি—ক্ষত্রকূলের অবমাননা করেছে ! জানো সমস্ত রাজপুতনা তোমায় ধিক্কার দিচ্ছে। বল্ছে যে ঔরংজীবের খত্তর সাহ নাবাজ দারার পক্ষ হ'য়ে তা'র জামাতার বিপক্ষে যুদ্ধ করে' মৃত্যুকে আলিঙ্গন কর্ন, আর তুমি দারাকে আশা দিয়ে শেষে কাপুরুষের মত সরে দাঁড়ালে।—হায় স্বামী ! কি বলবো, তোমার এই অপমানে আমার শিরায় অগ্নিশ্রোত ব'য়ে যাচ্ছে, কিন্তু সে অপমান তোমাকে স্পর্শও কর্ছে না ! আশ্চর্য্য বটে !

যশোবন্ত। মহামায়া—

মহামায়া। আর কেন ! যাও তোমার নূতন প্রভু ঔরংজীবের কাছে যাও।

সরোবে প্রস্থান

যশোবন্ত। উত্তম ! তাই হবে। এতদূর অবজ্ঞা ! বেশ তাই হবে।

প্রস্থান

পঞ্চম দৃশ্য

স্থান—আগ্রার প্রাসাদে সাজাহানের কক্ষ। কাল—রাত্রি

সাজাহান ও জাহানারা

সাজাহান। আবার কি দুঃসংবাদ কন্যা। আর কি বাকি আছে ? দারা

আবার পরাজিত হয়ে বাথরের দিকে পালিয়েছে। সূজা বন্য আরাকানের রাজার গৃহে সপরিবারে ভিক্ষুক! মোরাদ গোয়ালিয়র দুর্গে বন্দী। আর কি দুঃসংবাদ দিতে পারো কন্যা?

জাহানারা। বাবা! এ আমারই দুর্ভাগ্য যে আমিই আপনার নিকট রোজ দুঃসংবাদের বস্ত্র বহে' আনি; কিন্তু কি করি বাবা! দুর্ভাগ্য একা আসে না!

সাজাহান। বল। আর কি?

জাহানারা। বাবা, ভাই দারা ধরা পড়েছে।

সাজাহান। ধরা পড়েছে?—কি রকমে ধরা পড়লো?

জাহানারা। জিহন খাঁ তাকে ধরিয়ে দিয়েছে।

সাজাহান। জিহন খাঁ! জিহন খাঁ! কি বল্ছিস জাহানারা? জিহন খাঁ!

জাহানারা। হাঁ বাবা।

সাজাহান। পৃথিবীর কি অস্তিম সময় ঘনিয়ে এসেছে!

জাহানারা। শুনলাম, পরশু দারা আর তা'র পুত্র সিপারকে এক ককালসার হাতীর পিঠে বসিয়ে দিল্লীনগর প্রদক্ষিণ করিয়ে আনা হয়েছে! তা'দের পরিধানে ময়লা শাড়া কাপড়। তা'দের এই অবস্থা দেখে সেই রাজপুরীর একটি লোক নেই যে কাঁদেনি।

সাজাহান। তবু তা'দের মধ্যে কেউ দারাকে উদ্ধার কর্তে ছুটলো না? কেবল শশকের মত ঘাড় উঁচু করে' দেখলে? তা'রা কি পাষণ?

জাহানারা। না বাবা! পাষণও উত্তপ্ত হয়। তা'রা পীক। ঔরংজীবের ভাড়া করা বন্দুকগুলি দেখে তা'রা সব ভ্রস্ত; যেন একটা বাত্বকরের মস্তমুণ্ড; কেউ মাথা তুলতে সাহস কর্ছে না। কাঁদছে—তাও মুখ লুকিয়ে—পাছে ঔরংজীব দেখতে পায়।

সাজাহান। তার পর।

জাহানারা। তার পরে ঔরংজীব দারাকে খিজিরাবাদে একটা জঘন্য গৃহে বন্দী করে' রেখেছে।

সাজাহান। আর সিপার আর জহরং?

জাহানারা। সিপার তা'র পিতার সঙ্গ ছাড়ে নি। জহরং এখন ঔরংজীবের অন্তঃপুরে।

সাজাহান। ঔরংজীব এখন দারাকে নিয়ে কি কর্বে জানিস?

জাহানারা। কি কর্বে তা জানি না—কিন্তু—কিন্তু—

সাজাহান। কি জাহানারা!

জাহানারা। যদি তাই করে বাবা!

সাজাহান। কি! কি জাহানারা? মুখ ঢাকছিস্ যে! তা—কি সম্ভব!—ভাই কি ভাইকে হত্যা কর্বে?

জাহানারা। হুপ্। ও কার পদশব্দ। শুভে পেয়েছে!—বাবা আপনি কি

কর্লেন ! কি করলেন !

সাজাহান । কি করেছি ?

জাহানারা । ও কথা উচ্চারণ করলেন !—আর রক্ষা নাই ।

সাজাহান । কেন ?

জাহানারা । হয়ত ঔরংজীব দারাকে হত্যা কর্ত্ত না । হয়ত এত বড় পাতক তারও মনে আসতো না ; কিন্তু আপনি সে কথা তা'র মনে করিয়ে দিলেন ! কি করলেন ! কি করলেন ! সর্বনাশ করেছেন !

সাজাহান । ঔরংজীব ত এখানে নাই । কে শুনেছে ?

জাহানারা । সে নাই, কিন্তু এই দেওয়াল ত আছে, বাতাস ত আছে, এই প্রদীপ ত আছে । আজ সব যে তা'র সঙ্গে যোগ দিয়েছে ? আপনি ভাবছেন যে এ আপনার প্রাসাদ ?—না, ঔরংজীবের পাখাণ হৃদয় ! ভাবছেন এ বাতাস ? তা নয়, এ ঔরংজীবের বিষাক্ত নিশ্বাস ! এ প্রদীপ নয়—এ তা'র চক্ষের জ্বলাদ দৃষ্টি ! এ প্রাসাদে, এ রাজপুরে, এ সাম্রাজ্যে, আপনার আমার একজন বন্ধু আছে ভেবেছেন বাবা ? না নেই ! সব তা'র সঙ্গে যোগ দিয়েছে । সব খোসামুদের দল ! জোঁচোরের দল !—এ কার ছায়া ?

সাজাহান । কে ?

জাহানারা । না কেউ নয় । ওদিকে কি দেখছেন বাবা !

সাজাহান । দেব লাফ ?

জাহানারা । সে কি বাবা !

সাজাহান । দেখি যদি দারাকে রক্ষা কর্ত্তে পারি ।—তাকে তা'রা হত্যা কর্ত্তে যাচ্ছে । আর আমি এখানে নারীর মত, শিশুর মত নিরুপায় । চোখের উপরে এই দেখছি অথচ খাচ্ছি, ঘুমোচ্ছি, বেঁচে রয়েছি, কিছু করছি না ।—দেই লাফ ।

জাহানারা । সে কি বাবা ! এখান থেকে লাফ দিলে যে নিশ্চিত মৃত্যু !

সাজাহান । হ'লেই বা ! দেখি যদি বাঁচতে পারি ।—যদি পারি ।

জাহানারা । বাবা ! আপনি জ্ঞান হারিয়েছেন ? মরে' গেলে আর দারাকে রক্ষা কর্ত্তেন কি করে' ?

সাজাহান । তা বটে ! তা বটে ! আমি মরে' গেলে দারাকে বাঁচাবো কি করে' ? ঠিক বলেছি ! তবে—তবে—আচ্ছা একবার ঔরংজীবকে এখানে নিয়ে আসতে পারিস্ নে জানাহারা ?

জাহানারা । না বাবা, সে আসবে না । নইলে আমি যে নারী—আমি তার সঙ্গে হাতে হাতে লড়ে' দেখ্তাম । সেদিন মুখোমুখি হ'য়ে পড়েছিলাম, কিছু কর্ত্তে পারি নি ; সেই জন্ত আমার পর্যন্ত আর বাইরে যাবার হুকুম নেই । নইলে একবার হাতে হাতে লড়ে' দেখ্তাম ।

সাজাহান । দিই লাফ ! দেবো লাফ ?

লক্ষ প্রদানে উত্তর

জাহানারা। বাবা, উন্নত হবেন না।

সাজাহান। সত্যই ত আমি পাগল হয়ে যাচ্ছি নাকি! নানা না। আমি পাগল হব না! ঈশ্বর! এই শীর্ণ দুর্বল জরাজীর্ণ নেহাতই অসহায় সাজাহানকে দেখ ঈশ্বর! তোমার দয়া হচ্ছে না? দয়া হচ্ছে না? পুত্র পিতাকে বন্দী করে' রেখেছে—যে পুত্র তার ভয়ে একদিন কাঁপতো—এতখানি অবিচার, এতখানি অত্যাচার, এতখানি অস্বাভাবিক ব্যাপার তোমার নিয়মে সৈছে! সৈতে পাচ্ছে! আমি এমন কি পাপ করেছিলাম খোদা—যে আমার নিজের পুত্র—ওঃ!

জাহানারা। একবার যদি এখন তাকে মুখোমুখি পাই তা হ'লে—

দত্তবর্ষণ

সাজাহান। মমতাজ! বড় ভাগ্যবতী তুমি, যে এ মর্মান্বিত দৃশ্য তোমায় দেখতে হচ্ছে না। বড় পুণ্যবতী তুমি, তাই আগেই মরে' গিয়েছো।—
জাহানারা!

জাহানারা। বাবা!

সাজাহান। তোকে আশীর্বাদ করি—

জাহানারা। কি বাবা?

সাজাহান। যেন তোর পুত্র না হয়, শত্রুরও যেন পুত্র না হয়।

এই বলিয়া সাজাহান চলিয়া গেলেন। জাহানারা বিপন্ন দিকে চলিয়া গেলেন।

ষষ্ঠ দৃশ্য

ঔরঞ্জীব একখানি পত্রিকা হস্তে বেড়াইতেছিলেন

ঔরঞ্জীব। এই দারার মৃত্যুদণ্ড!—এ কাজীর বিচার!—আমার অপরাধ কি!—আমি কি—না, কেন—এ বিচার! বিচারকে কলুষিত কর্ব কেন! এ বিচার।

দিলদারের প্রবেশ

দিলদার। এ হত্যা!

ঔরঞ্জীব। (চমকিয়া) কে!—দিলদার!—তুমি এখানে?

দিলদার। আমি ঠিক সময়ে ঠিক জায়গায় আছি জাহাপনা। দেখে নেবেন। আর আমি যদি এখানে না থাকতাম, তা হ'লেও এ হত্যা—

ঔরঞ্জীব। (কম্পিত স্বরে) হত্যা!—না দিলদার এ কাজীর বিচার!

দিলদার। সম্রাট স্পষ্ট কথা বলবো?

ঔরঞ্জীব। বল।

দিলদার। সম্রাট! আপনি হঠাৎ কেঁপে উঠলেন যে! আপনার স্বর যেন শুক বাতাসের উচ্চাসের মত বেরিয়ে এলো। কেন জাহাপনা! সত্য কথা বলবো?

ঔরঞ্জীব। দিলদার!

দিলদার। সত্য কথা—আপনি দারার মৃত্যু চান।

ঔরংজীব। আমি ?

দিলদার। হাঁ—আপনি।

ঔরংজীব। কিন্তু এ কাজীর বিচার।

দিলদার। বিচার! জাঁহাপনা, সে কাজীরা যখন দারার মৃত্যুদণ্ড উচ্চারণ করছিল, তখন তা'রা ঈশ্বরের মুখের দিকে চেয়ে ছিল না। তখন তা'রা জাঁহাপনার সহস্র মুখখানি কল্পনা করছিল, আর সঙ্গে সঙ্গে মনে মনে তাদের গৃহিণীদের নতুন অলঙ্কারের ফর্দ করছিল। বিচার! যেখানে মাথার উপর প্রভুর আরক্ত চক্ষু চেয়ে আছে, সেখানে আবার বিচার! জাঁহাপনা ভাবছেন যে সংসারকে খুব ধাপ্লা দিলেন। সংসার কিন্তু মনে মনে খুব বুঝলো; কেবল ভয়ে কথাটি কইল না! জোর করে' মানুষের বাক্যরোধ কর্তে পারেন, তাকে গলা টিপে মেরে ফেলতে পারেন; কিন্তু কালোকে সাদা কর্তে পারেন না। সংসার জান্বে, ভবিষ্যৎ জান্বে যে বিচারের ছল করে, আপনি দারাকে হত্যা করিয়েছেন—আপনার সিংহাসনকে নিরাপদ করবার জন্ত।

ঔরংজীব। সত্য না কি!—দিলদার তুমি সত্য কথা বলেছো! তুমি আজ দারাকে বাঁচালে। তুমি আমার পুত্র মহম্মদকে ফিরিয়ে দিয়েছো। আজ আমার ভাই দারাকে বাঁচালে! যাও শায়েষ্টা খাঁকে ডেকে দাও।

দিলদারের প্রধান

দারা বাঁচুন, আমায় যদি তা'র জন্ত সিংহাসন দিতে হয় দেব! এতখানি পাপ—যাক, এ মৃত্যুদণ্ড ছিঁড়ে ফেলি—(ছিঁড়িতে উত্তত) না, এখন না। শায়েষ্টা খাঁর সম্মুখে এটা ছিঁড়ে এ মহম্মদকে কাজে লাগাবো—এই যে শায়েষ্টা খাঁ।

শায়েষ্টা খাঁ ও জিহন খাঁর প্রবেশ ও অভিবাदन

সেনাপতি। বিচারে ভাই দারার প্রাণদণ্ড হয়েছে।

জিহন। ঐ বুঝি সেই দণ্ডাজ্ঞা? আমাকে দেন খোদাবন্দ, আমি নিজে কাজ হাসিল করে' আসছি! কাফেরের প্রাণদণ্ড নিজে হাতে দেবার জন্ত আমার হাত স্ফুস্ফুড় করছে। আমায় দেন।

ঔরংজীব। কিন্তু তাঁ'কে মার্জনা করেছি।

শায়েষ্টা। সে কি জাঁহাপনা—এমন শত্রুকে মার্জনা!—আপনার প্রতিদ্বন্দী।

ঔরংজীব। তা জানি। তার জন্তই ত তাঁকে মার্জনা করবার পরম গৌরব অসম্ভব করছি।

শায়েষ্টা। জাঁহাপনা! এ গৌরব ক্রয় কর্তে আপনার সিংহাসনখানি বিক্রয় কর্তে হবে।

ঔরংজীব। যে বাহুবলে এ সিংহাসন অধিকার করেছি, সেই বাহুবলেই তা রক্ষা করব।

শায়েস্তা। জাঁহাপনা! একটা মহাবিপদকে ঘাড়ে করে, সমস্ত জীবন রাজ্য শাসন কর্তে হবে! জানেন সমস্ত প্রজা, সৈন্ত, দারার দিকে? সেদিন দারার জন্ত তা'রা বালকের মত কেঁদেছে; আর জাঁহাপনাকে অভিশাপ দিয়েছে। তা'রা যদি একবার স্বযোগ পায়—

ঔরংজীব। কি রকমে?

শায়েস্তা। জাঁহাপনা দারাকে অষ্ট প্রহর পাহারা দিতে পারেন না। জাঁহাপনা সফরে গেলে সৈন্তগণ যদি কোন দিন কোন স্বযোগে দারাকে মুক্ত করে দেয়—তা হ'লে জাঁহাপনা—বুঝছেন?

ঔরংজীব। বুঝছি।

শায়েস্তা। তার উপর বুদ্ধ সম্রাটও দারার পক্ষে। আর তাঁকে সৈন্তেরা মানে তাদের গুরুর মত, ভালবাসে পিতার মত।

ঔরংজীব। হুঁ, (পরিক্রমণ) না হয় সিংহাসন দেবো।

শায়েস্তা। তবে এত শ্রম করে' তা অধিকার করার প্রয়োজন কি ছিল? পিতাকে সিংহাসনচ্যুত, ভ্রাতাকে বন্দী—বড় বেশী দূর এগিয়েছেন জাঁহাপনা।

ঔরংজীব। কিন্তু—

জিহন। খোদাবন্দ! দারা কাফের! কাফেরকে ক্ষমা করেন আপনি খোদাবন্দ! এই ইসলাম ধর্মের রক্ষার জন্ত আপনি আজ ঐ সিংহাসনে বসেছেন—মনে রাখবেন। ধর্মের মর্যাদা রাখবেন।

ঔরংজীব। সত্য কথা জিহন থা! আমি নিজের প্রতি সব অত্মীয় অবিচার ঘাড় পেতে নিতে পারি, কিন্তু ইসলাম ধর্মের প্রতি অবমাননা সৈব না। শপথ করেছি—হাঁ, দারার মৃত্যুই তার যোগ্য দণ্ড। জিহন আলি থা, নেও মৃত্যুদণ্ড!—রোসো দস্তখৎ করে' দিই। (দস্তখৎ)

জিহন। দিউন জাঁহাপনা! আজ রাজ্যেই দারার ছিন্নমুণ্ড জাঁহাপনাকে এনে দেখাবো—বাহিরে আমার অশ্ব প্রস্তুত।

ঔরংজীব। আজই!

শায়েস্তা। (মৃত্যুদণ্ড ঔরংজীবের হস্ত হইতে লইয়া) আপদ যত শীঘ্র যায় তত ভালো।

জিহনকে দণ্ডাজ্ঞা দিলেন

জিহন। বন্দেগি জাঁহাপনা।

প্রহানোত্ত

ঔরংজীব। রোস দেখি। (দণ্ডাজ্ঞা গ্রহণ, পাঠ ও প্রত্যর্পণ) আচ্ছা—
যাও।

জিহন গমনোত্ত হইলে, ঔরংজীব আবার তাহাকে ডাকিলেন

ঔরংজীব। রোস দেখি! (দণ্ডাজ্ঞা পুনরায় গ্রহণ ও পুনরায় প্রত্যর্পণ)

আচ্ছা—যাও।

জিহন আলির প্রস্থান

ঔরংজীব। (আবার জিহনের দিকে গেলেন ; আবার ফিরিলেন, তারপরে ক্ষণেক ভাবিলেন ; পরে কহিলেন) না কাজ নেই!—জিহন আলি! জিহন আলি! না চলে গেছে। শায়েষ্তা খাঁ!

শায়েষ্তা। খোদাবন্দ!

ঔরংজীব। কি করলাম!

শায়েষ্তা। জাঁহাপনা বুদ্ধিমানের কার্যই করেছেন।

ঔরংজীব। কিন্তু যাক—

ধীরে ধীরে প্রস্থান

শায়েষ্তা। ঔরংজীব! তবে তোমারও বিবেক আছে?

প্রস্থান

সপ্তম দৃশ্য

স্থান—খিজিরবাদের কুটীর। কাল—রাত্রি

সিপার একটি শয্যার উপরে নিদ্রিত, দারা একাকী জাগিয়া তাহার পানে চাহিয়া ছিলেন দারা। ঘুমাচ্ছে—সিপার ঘুমাচ্ছে। নিদ্রা! সর্বসম্ভাপহারিণী নিদ্রা! আমার সিপারকে সর্ব দুঃখ ভুলিয়ে রেখো—বৎস প্রবাসে আমার সঙ্গে হিমে উত্তাপে বড় কষ্ট পেয়েছে, তাকে তোমার ষথাসাধ্য সাহায্য দাও! আমি অক্ষম। সম্ভানকে রক্ষা করা, খাওয়া দেওয়া, বস্ত্র দেওয়া—পিতার কাজ! তা আমি পারি নি—বৎস! তুই ক্ষুধায় অবশ হয়েছিল, আমি খাওয়া দিতে পারি নি। শীতে গাত্রবস্ত্র দিতে পারি নি—আমি নিজে খেতে পাই নি, শুতে পাই নি—সে দুঃখ আমার বক্ষে সে রকম কখন বাজে নি বৎস, যেমন তোর দুঃখ তোর দৈন্ত অবমাননা আমার বক্ষে বেজেছে! বৎস! প্রাণাধিক আমার, তোর পানে আজ চেয়ে দেখছি, আর আমার মনে হচ্ছে আজ যে সংসারে আর কেউ নেই—কেবল তুই আর আমি আছি। আমার এত দুঃখ, আজ আমি কারাগারে বন্দী, তবু তোর মুখখানির পানে চাইলে সব দুঃখ ভুলে যাই।

দিলদারের প্রবেশ

দারা। কে তুমি?

দিলদার। আমি—এ—কি দৃশ্য!

দারা। কে তুমি?

দিলদার। আমি ছিলাম পূর্বের সুলতান মোরাদের বিদূষক। এখন আমি সম্রাট ঔরংজীবের সভাসদ।

দারা। এখানে কি প্রয়োজন?

দিলদার। প্রয়োজন কিছুই নাই। একবার দেখা কর্তে এসেছি।

দার। কেন যুবক ? আমাকে ব্যঙ্গ কর্তে ? কর ।

দিলদার। না যুবরাজ ! আমি ব্যঙ্গ কর্তে আসি নি । আর যদিই ব্যঙ্গ কর্তে আসতাম, ত এ দৃশ্য দেখে সে ব্যঙ্গ গলে' অশ্রু হ'য়ে টস্ টস্ করে' মাটিতে পড়তো—এই দৃশ্য ! সেই যুবরাজ দারা আজ এই ! (ভগ্নস্বরে) ভগবান !

দারা। এ কি যুবক ! তোমার চোখ দিয়ে জল পড়ছে যে—কাঁদছো ! কাঁদো !

দিলদার। না কাঁদবো না ! এ বড় মহিমময় দৃশ্য !—একটা পর্বত ভেঙে পড়ে' রয়েছে, একটা সমুদ্র শুকিয়ে গিয়েছে, একটা সূর্য্য মলিন হ'য়ে' গিয়েছে । ব্রহ্মাণ্ডের একদিকে সৃষ্টি আর একদিকে ধ্বংস হ'য়ে যাচ্ছে । সংসারেও তাই । এ একটা ধ্বংস—বিরাট, পবিজ্ঞ, মহিমময় !

দারা। তুমি একজন দার্শনিক দেখছি যুবক !

দিলদার। না যুবরাজ, আমি দার্শনিক নই, আমি বিদূষক, পারিষদ-পদে উঠেছি, দার্শনিক-পদে এখনও উঠি নি । তবে ঘাস খেতে খেতে মাঝে মাঝে এক একবার মুখ তুলে চাওয়ার নাম যদি দর্শন হয়, তা হ'লে আমি দার্শনিক ! সাহাজাদা, মুর্খে ভাবে যে প্রদীপ জ্বলাই স্বাভাবিক, প্রদীপ নেভা অন্তায় ; যে গাছ গজিয়ে ওঠাই উচিত, মরে' যাওয়া উচিত নয় ; যে মাহুষের সৃষ্টি ঈশ্বরের কাছে প্রাপ্য, দুঃখটি তাঁর অত্যাচার ; কিন্তু তা'রা একই নিয়মের দুইটি নিক্ !

দারা। যুবক আমি তা ভাবি না—তবু—দুঃখে হাসতে পারে কে ? মর্তে' চায় কে ? আমি মর্তে' চাই না !

দিলদার। যুবরাজ ! আপনার প্রাণদণ্ডের আজ্ঞা আমি আজ রহিত করে' এসেছি । আপনি কারাগার হ'তে মুক্ত হ'তে চান যদি, আস্থন তবে । আমার বস্ত্র পরিধান করুন—চলে' যান । কেউ সন্দেহ করবে না । আস্থন, হু'জনে বেশ পরিবর্তন করি ।

দারা। তার পরে তুমি !

দিলদার। আমি মর্তে' চাই । মর্তে আমার বড় আনন্দ ! এ সংসারে কেউ নেই যে আমার জন্ম শোক করবে !

দারা। তুমি মর্তে' চাও !!!

দিলদার। হাঁ, আমি মর্কীর একটা স্বযোগ খুঁজছিলাম সাহাজাদা । মর্তে' আমি বড় ভালবাসি । আপনার কাছে যে আজ কি কৃতজ্ঞ হ'লাম তা আর কি বলবো ।

দারা। কেন ?

দিলদার। মর্কীর একটা স্বযোগ দেওয়ার জন্ম । আস্থন ।

দারা। দয়াময় ! এই-ই স্বর্গ ! আবার কি !—না যুবক ! আমি যাবো না ।

দিলদার। কেন ? মর্কীর এমন স্বযোগও ভিক্ষা করে' পাবো না,

সাহাজ্জাদা ?

পদধারণ

দারা। আমি তোমায় মর্ন্তে দিতে পারি না। আর বিশেষতঃ এই বালককে ছেড়ে আমি কোথাও যাবো না।

জিহন খাঁর প্রবেশ

জিহন। আর কোথাও যেতে হবে না। এই দারার প্রাণদণ্ডের আজ্ঞা।

দিলদার। সে কি !

জিহন। মৃত্যুর জগ্ন প্রস্তুত হউন সাহাজ্জাদা ! ষাতক উপস্থিত।

দিলদার। তবে সম্রাট মত বদলেছেন ?

জিহন। হাঁ দিলদার ! তুমি এখন অহুগ্রহ করে' বাহিরে যাও। আমাদের কার্য—আমরা করি।

দারা। ঔরংজীব তার প্রকাণ্ড সাম্রাজ্যে নিখাস ফেলবার জগ্ন আমাকে আধকাঠা জমিও দিতে পারে না ? আমি এই অধম কুঁড়ে ঘরে আছি, গায়ে এই ছেঁড়া ময়লা কাপড়, খাওয়া খান দুই পোড়া রুটি। তাও সে দিতে পারে না ?

দিলদার। তুমি একটু অপেক্ষা কর জিহন আলি ! আমি সম্রাটের আদেশ নিয়ে আসি।

জিহন। না দিলদার ! সম্রাটের এই আজ্ঞা যে, আজই রাজিকালে সাহাজ্জাদার ছিন্নমুণ্ড তাকে গিয়ে দেখাতে হবে।

দারা। আজই রাজ্যে ! এত শীঘ্র !—এ মুণ্ড তার চাই-ই ! নৈলে তার নিদ্রায় ব্যাঘাত হচ্ছে—এ মুণ্ডের এত দাম আগে জাস্তাম না।

জিহন। আজই রাজ্যে আপনার মুণ্ড না নিয়ে যেতে পারলে আমাদের প্রাণ যাবে।

দারা। ওঃ ! তবে আর তুমি কি করবে জিহন খাঁ। উত্তম ! তবে আমার বধ কর ! যখন সম্রাটের আজ্ঞা—আজ কে সম্রাট, কে প্রজা !—হাসছো ?—হাসো।

জিহন। আপনি প্রস্তুত ?

দারা। প্রস্তুত বৈ কি ! আর প্রস্তুত না হ'লেই বা তোমাদের কি যায় আসে। (দিলদারকে) একদিন এই জিহন আলি খাঁ-ই আমার কাছে করবোড়ে প্রাণভিক্ষা চেয়েছিল। আমি তা দিয়েছিলাম। আজ—বিধি !—তোমার রচনা-কৌশল—চমৎকার !

জিহন। সম্রাটের আজ্ঞা ! কাজীর বিচার ! আমি কি করব সাহাজ্জাদা ?

দারা। সম্রাটের আজ্ঞা ! কাজীর বিচার ! তা বটে ! তুমি কি করবে ! যাও বন্ধু তোমার সঙ্গে আমার এই প্রথম আর এই শেষ দেখা।

দিলদার। পার্লাম না। রক্ষা কর্তে পার্লাম না যুবরাজ ! তবে এই বুঝি দরাময়ের ইচ্ছা ! বুঝতে পারছি না ; কিন্তু বুঝি, এর একটা মহৎ উদ্দেশ্য আছে, এর একটা মহৎ পরিণাম আছে। নইলে এতখানি নির্ধমতা এতখানি পাপ কি

বুধাই বাবে ? জেনো যুবরাজ ! তোমার মত বলির একটা প্রয়োজন নিশ্চয়ই আছে। কি সে প্রয়োজন আমি তা বুঝি না ; কিন্তু আছেই প্রয়োজন ! দৃষ্টমনে প্রাণ বলি দাও ।

দারা। নিশ্চয়ই, কিসের দুঃখ ! একদিন ত যেতে হবেই ! তবে দু'দিন আগে দু'দিন পিছে ! আমি প্রস্তুত । আমার বিদায় দাও বন্ধু ! তোমার সঙ্গে এই ক্ষণমাত্রের দেখা ; তুমি কে তা জানি না, তবু বোধ হচ্ছে যেন তুমি বহুদিনের পুরাতন বন্ধু ।

দিলদার। তবে যান যুবরাজ ! এখানে আমাদের শেষ দেখা ।

প্রস্থান

দারা। এখন আমার বধ কর—জিহ্ন আলি !

জিহ্ন। নাজীর !

দুইজন ঘাতকের প্রবেশ

জিহ্ন সঙ্কেত করিল

দারা। একটু রোস । একবার—সিপার ! সিপার !—না ! কেন ডাকলাম ! সিপার । (উঠিয়া) বাবা !—একি ! এরা কা'রা বাবা !—আমার ভয় কর্ছে ।

দারা। এরা আমার বধ কর্ত্তে এসেছে । তোমার কাছে বিদায় নেবার জন্ত তোমাকে জাগিছি । আমাকে বিদায় দাও বৎস ! (আলিঙ্গন) এখন যাও । জিহ্ন খাঁ, তুমি বোধ হয় এত বড় পিশাচ নও যে আমার পুত্রের সম্মুখে আমার বধ কর্কে ! একে অস্ত্র ঘরে নিয়ে যাও ।

জিহ্ন। (একজন ঘাতককে) একে ঐ ঘরে নিয়ে যাও ।

সিপার। (একজন ঘাতকের দ্বারা ধৃত হইয়া) না, আমি যাবো না । আমার বাবাকে বধ কর্কে ! কেন বধ কর্কে ! (ঘাতকের হাত ছাড়াইয়া আসিল) বাবা—আমি তোমায় ছেড়ে যাবো না ।

এই বলিয়া সিপার সজ্ঞারে দারার পা জড়াইয়া ধরিল

দারা। আমার জড়িয়ে ধরে কি কর্কে বৎস ! ঝাঁকড়ে ধরে' কি আমাকে রক্ষা কর্কে পার্কে ? যাও বৎস ! এরা আমার বধ কর্কে । তুমি সে দৃশ্য দেখতে পার্কে না ।

ঘাতকদ্বয় চক্ষু মুছিতে লাগিল

জিহ্ন। নিয়ে যাও ।

ঘাতক পুনর্বার সিপারকে হেঁচড়াইয়া লইয়া যাইতে আসিল

সিপার। (চীৎকার করিয়া) না, আমি যাবো না । আমি যাবো না—

এই বলিয়া সিপার সেই ঘাতকের হাত ছাড়াইবার চেষ্টা করিতে লাগিল

দারা। দাঁড়াও । আমি ওকে বুঝিয়ে বলছি । তার পরে ও আর কোন আপত্তি কর্কে না—ছেড়ে দাও ।

ঘাতক তাহাকে ছাড়িয়া দিল । সিপার দারার কাছে আসিয়া দাঁড়াইল

দারা। (সপারের হাত ধরিয়া) সিপার !

সিপার। বাবা!

দারা। সিপার—প্রিয়তম বৎস আমার ! আমাকে বিদায় দে। তুই এতদিন এত দুঃখেও আমাকে ছাড়িস্ নি—হিমে, রৌদ্রে, অনশনে, অনিত্রায় আমার সঙ্গে অরণ্যে, মরুভূমে বেড়িয়েছিস্—তবু আমাকে ছাড়িস্ নি। আমি যন্ত্রণায় অন্ধ হ'য়ে তোর বৃকে ছুরি মার্ভে' গিয়েছিলাম, তবু আমায় ছাড়িস্ নি। আমায় প্রবাসে, যুদ্ধে, কারাগারে, প্রাণের মত বৃকের মধ্যে শোণিতের সঙ্গে মিশে ছিলা, আমায় ছাড়িস্ নি ! আজ তোর নিষ্ঠুর পিতা—(বলিতে বলিতে দারার স্বর ভাঙিয়া গেল। তাহার পরে বহুকষ্টে আত্মদমন করিয়া দারা কহিলেন)—তোর নিরষ্ঠ পিতা আজ তোকে ছেড়ে যাচ্ছে।

সিপার। বাবা! মা গিয়েছেন—তুমিও—

ক্রন্দন

দারা। কি কর্‌ক! উপায় নাই বৎস ! আমার আজ মর্ভে' হবে। আমার দেহ ছেড়ে যেতে আজ আমার তত কষ্ট হচ্ছে না বৎস, তোকে ছেড়ে যেতে আজ আমার যে কষ্ট হচ্ছে। (চক্ষু মুছিলেন) যাও বৎস ! এরা আমার বধ কর্‌ক। সে বড় ভীষণ দৃশ্য। সে দৃশ্য তুমি দেখতে পার্‌ক না !

সিপার। বাবা! আমি তোমাকে ছেড়ে যাবো—আমি যাবো না !

দারা। সিপার ! কখনও তুমি আমার কথা অবাধ্য হও নি ! কখনও ত—(চক্ষু মুছিলেন) যাও বৎস ! আমার শেষ আঞ্জা—আমার এই শেষ অহরোধ রাখো। যাও—আমার কথা শুনবে না ? সিপার, বৎস ! যাও।

সিপার নতমুখে চলিয়া যাইতে উজত হইলে দারা ডাকিলেন—'সিপার !' সিপার ফিরিল

দারা। একবার—শেষবার বৃকে ধ'রে নেই। (বক্ষে আলিঙ্গন) ওঃ—এখন যাও বৎস !

সিপার মস্তমুগ্ধবৎ নতমুখে একজন ঘাতকের সহিত কক্ষান্তরে চলিয়া গেল

দারা। (উর্দ্ধমুখে বক্ষে হাত দিয়া) ঈশ্বর ! পূর্বজন্মে কি মহাপাপ করেছিলাম ! ওঃ ষাক্, হয়ে'গিয়েছে। নাজীর তোমার কার্য্য কর।

জিহন। ঐ ঘরে নিয়ে গিয়ে কাজ শেষ করে' নিয়ে এসো, এখানে দরকার নাই।
ঘাতকঘরের সহিত দারা প্রহান করিলেন

জিহন। আমার প্রাণদাতার হত্যাকাণ্ড সম্মুখে নাই দেখলাম।—ঐ কুঠারের শব্দ ; ঐ মৃত্যুর আর্দনাদ।

নেপথ্যে। ও ! ও ! ও !

জিহন। ষাক্ সব শেষ !

সিপার ! (কক্ষান্তর হইতে) বাবা ! বাবা ! (দরজা ভাঙিতে চেষ্টা করিতে লাগিল)

ঘাতক দারার ছিন্নশূণ্ড লইয়া পুনঃ প্রবেশ করিল

জিহন। দাও, মুও আমায় দাও। আমি সন্ত্রাটের কাছে নিয়ে যাবো।

পঞ্চম অঙ্ক

প্রথম দৃশ্য

স্থান—দিল্লীর দরবার গৃহ। কাল—প্রাতঃ

ময়ূর সিংহাসনে ঔরংজীব। সপ্তম্বে মীরজুমলা, শায়েস্তা খাঁ, যশোবন্ত সিংহ,

জয়সিংহ, দিল্লীর খাঁ ইত্যাদি

ঔরংজীব। আমি প্রতিজ্ঞামত মহারাজকে গুর্জর প্রদেশ দিয়েছি।

যশোবন্ত। তার বিনিময়ে জাঁহাপনাকে আমি আমার সেনা-সাহায্য স্বেচ্ছায় দিতে এসেছি।

ঔরংজীব। মহারাজ যশোবন্ত সিংহ! ঔরংজীব ছ'বার কাউকে বিশ্বাস করে না। তথাপি আমরা মহারাজ জয়সিংহের খাতিরে মাড়বার-রাজকে সম্রাটের রাজভক্ত প্রজা হ'বার দ্বিতীয় সুযোগ দিব।

জয়সিংহ। জাঁহাপনার অনুগ্রহ।

যশোবন্ত। জাঁহাপনা! আমি বুঝেছি; যে ছলেই হোক বা শক্তি-বলেই হোক, জাঁহাপনা যখন সিংহাসন অধিকার করে' সম্রাজ্যে একটা শাস্তিস্থাপন করেছেন, তখন কোনরূপে সে শাস্তিভঙ্গ কর্তে যাওয়া পাপ।

ঔরংজীব। আমি এ কথা মহারাজের মুখে শুনে সুখী হ'লাম। মহারাজকে এখন তবে আমাদের বন্ধুবর্গের মধ্যে গণ্য কর্তে পারি বোধ হয়?

যশোবন্ত। নিশ্চয়।

ঔরংজীব। উত্তম মহারাজ!—উজীরসাহেব! স্থলতান সূজা এখন আরাকানরাজার আশ্রয়ে?

মীরজুমলা। গোলাম তাঁকে আরাকানের সীমা পর্যন্ত প্রতাড়িত করে। রেখে এসেছে।

ঔরংজীব। উজীরসাহেব, আমরা আপনার বাহুবলের প্রশংসা করি।—সেনাপতি! কুমার মহম্মদকে গোয়ালিয়র দুর্গে বন্দী করে' রেখে এসেছেন?

শায়েস্তা। খোদাবন্দ!

ঔরংজীব। বেচারী পুত্র! কিন্তু জহরৎ জাহুক যে আমাদের কাছে এক নীতি। পুত্রমিত্র বিচার নাই।

জয়সিংহ। নিঃসন্দেহে জাঁহাপনা!

ঔরংজীব। হতভাগ্য দারার মৃত্যু আমাদের সমস্ত জয়কে স্নান করে' দিয়েছে; কিন্তু ভাই, পুত্র ষাউক, ধর্ম প্রবল হউক।—ভাই মোরাদ গোয়ালিয়র দুর্গে কুশলে আছেন, সেনাপতি?

শায়েস্তা। খোদাবন্দ।

ঔরংজীব। মৃত ভাই! নিজের দোষে সম্রাজ্য হারালে! আর আমি মজাবাজার মহাঋণে বঞ্চিত হলাম!—খোদার ইচ্ছা। দিল্লীর খাঁ! আপনি

কুমার সোলেমানকে কি রকমে বন্দী করলেন ?

দিলীর। জাঁহাপনা! শ্রীনগরের রাজা পৃথ্বীসিংহ কুমারকে সসৈন্তে আশ্রয় দিতে অস্বীকৃত হন। তা'তে কুমার আমাদের পরিত্যাগ কর্তে বাধ্য হলেন। আমি তারপরেই জাঁহাপনার পত্র পেয়ে রাজার সঙ্গে সাক্ষাৎ করে' জাঁহাপনার আদেশ মত বললাম যে, “কুমার সন্ত্রাটের জাতপুত্র, সন্ত্রাট তাঁ'কে পুত্রবৎ স্নেহ করেন, তাঁ'কে সন্ত্রাটের হস্তে সমর্পণ করায় ক্ষাত্ৰধর্মের অন্তথা হবে না।” শ্রীনগরের রাজা প্রথমে কুমারকে আমার হস্তে অর্পণ করতে অস্বীকৃত হ'লেন। পরদিনই তিনি কুমারকে রাজা থেকে বিদায় দিলেন। কারণ বুঝলাম না।

ঔরংজীব। অভাগা কুমার! তার পর!

দিলীর। কুমার তিব্বত যাবার উদ্দেশ্যে যাত্রা করেন; কিন্তু পথ না জানার দরুণ সমস্ত রাজি ঘুরে প্রভাতে আবার শ্রীনগরের প্রাস্তে এসে উপস্থিত হন। তার পর আমি সসৈন্তে গিয়ে—তাঁ'কে বন্দী করি—এতে আমার যদি কোন অপরাধ হয়ে, থাকে, খোদা আমায় রক্ষা করুন! আমি ব্যক্তি বিশেষের ভৃত্য নহি। আমি সন্ত্রাটের সৈন্যাধ্যক্ষ। সন্ত্রাটের আজ্ঞাপালন কর্তে আমি বাধ্য!

ঔরংজীব। তা'কে এখানে নিয়ে আসুন থা' সাহেব!

দিলীর। যে আজ্ঞে!

প্রস্থান

ঔরংজীব। জিহন আলি থাঁকে নাগরিকগণ হত্যা করেছে মহারাজ!

জয়সিংহ। হাঁ খোদাবন্দ! শুনলাম জিহন থাঁরই প্রজারা তা'কে হত্যা করেছে!

ঔরংজীব। পাপাত্মার সমুচিত দণ্ড খোদা দিয়েছেন!—এই যে কুমার!

সোলেমান সমভিব্যাহারে দিলীর থাঁর প্রবেশ

এই যে কুমার—কুমার সোলেমান!—কি কুমার! শির নত করে' রয়েছে যে?

সোলেমান। সন্ত্রাট—(বলিতে বলিতে স্তব্ধ হইলেন)

ঔরংজীব। বল, কি বলছিলে বল বৎস!—তোমার কোন ভয় নাই। তোমার পিতার মৃত্যুর আবশ্যক হয়েছিল। নহিলে—

সোলেমান। জাঁহাপনা, আমি আপনার কৈফিয়ৎ চাহি নাই। আর দিখিজয়ী ঔরংজীবের আর কারো কাছে কৈফিয়ৎ দেবারও প্রয়োজন নাই। কে বিচার করবে! আমাকে বধ করুন। জাঁহাপনার ছুরিতে বখেট ধার আছে, তা'তে বিষ মেশানোর প্রয়োজন কি!

ঔরংজীব। সোলেমান! আমরা তোমাকে বধ করব না। তবে—

সোলেমান। ও 'তবে' অর্থ জানি সন্ত্রাট! মৃত্যুর চেয়ে ভীষণ একটা কিছু কর্তে চান। সন্ত্রাটের মনে যদি একটা নিষ্ঠুর কার্য করবার প্রবৃত্তি জাগে, ত শত্রুর তার বাড়ি আর কোন ভয় নেই; কিন্তু যদি দু'টো নিষ্ঠুর কার্য তাঁ'র মনে পড়ে, তবে যেটি বেশী নিষ্ঠুর সেইটেই ঔরংজীব করবেন তা জানি। তাঁ'র প্রতিহিংসার চেয়ে তাঁ'র দয়া ভয়ঙ্কর। আদেশ করুন সন্ত্রাট—তবে—

ঔরংজীব। ক্ষুব্ধ হযো না কুমার।

সোলেমান। না! আর কেন—ওঃ! মানুষ এমন যুহু কথা কৈতে পারে আর এত বড় দুঃখা হ'তে পারে!

ঔরংজীব। সোলেমান, তোমায় আমরা পীড়ন কর্তে চাই না। তোমার কোন ইচ্ছা থাকে যদি ত বল। আমি অহুগ্রহ কর্ব।

সোলেমান। আমার এক ইচ্ছা যে জাঁহাপনা, আমাকে যথাসাধ্য পীড়ন করুন। আমার পিতৃহস্তার কাছে আমি করুণার এক কণাও চাই না। সম্রাট! মনে করে' দেখুন দেখি যে কি করেছেন? নিজের ভাইকে—একই মায়ের গর্ভের সন্তান, একই পিতার স্নেহসিক্ত নয়নের তলে লালিত, শিরায় একই রক্ত—যার চেয়ে সংসারে আপন আর কেউ নেই—সেই ভাইকে আপনি হত্যা করেছেন। যে শৈশবে ক্রৌড়ার সঙ্গী, যৌবনে স্নেহময় সহপাঠী; যার প্রতি কেউ রোষকটাক্ষ করলে সে কটাক্ষ নিজের বক্ষে বজ্রসম বাজা উচিত; যাকে আঘাত থেকে রক্ষা কর্বার জন্ত নিজের বুক এগিয়ে দেওয়া উচিত; তাকে—তাকে আপনি হত্যা করেছেন। আর এ এমন ভাই! আপনি চাইলে এ সাম্রাজ্য আপনাকে যিনি এক মুঠো ধুলার মত ফেলে দিতে পার্বেন, যিনি আপনার কোন অনিষ্ট করেন নি, যার একমাত্র অপরাধ যে তিনি সর্বজনপ্রিয়—এমন ভাইকে আপনি হত্যা করেছেন। পরকালে যখন তাঁ'র সঙ্গে দেখা হবে, তাঁ'র মুখপানে চাইতে পার্বেন?—হিংস্র! পিশাচ! শয়তান!—তোমার অহুগ্রহে আমি পদাঘাত করি!

ঔরংজীব। তবে তাই হোক। আমি তোমার প্রাণদণ্ডের আজ্ঞা দিলাম!—নিয়ে যাও। (অবতরণ) আজ্ঞার নাম কর সোলেমান!

বালকবেশিনী জ্বরং উম্মিসার প্রবেশ

জ্বরং। আজ্ঞার নাম কর ঔরংজীব!

সোলেমান তাহার হাত ধরিলেন

সোলেমান। এ কে? জ্বরং উম্মিসা!!!

জ্বরং। ছেড়ে দাও। কে তুমি? পাপাত্মাকে আমি বধ কর্বো। ছেড়ে দাও—দাও!!

সোলেমান। সে কি জ্বরং! কাস্ত হও—হত্যার প্রতিশোধ হত্যা নয়। পাপে পুণ্যের প্রতিষ্ঠা হয় না। আমি পার্বাম ত সম্মুখ যুদ্ধে এর শির নিতাম; কিন্তু হত্যা—মহাপাপ।

জ্বরং। ভীক সব! পিতার কুলাকার পুত্রগণ! চলে' যাও! আমি আমার পিতার বধের প্রতিশোধ নেবো! ছেড়ে দাও, ঐ—ভণু মন্থ, ঘাতক—

মুচ্ছিত হইয়া পড়িলেন

ঔরংজীব। মহং উদার যুবক!—যাও তোমায় আমি বধ কর্ব না। শায়েস্তা

খাঁ একে গোয়ালিয়র দুর্গে নিয়ে যাও।—আর দারার কন্যাকে আমার পিতার নিকটে আগ্রার প্রাসাদ দুর্গে নিয়ে যাও।

দ্বিতীয় দৃশ্য

স্থান—আরাকান-রাজপ্রাসাদ।- কাল—রাত্রি

সুজা ও পিয়ারা

সুজা। নিয়তি আমাদের তাড়িয়ে নিয়ে এসে শেষে যে এই বন্থ আরাকানের রাজার আশ্রয়ে এনে ফেলবে তা কে জানতো!

পিয়ারা। আবার কোথায় যে নিয়ে যাবে তাই বা কে জানে?

সুজা। বন্থ রাজা কি রটিয়েছে জানো?

পিয়ারা। কি! খুব জঁকালো রকম কিছু একটা নিশ্চয়। শীঘ্র বল কি রটিয়েছে? শুনবার জন্ত হাঁপিয়ে ম'রে যাচ্ছি!

সুজা। বর্ষের রটিয়েছে যে আমি চল্লিশ জন অখারহী নিয়ে এসেছি—আরাকান জয় কর্তে।

পিয়ারা। বিশ্বাস কি!—শুনেছি ব্যক্তিরার খিলিজি সতের জন অখারোহী নিয়ে বাঙ্গালা দেশ জয় করেছিলেন।

সুজা। অসম্ভব! ওটা কেউ বিদেঘবশে রটিয়েছে নিশ্চয়। আমি বিশ্বাস করি না।

পিয়ারা। তাতে ভারি যায় আসে।

সুজা। পিয়ারা! রাজা কি আজ্ঞা দিয়েছে জানো? রাজা আমাদের কাল প্রভাতে এখান থেকে চলে' যেতে আজ্ঞা দিয়েছে।

পিয়ারা। কোথায়? নিশ্চয় তিনি আমাদের খুব একটা ভাল স্বাস্থ্যকর জায়গার বন্দোবস্ত করেছেন?

সুজা। পিয়ারা তুমি কি কঠিন ঘটনার রাজ্যে একবার ভুলেও এসে নাম্বে না! এতেও পরিহাস!

পিয়ারা। এতে পরিহাস কর্তে নেই বুঝি? আগে বলতে হয়। আচ্ছা, এই নেও গস্তার হচ্ছি।

সুজা। হাঁ গস্তার হ'য়ে শোনো! আর এক কথা শুনবে? শোনো যদি, চোখ ঠিকরে বেরিয়ে আসবে, ক্রোধে কণ্ঠরোধ হবে, সর্ব্বাঙ্গে আগুন ছুটবে।

পিয়ারা। ও বাবা!

সুজা। তবে বলি শোনো!—দুরাত্মা আমাদের আশ্রয়দানের মূল্য স্বরূপ কি চায় জানো? সে তোমাকে চায়!—কি, শুক্ন হয়ে' রৈলে যে, কর পরিহাস।

পিয়ারা। নিশ্চয়। আমার রাজার প্রতি ভক্তি বেড়ে গেল। এই রাজা সমজদার বটে।

সুজা। পিয়ারা! ও রকম ক'রো না। আমি ক্ষেপে যাবো। এটা তোমার কাছে পরিহাস হ'তে পারে, কিন্তু এ আমার কাছে মর্শশেল।—পিয়ারা! তুমি আমার কে তা জানো?

পিয়ারা। দ্বী বোধ হয়!

সুজা। না। তুমি আমার রাজ্য, সম্পৎ, সর্বস্ব—ইহকাল পরকাল! আমি রাজ্য হারিয়েছি—কিন্তু এতদিন তার অভাব অনুভব করি নি— আজ কনুলাম।

পিয়ারা। কেন?

সুজা। যা আমার কাছে জীবন-মরণের কথা, তাই নিয়ে তুমি পরিহাস করছ!

পিয়ারা। না, এ বড় বাড়াবাড়ি; দোজশক্ষে অনেকে বিয়ে করে; কিন্তু তোমার মত কেউ উচ্ছন্ন যায় নি।

সুজা। না। আমি বুঝেছি! তুমি শুধু মুখে পরিহাস করছ; কিন্তু অন্তরে অন্তরে গুম্বরে মরে' যাচ্ছে! তোমার মুখে হাসি চোখে জল।

পিয়ারা। ধরেছ! না! কে বলে আমার চোখে জল! এই নাও, (চক্ষু মুছিলেন) আর নাই।

সুজা। এখন কি কর্বে ভেবেছো?

পিয়ারা। আমার বেচে দাও।

সুজা। পিয়ারা! যদি আমাকে ভালোবাসো ত ও মারাত্মক পরিহাস রেখে দাও। শোন—আমি কি কর্বে জানো?

পিয়ারা। না।

সুজা। আমিও জানি না! ঔরংজীবের দ্বারস্থ হব?—না। তার চেয়ে মৃত্যু ভালো। কি! কথা কছ না যে পিয়ারা!

পিয়ারা। ভাব্'ছি!

সুজা। ভাবো।

পিয়ারা। (ক্ষণেক ভাবিয়া) কিন্তু পুত্র কতারা?

সুজা। কি?

পিয়ারা। কিছু না।

সুজা। আমি কি কর্বে জানো?

পিয়ারা। না।

সুজা। বুঝ্'তে পার্ছি না! অ'অহত্যা কর্বে ইচ্ছা হয়—তবে তোমাকে ছেড়ে যেতে পারি না।

পিয়ারা। আর আমি যদি সজে যাই?

সুজা। স্থখে মর্ন্তে' পারি।—না, আমার জন্ম তুমি মর্ন্তে' যাবে কেন!

পিয়ারা। না তাই হোক্।—কাল প্রভাতে আমাদের নির্বাসন নয়। কাল যুদ্ধ হবে। এই চলিশজন অখারোহী নিয়েই এই রাজ্য আক্রমণ কর; কর'

বীরের মত মর। আমি তোমার পাশে দাঁড়িয়ে মরব! আর পুত্র কন্যারা—তা'রা
নিজের মর্যাদা নিজে রক্ষা করবে আশা করি।—কি বল ?

সুজা। বেশ ; কিন্তু তাতে কি লাভ হবে ?

পিয়ারা। তন্নিম্ন উপায় কি ! তুমি মরে' গেলে আমাকে কে রক্ষা করবে !
আজ তুমি এতদিন বীরের মত জীবন ধারণ করেছো, বীরের মত মর। এই বস্ত্র
রাজাকে এই ঘৃণ্য প্রস্তাব করার যোগ্য প্রতিফল দাও।

সুজা। সেই ভালো। কাল তবে হু'জনে পাশাপাশি দাঁড়িয়ে মরব।

পিয়ারা। তবে আমাদের ইহ জীবনের এই শেষ মিলন রাত্রি ?

সুজা। আজ তবে হাসো, কথা কও, গাও—যা দিয়ে আমাকে এতদিন চেয়ে
দিতে, ঘিরে বসে' থাকতে ! একবার শেষবার দেখে নেই, শুনে নেই। তোমার
বীণাটি পাড়ো। গাও—স্বর্গ মর্ত্যে নেমে আসুক ! ঝঙ্কারে আকাশ চেয়ে দাও।
তোমার সৌন্দর্যে একবার এ অন্ধকারকে ধাঁধিয়ে দাও দেখি। তোমার প্রেমে
আমাকে আবৃত করে' দাও। রোস, আমি আমার অস্বাভাবিকীদের বলে' আসি।
আজ সারা রাত্রি শুমাবো না।

প্রাঙ্গন

পিয়ারা। মৃত্যু ! তাই হোক ! মৃত্যু—যেখানে সব ঐহিক আশার শেষ, স্ব-
হঃখের সমাধি ; মৃত্যু—যে গাঢ় নিদ্রা আর এখানে জাগে না, যে অন্ধকার
এখানে আর প্রভাত হয় না ; যে স্তব্ধতা এখানে আর ভাঙে না। মৃত্যু—মন্দ
কি ! একদিন তো আছেই। তবে দিন থাকতে মরা ভালো। আজ তবে এই রূপ
নির্বাণোন্মুখ শিখার মত উজ্জ্বলতম প্রভায় জলে' উঠুক ; এই গান তারদ্বরে
আকাশে উঠে নক্ষত্ররাজ্য লুঠে নিক ; আজিকার স্ব স্ব বিপদের মত কেঁপে উঠুক,
আনন্দ হঃখের মত কেঁপে উঠুক, সমস্ত জীবন একটি চুষনে মরে' যাক ! আজ
আমাদের শেষ মিলন-রাত্রি।

প্রাঙ্গন

তৃতীয় দৃশ্য

স্থান—আগ্রার সাজাহানের প্রাসাদ-কক্ষ। কাল—রাত্রি

বাহিরে ঝটিকা বৃষ্টি বজ্র ও বিদ্যুৎ

সাজাহান ও জহরৎ উম্মিসা

সাজাহান। কা'র সাধ্য দারাকে হত্যা করে ? আমি সম্রাট সাজাহান, স্বয়ং
তা'কে পাহারা দিচ্ছি ! কা'র সাধ্য !—ঔরংজীব ?—তুচ্ছ ! আমি যদি চোখ
ঝাড়াই, ঔরংজীব ভয়ে কাঁপবে। আমি যদি বলি ঝড় উঠুক ; ত ঝড় ওঠে ;
যদি বলি যে বাজ পড়ুক, ত বাজ পড়ে।

মেঘগর্জন

জহর। উঃ কি গর্জন! বাহিরে পঞ্চভূতের যুদ্ধ বেধে গিয়েছে। আর ভিতরে এই অর্দ্ধোন্মাদ পিতামহের মনের মধ্যে সেই যুদ্ধ চলছে। (মেঘগর্জন) ঐ আবার!

সাজাহান। অস্ত্র নাও, অস্ত্র নাও! অসি, ভল্ল, তীর, কামান নিয়ে ছোটো। তা'রা আসছে।—তা'রা আসছে।—যুদ্ধ কর্ব! রণবাণ্ড বাজাও! নিশান উড়াও!—ঐ তা'রা আসছে। দূর হ, রক্তলোলুপ শয়তানের দূত! আমার চিনিস্ না। আমি সম্রাট সাজাহান। সরে দাঁড়া।

জহরং। ঠাকুর্দা, উত্তেজিত হবেন না। চলুন, আপনাকে শুইয়ে রেখে আসি। সাজাহান। না! আমি সরে' গেলেই তা'রা দারাকে বধ করবে।—কাছে আসিস্ না খবর্দার!

জহরং। ঠাকুর্দা—

সাজাহান। কাছে আসিস্ না। তোদের নিখাসে বিষ আছে, সে নিখাস বন্ধ জলার বাতাসের চেয়ে বিষাক্ত, পচা হাড়ের চেয়ে দুর্গন্ধ! আর এক পা এগোসনে বলছি।

জহরং। ঠাকুর্দা! রাজি গভীর। শোবেন আসুন।

জাহানারার প্রবেশ

জাহানারা। কি করুণ দৃশ্য! পিতৃহারা বালিকা পুত্রহারা যুদ্ধকে সাধনা দিচ্ছে। অথচ তা'র নিজের বুকের মধ্যে ধুধু করে' আশ্রয় জলে যাচ্ছে। কি করুণ! দেখে যাও ঔরংজীব! তোমার কীর্তি দেখে যাও!

জহরং। পিসীমা! তুমি উঠে এলে যে?

জাহানারা। মেঘের গর্জনে ঘুম ভেঙে গেল!—বাবা আবার উন্মাদের মত বকুছেন?

জহরং। হাঁ পিসীমা।

জাহানারা। ঔষধ দিয়েছ?

জহরং। দিয়েছি; কিন্তু এবার জ্ঞান হ'তে বিলম্ব হচ্ছে কেন জানি না।

সাজাহান। কে কলে! কে কলে!

জহরং। কি ঠাকুর্দা!

সাজাহান। মেরেছে! মেরেছে! ঐ রক্ত ছুটে বেরোচ্ছে! ঘর ভেসে গেল!—দেখি! (ছুটিয়া গিয়া দারার কল্লিত-রক্তে হস্ত ছ'খানি মাখিয়া) এখনও গরম—ধোঁয়া উঠছে!

জাহানারা। বাবা! এত রাজি হয়েছে, এখনও শো'ন নি?

সাজাহান। ঔরংজীব! আমার পানে তাকিয়ে হাসছে! হাসছে!—না দুরাশ্রা! তোমার শাস্তি দিব। দাঁড়া ঘাতক! হাত বোড় করে' দাঁড়া! কি! ক্ষমা চাচ্ছি?—ক্ষমা! ক্ষমা নাই। আমার পুত্র বলে' ক্ষমা কর্ব ভেবে-ছিল?—না! তোকে তুষানলে দগ্ধ কর্বার আজ্ঞা দিলাম! যাও, নিয়ে যাও।

জাহানারা। বাবা, শো'ন্ গে যান্!

জহরৎ। জাহান দালা আমার!

হাত ধরিলেন

সাজাহান। কি সমতাজ। তুমি ওর হ'য়ে কমা চাচ্ছ! না আমি কমা কর্ৰ না। বিচার করেছি। দারাকে মেরেছে।

জাহানারা। না বাবা, মারে নি। ঘুমোন্ গে যান্!

সাজাহান। মারে নি? মারে নি—সত্য, মারে নি? তবে এ কি দেখ্লাম! স্বপ্ন?

জাহানারা। হাঁ বাবা স্বপ্ন।

সাজাহান। তবু ভালো; কিন্তু বড় দুঃস্বপ্ন! যদি সত্য হয়!—কি জহরৎ! কাঁদছি'স্ যে!—তবে এ স্বপ্ন নয়? স্বপ্ন নয়!—ও হো—হো—হো—হো!

মেঘগর্জন

জহরৎ। একি হচ্ছে বাইরে! আজ রাত্রিই কি পৃথিবীর শেষ রাত্রি!—সব ক্ষেপে গিয়েছে, জল, অগ্নি, বায়ু, আকাশ, মাটি—সব ক্ষেপে গিয়েছে!—উ: কি ভয়ঙ্কর রাত্রি!

সাজাহান। এ সব কি জাহানারা?

জাহানারা। বাবা! রাত্রি গভীর! ঘুমোন্! আপনি ত উন্মাদ নন।

সাজাহান। না, আমি উন্মাদ নই। বুঝ্তে পেরেছি, বুঝ্তে পেরেছি!—বাইরে ও সব কি হচ্ছে জাহানারা?

জাহানারা। বাইরে একটা প্রলয় বহে' যাচ্ছে। ঐ—শুভুন বাবা—মেঘের গর্জন! ঐ শুভুন—বৃষ্টির শব্দ। ঐ শুভুন বাতাসের ছন্দার! মুহুমূহ: বজ্রধ্বনি হচ্ছে। বৃষ্টি জলপ্রপাতের মত নেমে আস্ছে। আর ঝঞ্ঝা সেই বৃষ্টির ধারা মুখে ছড়িয়ে দিচ্ছে।

সাজাহান। দে বেটারা! খুব দে, খুব দে! পৃথিবী নীরব হয়ে' সব সহ কর্ৰে। ও তোদের জন্ম দিয়েছিল কেন!—ও তোদের বুকে করে' মাহুম করেছিল কেন! তোরা বড় হয়েছি'স্! আর মান্বি কেন!—ওর যেমন কর্ণ তেমনি ফল। দে বেটারা। কি কর্ৰে ও? রাশি রাশি গৈরিক জালা উধমন কর্ৰে? কর্ক, সে গৈরিক জালা আকাশে উঠে দ্বিগুণ জ্বারে তারই বুকে এসে লাগবে। সে সমুদ্র তরঙ্গ তুলে জ্বোধে ফুলে উঠ্বে! উঠ্কে, সে ভরঙ্গ তার নিজের বক্ষের উপরেই দীর্ঘশ্বাসে ছড়িয়ে পড়বে; তার অস্বনির্ভঙ্ক বাস্পে সে ভূমিকম্পে কেঁপে উঠ্বে? কিছু ভয় নেই! তাতে সে নিজেই ফেটে যাবে। তোদের কিছু কর্ৰে পার্ৰে না—অথর্ক বুড়ী বেটা! ও বেটা কেবল শস্ত দিতে পারে, বারি দিতে পারে, পুষ্প দিতে পারে। আর কিছু পারে না। দে, ওর বুকের উপর দিয়ে দলে' দলে' চষে' দিয়ে যা! ও কিছু কর্ৰে পার্ৰে না—দে

বেটারা!—মা, একবার গর্জে' উঠতে পারো মা? প্রলয়ের ডাকে ডেকে, শত সূর্যের প্রভায় জলে উঠে, কেটে চৌচির হয়ে—মহাশূন্যের মধ্যে দিয়ে একবার ছটকে যেতে পারো মা—দেখি, ওরা কোথায় থাকে?

দন্তবর্ষণ

জাহানারা। বাবা! বৃথা এই ক্রোধে কি হবে! শোবেন আছন।
সাজাহান। সত্য মা—বৃথা! বৃথা! বৃথা!

মেঘগর্জন

অহরৎ। উঃ! কি রাজি পিসীমা! উঃ কি ভয়ঙ্কর!

সাজাহান। ইচ্ছা করছে জাহানারা, যে এই রাজির ঝড় বৃষ্টি অন্ধকারের মাঝখান দিয়ে একবার ছুটে বেরোই। আর এই সাদা চুল ছিঁড়ে, এই বাতাসে উড়িয়ে এই বৃষ্টিতে ভাসিয়ে দিই। ইচ্ছা করছে যে আমার বুকখানা খুলে বজ্রের সম্মুখে পেতে দিই। ইচ্ছা করছে যে এখান থেকে আমার আত্মাকে টেনে ছিঁড়ে বা'র করে' তা ঈশ্বরকে দেখাই! ঐ আবার গর্জন!—মেঘ! বার বার কি নিফল গর্জন করছ? তোমার আঘাতে পৃথিবীর বক্ষ খান খান করে' দিতে পারো? অন্ধকার? কি অন্ধকার হয়েছে! তোমার পিছনে ঐ সূর্য, নক্ষত্র-শুলোকে একেবারে গিলে খেয়ে ফেলতে পারো?

মেঘগর্জন

জাহানারা। ঐ আবার!
তিনজনে একত্রে। উঃ কি রাজি!

চতুর্থ দৃশ্য

স্থান—গোয়ালিয়র দুর্গ। কাল—প্রভাত

সোলেমান ও মহম্মদ

সোলেমান। শুনেছো মহম্মদ! বিচারে কাকার প্রাণদণ্ড হয়েছে।
মহম্মদ। বিচারে নয় দাদা, বিচারের নামে। এক ব্যক্তি ছিলেন এই কাকা! আজ তাঁ'রও শেষ হ'লো!

সোলেমান। মহম্মদ! তোমার খবরের কিসে মৃত্যু হয়?
মহম্মদ। ঠিক জানি না। কেউ বলে তিনি সন্নীক জলমগ্ন হ'ন। কেউ বলে তিনি সন্নীক যুদ্ধে নিহত হ'ন। পুত্রকন্যারা আত্মহত্যা করে।

সোলেমান। তা হ'লে তাঁ'র পরিবারের আর কেউ রৈল না।
মহম্মদ। না।

সোলেমান। তোমার স্ত্রী শুনেছে?

মহম্মদ। শুনেছে। কাল সারারাজি কেঁদেছে; ঘুমায় নি।

সোলেমান। মহম্মদ! তোমার এত বড় দুঃখ! সৈতে পাচ্ছ'?

মহম্মদ। আর তোমার এ বড় সুখ! পিতামাতার উদ্দেশে বেরিয়েছিলে; আর দেখা হ'লো না।

সোলেমান। আবার সে কথা মনে করিয়ে দিচ্ছ! মহম্মদ, তুমি এত নিষ্ঠুর!—তোমার পিতা কি তোমাকে এখানে পাঠিয়েছেন, আমাকে নিত্য এই রকম দন্ধ কর্তে। কোথায় আমায় সাঙ্ঘনা দেবে—

মহম্মদ। দাদা! যদি এই বন্ধের রক্ত দিলে তোমার কিছুমাত্র সাঙ্ঘনা হয় ত বল আমি ছুরি এনে এইক্ষণেই আমার বুকে বসিয়ে দিই।

সোলেমান। সত্য বলেছো মহম্মদ! এ দুঃখে সাঙ্ঘনা নাই। যদি সম্পূর্ণ বিশ্বৃতি এনে দিতে পারো, যদি অতীত একেবারে লুপ্ত করে' দিতে পারো— দাও।

মহম্মদ। এমন কোন এক ঔষধ নাই কি দাদা! এমন একটা বিষ নাই যে—

সোলেমান। ঐ দেখ মহম্মদ! সিপারকে দেখ!
সেতুর উপর সিপারের প্রবেশ

সোলেমান। ঐ দেখ বালককে—আমার ছোট ভাই সিপারকে দেখ। দেখ ঐ মুক স্থিরমূর্ত্তি। বুকের উপর বাহু বন্ধ করে' এক দৃষ্টে দূর শূন্তের দিকে চেয়ে আছে—নির্ঝাঁক! এমন ভয়ানক করুণ দৃশ্য কখনো দেখেছো মহম্মদ?—এর পরে আর নিজের দুঃখের কথা ভাবতে পারো?

মহম্মদ। উঃ কি ভয়ানক!—সত্য বলেছো! আমাদের দুঃখ উচ্চারণ করা যায়; কিন্তু এ দুঃখ বাক্যের অতীত। বালক যখন কাঁদে তখন যদি কাছে একটা ভীষণ আর্দ্রনাদ উঠে, অমনি বালকের ক্রন্দন ভয়ে থেমে যায়। তেমনই আমাদের দুঃখ এর কাছে ভয়ে নীরব হ'য়ে যায়।

সোলেমান। ঐ দেখ চক্ষু দু'টি মুদ্রিত করে' দুই হস্ত মর্দন কর্ছে! যেন যন্ত্রণায় হাহাকার কর্তে চাচ্ছে, তবু বাক্ক্ষুর্ভূতি হচ্ছে না—সিপার! সিপার! ভাই!

সিপার একবার সোলেমানের দিকে চাহিয়া পরে চলিয়া গেল

মহম্মদ। দাদা!

সোলেমান। মহম্মদ!

মহম্মদ। আমায় ক্ষমা কর।

সোলেমান। তোমার দোষ কি!

মহম্মদ। না দাদা, আমায় ক্ষমা কর! এত পাপের ভার পিতা সৈতে পার্কে না। তাই তার অর্ধেক ভার আমি নিজের ঘাড়ে নিলাম! আমি ঘোরতর পাপী! আমায় ক্ষমা কর।

জানু পাভিলেন

সোলেমান। ওঠো ভাই! মহৎ, উদার, বীর! তোমায় ক্ষমা কর্ব আমি! তুমি যা সইছ, স্বৈচ্ছায় ধর্মের জন্ত সইছ! আমি শুধু হতভাগ্য।

মহম্মদ। তবে বল আমার প্রতি তোমার কোনও বিদ্বেষ নাই। ভাই বলে' আমায় আলিঙ্গন কর।

সোলেমান। ভাই আমার!

আলিঙ্গন

মহম্মদ। ঐ দেখ তা'রা কাকাকে বধ্যভূমিতে নিয়ে যাচ্ছে!

সোলেমান সেই দিকে চাহিয়া রহিলেন—সেতুর উপরে প্রহরীগণ-বেষ্টিত মোরাদ প্রবেশ করিলেন

মোরাদ। (উচ্চৈঃস্বরে) আল্লা! আমার পাপের শাস্তি আমি পাচ্ছি। দুঃখ নাই; কিন্তু ঔরংজীব বাদ' যায় কেন?

নেপথ্যে। কেউ বাদ যাবে না! নিক্তির ওজন ফিরে যাবে!

সোলেমান। ও কা'র স্বর?

মহম্মদ। আমার স্ত্রীর।

নেপথ্যে। তা'র যে শাস্তি আসছে, তা'র কাছে তোমার এ শাস্তি ত পুরস্কার।—কেউ বাদ যাবে না। কেউ বাদ যায় না।

মোরাদ। (সোল্লাসে) তা'রও শাস্তি হবে! তবে আমায় বধ্যভূমিতে নিয়ে চল! আর দুঃখ নাই—

সপ্রহরী মোরাদ চলিয়া গেলেন

সোলেমান। মহম্মদ! এ কি! তুমি যে একদৃষ্টে ওদিকে চেয়ে রয়েছো? কি দেখুছো?

মহম্মদ। নরক। এ ছাড়া কি আরো একটা নরক আছে? সে কি রকম খোদা?

স্থান—ঔরংজীবের বহিঃকক্ষ। কাল—দ্বিপ্রহর রাত্রি

ঔরংজীব একাকী

ঔরংজীব। যা করেছি ধর্মের জন্ত। যদি অল্প উপায়ে সম্ভব হোত—(বাহিরের দিকে চাহিয়া) উঃ কি অন্ধকার!—কে দায়ী? আমি! এ বিচার, ও কি শব্দ? না বাতাসের শব্দ!—এ কি! কোন মতেই এ চিন্তাকে মন থেকে দূর কর্তে পারিছি না। রাত্রে তন্দ্রায় চলে পড়ি, কিন্তু নিজা আসে না, (দীর্ঘনিশ্বাস) উঃ কি স্তব্ধ! এত স্তব্ধ কেন! (পরিক্রমণ; পরে সহসা দাঁড়াইয়া) ও কি! আবার সেই দারার ছিন্ন শির?—সুজার রক্তাক্ত দেহ!

মোরাদের কবন্ধ ! যাও সব । আমি বিশ্বাস করি না । ঐ তা'রা আবার আমায় ঘিরে নাচ্ছে!—কে তোমরা ? জ্যোতিষ্ময়ী ধুমশিখার মত মাঝে মাঝে আমার জাগ্রত তন্দ্রায় এসে দেখা দিয়ে যাও ।—চলে যাও—ঐ মোরাদের কবন্ধ আমায় ডাকছে ; দারারও মুণ্ড আমার পানে একদৃষ্টে চেয়ে আছে ; স্মৃষ্ণ হাসছে—এ কি সব—ওঃ ! (চক্ষু ঢাকিলেন ; পরে চাহিয়া) যাক ! চলে গিয়েছে !—উঃ—দেহে দ্রুত রক্তশ্রোত বইছে ! মাথার উপর যেন পর্বতের ভার ।

দিলদারের প্রবেশ

ঔরঞ্জীব । (চমকিয়া) দিলদার ?

দিলদার । জাঁহাপনা !

ঔরঞ্জীব এ সব কি দেখলাম ?—জানো ?

দিলদার । বিবেকের ষবনিকার উপর উত্তপ্ত চিন্তার প্রতিচ্ছবি ।—তবে আরম্ভ হয়েছে ?

ঔরঞ্জীব । কি ?

দিলদার । অহুতাপ ! জাস্তাম, হতেই হবে ! এত বড় অস্বাভাবিক আচরণ—নিয়মের এত বড় ব্যতিক্রম—প্রকৃতির কি বেশী দিন সয় ? সয় না ?

ঔরঞ্জীব । নিয়মের কি ব্যতিক্রম দিলদার ?

দিলদার । এই বৃদ্ধ পিতাকে কারারুদ্ধ করে' রাখা ! জানেন জাঁহাপনা, আপনার পিতা আপনার নিশ্চ'মতায় আজ উন্মাদ !—তার উপর উপযু'পরি এই ভ্রাতৃহত্যা ! এত বড় পাপ কি অমনি যাবে ?

ঔরঞ্জীব । কে বলে আমি ভ্রাতৃহত্যা করেছি ? এ কাজীর বিচার !

দিলদার । চিরকালটা পরকে ছলনা করে' কি জাঁহাপনার বিশ্বাস জন্মেছে যে নিজেকে ছলনা কর্তে পারেন ? সেইটেই সকলের চেয়ে শক্ত ! ভাইকে টু'টি টিপে মেরে ফেলতে পারেন, কিন্তু বিবেককে শীঘ্র টু'টি টিপে মারতে পারেন না ! হাজার তার গলা চেপে ধরুন, তবু তার নিয়, গভীর আচ্ছাদিত ভগ্নধ্বনি—হৃদয়ের মধ্যে থেকে থেকে বেজে উঠবে—এখন পাপের প্রায়শ্চিত্ত করুন ।

ঔরঞ্জীব । যাও ভূমি এখান থেকে ! কে তুমি দিলদার যে ঔরঞ্জীবকে উপদেশ দিতে এসেছো ?

দিলদার । কে আমি ঔরঞ্জীব ? আমি মির্জ্জা মহম্মদ নিয়ামৎ খাঁ !

ঔরঞ্জীব । নিয়ামৎ খাঁ হাজী !—এসিয়ার বিজ্ঞতম স্থধী নিয়ামৎ খাঁ !

দিলদার । হাঁ ঔরঞ্জীব । আমি সেই নিয়ামৎ খাঁ ; শোনো, আমি রাজনীতিক অভিজ্ঞতা লাভের জগ্ন এসে ঘটনাচক্রে এই পারিবারিক বিগ্রহের আবর্তের মধ্যে পড়েছিলাম । সেই অভিজ্ঞতা লাভের জগ্ন জঘন্য বিদূষক সেজেছি, একবার একটা সামান্য চাকুরীতেও নেমেছি ; কিন্তু যে অভিজ্ঞতা নিয়ে আজ এখান থেকে বেরোচ্ছি—মনে হয় যে সেটুকু না নিয়ে গেলে ছিল ভালো ।

ঔরঞ্জীব! ভেবেছিলে যে আমি তোমার রৌপ্যের জগ্ন এতদিন তোমার দাসত্ব করিলাম? বিজ্ঞার এখনও এ তেজ আছে যে সে ঐশ্বর্যের মস্তকে পদাঘাত করে। আমি চল্লাম সম্রাট!

গমনোচ্ছত

ঔরঞ্জীব। জনাব!

দিলদার। না, আমায় ফেরাতে পার্কে না ঔরঞ্জীব!—আমি চল্লাম। তবে একটা কথা বলে যাই। মনে ভাব্ছো যে এই জীবন-সংগ্রামে তোমার জয় হয়েছে? না, এ তোমার জয় নয় ঔরঞ্জীব! এ তোমার পরাজয়। বড় পাপের বড় শাস্তি!—অধঃপতন। তুমি যত ভাব্ছো উঠ্ছো সত্যসত্য তুমি ততই পড়্ছো। তারপর যখন তোমার যৌবনের নেশা ছুটে যাবে, যখন সাদা চোখে দেখবে, যে নিজের আর স্বর্গের মধ্যে কি মহা ব্যবধান খনন করেছো, তখন তার পানে চেয়ে তুমি শিউরে উঠ্বে। মনে রেখো।

প্রস্থান

ঔরঞ্জীব নতশিরে বিপরীত দিকে চলিয়া গেলেন

ষষ্ঠ দৃশ্য

স্থান—আগ্রার প্রাসাদ-অলিন্দ। কাল—অপরাহ্ন

জাহানারা, জহরৎ উল্লিসা বসিয়া গল্প করিতেছিলেন

জাহানারা। জহরৎ উল্লিসা! ঔরঞ্জীবের মত এমন সৌম্য, সহাস্ত, মনোহর পাশ্বে দেখেছো কি মা!

জহরৎ। না। আমার একটা ভয় হয় পিসীমা! ভিতরে এত ক্রুর, বাহিরে এত সরল; ভিতরে এত প্রবল, বাহিরে এত স্থির, ভিতরে এত বিষাক্ত, আর বাহিরে এত মধুর!—এও কি সম্ভব! আমার ভয় হয়!

জাহানারা। আমার কিন্তু একটা ভক্তি হয়। বিশ্ময়ে নির্বাক হ'য়ে যাই যে, মানুষ এমন হাসতে পারে—আর সঙ্গে সঙ্গে ব্যাঘ্রের লোলুপ চাহনি চাইতে পারে; এমন মুহূ কথা কইতে পারে—যখন সঙ্গে সঙ্গে অন্তরে বিঘেষের জালায় জলে যাচ্ছে; ঐশ্বরের কাছে এমন হাত জোড় কর্তে পারে—যখন ভিতরে নূতন শয়তানী মতলব কচ্ছে।—বলিহারি!

জহরৎ। ঠাকুর্দাকে এই রকম বন্দী করে' রেখেছেন অথচ রাজকার্যে তাঁর উপদেশ চেয়ে পাঠাচ্ছেন। তাঁর সম্মুখে তার পুত্রদের একে একে হত্যা কচ্ছেন—অথচ প্রতিবারই তাঁর ক্রমা চেয়ে পাঠাচ্ছেন। যেন কত লজ্জা, কত সঙ্কোচ!—অদ্ভুত! ঐ যে ঠাকুর্দা আসছেন।

সাজাহানের প্রবেশ

সাজাহান। দেখ কেমন সেজেছি জাহানারা, দেখ জহরৎ উম্মিসা!
ঔরংজীব এ রত্ন সব পাছে চুরি ক'রে নেয়—তাই আমি পরে' পরে' বেড়াচ্ছি।
কেমন দেখাচ্ছে! (জহরৎকে) আমাকে তোর বিয়ে কর্তে ইচ্ছে হচ্ছে না?

জহরৎ। আবার জ্ঞান হারিয়েছেন! উন্নত্ততা মাঝে মাঝে চন্দ্রের উপর
শরতের মেঘের মত এসে চলে' যাচ্ছে।

সাজাহান। (সহসা গভীর হইয়া) কিন্তু খবর্দার! বিয়ে করিস্ নি।
(নিঃশব্দে) ছেলে হ'লে তোকে কয়েদ করে' রেখে দেবে, তোর গহনা কেড়ে
নেবে! বিয়ে করিস্ না।

জাহানারা। দেখছো মা! এ উন্নত্ততা নয়। এর সঙ্গে জ্ঞান জড়ানো
রয়েছে। এ যেন একটা ছন্দে বিলাপ।

জহরৎ। জগতে বত রকম করণ দৃশ্য আছে জ্ঞানী উম্মাদের মত করণ
দৃশ্য বৃদ্ধি আর নাই! একটা সুন্দর প্রতিমা যেন ভেঙ্গে ছড়িয়ে পড়ে' র'য়েছে!
—উঃ বড় করণ!

চক্ষে বস্ত্র দিয়া প্রস্থান

সাজাহান। আমি উম্মাদ হই নাই জাহানারা! গুছিয়ে বলতে পারি—
চেষ্টা কর্লে গুছিয়ে বলতে পারি!

জাহানারা। তা জানি বাবা।

সাজাহান। কিন্তু আমার হৃদয় ভেঙ্গে গিয়েছে। এত বড় দুঃখ ঘাড়ে করে'
যে বেঁচে আছি, তাই আশ্চর্য! দারা, সজা, মোরাদ—সবাইকে মার্লে? আর
তাদের একটা ছেলেও রৈল না প্রতিহিংসা নিতে!—সব মার্লে!

ঔরংজীবের প্রবেশ

সাজাহান। এ কে? (সভীত বিস্ময়ে) এ—যে সন্ত্রাটু!

জাহানারা। (আশ্চর্য্যে) তাই ত, ঔরংজীব!

ঔরংজীব। পিতা!

সাজাহান। আমার মণিমুক্তা নিতে এসেছ! দেবো না, দেবো না!
এক্ষণই সব লোহার মুণ্ডর দিয়ে গুঁড়ো করে' ফেলবো।

গমনোত্ত

ঔরংজীব। (সম্মুখে আসিয়া) না পিতা আমি মণিমুক্তা নিতে আসি নি।

জাহানারা। তবে বোধ হয় পিতাকে বধ কর্তে এসেছো! পিতৃহত্যাটা
আর বাকি থাকে কেন! হ'য়ে যাক।

সাজাহান। বধ কর্কে! আমার হত্যা কর্কে! কর ঔরংজীব! আমাকে
হত্যা কর! তার বিনিময়ে এই সব মণিমুক্তা তোমায় দেবো; আর—মর্কার

সময় তোমায় এই অল্পগ্রহের জন্ত আশীর্বাদ করে' মর্ক। এই লোল বক্ষ খুলে দিচ্ছি। তোমার ছুরি বসিয়ে দেও।

ঔরংজীব। (সহসা জ্ঞান পাতিয়া) আমাকে এর চেয়ে আরও অপরাধী কর্কেন না পিতা! আমি পাপী! ঘোরতর পাপী! সেই পাপের প্রদাহে জলে' পুড়ে যাচ্ছি। দেখুন পিতা—এই শীর্ণ দেহ, এই কোর্টরগত চক্ষু, এই শুষ্ক পাণ্ডুর মুখ তা'র সাক্ষ্য দিবে।

সাজাহান। শীর্ণ হ'য়ে গিয়েছ! সত্য, শীর্ণ হয়ে গিয়েছ!

জাহানারা। ঔরংজীব! ভূমিকার প্রয়োজন নাই। এখানে একজন আছে সে তোমায় বেশ জানে। নূতন কি শয়তানী মতলব করে' এসেছো বল! কি চাও এখানে?

ঔরংজীব। পিতার মার্জনা।

জাহানারা। মার্জনা! এটা ত খুব নূতন রকম করেছো ঔরংজীব!

ঔরংজীব। আমি জানি ভগ্নী—

জাহানারা। শুক হও।

সাজাহান। বলতে দেও জাহানারা। বল। কি বলতে চাও ঔরংজীব?

ঔরংজীব। কিছু বলতে চাই না। শুধু আপনার মার্জনা চাই।

জাহানারা ব্যঙ্গ হাসি হাসিলেন

ঔরংজীব। (একবার জাহানারার পানে চাহিয়া পরে সাজাহানকে কহিলেন) যদি এ প্রার্থনা কপট বিবেচনা করেন, ত পিতা আহ্নন আমার সঙ্গে; আমি এই দণ্ডে প্রাসাদ ভূগের দ্বার খুলে দিচ্ছি; আর আপনাকে আশ্রয় সিংহাসনে সর্বজনসমক্ষে বসিয়ে সম্রাট ব'লে অভিষেক করি। এই আমার রাজমুকুট আপনার পদতলে রাখ্লাম।

এই বলিয়া ঔরংজীব মুকুট খুলিয়া সাজাহানের পদতলে রাখিলেন

সাজাহান। আমার হৃদয় গলে' যাচ্ছে, গলে' যাচ্ছে!

ঔরংজীব। আমায় ক্ষমা করুন পিতা।

চরণস্বয় জড়াইয়া ধরিলেন

সাজাহান। পুত্র!

ঔরংজীবকে ধরিয়া উঠাইয়া পরে নিজের চক্ষু মুছিলেন

জাহানারা। এ উত্তম অভিনয় ঔরংজীব!

সাজাহান। কথা কস্ নে জাহানারা! পুত্র আমার পা জড়িয়ে আমার ক্ষমা ভিক্ষা চাচ্ছে। আমি কি তা না দিয়ে থাকতে পারি? হা রে বাপের মন! এতদিন ধরে' তোর হৃদয়ের নিভূতে বসে' এইটুকুর জন্ত আরাধনা করিছিলি! এক মুহূর্তে এই ক্রোধ গলে' জল হ'য়ে গেল!

ঔরঞ্জীব। আহ্নন পিতা—আপনাকে আবার আগ্রার সিংহাসনে বসাই।
বদিয়ে মন্ডায় গিয়ে আমার মহাপাতকের প্রায়শ্চিত্ত করি।

সাজাহান। না, আমি আর সম্রাট হ'য়ে বসতে চাই না। আমার সন্ধ্যা ঘনিয়ে এসেছে—এ সম্রাজ্য তুমি ভোগ কর পুত্র! এ গণিমুক্তা মুকুট তোমার! আর মার্জনা! ঔরঞ্জীব—ঔরঞ্জীব! না সে সব মনে কর্ব না! ঔরঞ্জীব! তোমার সব অপরাধ ক্ষমা কবুলাম।

চক্ষু ঢাকিলেন

জাহানারা। পিতা! দারার হত্যাকারীকে ক্ষমা!

সাজাহান। চূপ! জাহানারা! এ সময়ে আমার স্মৃতে আর ঘা দিস্ নে। তাদের তো আর ফিরে পাবো না। সাত বৎসর দুঃখে কেটেছে, এতদিন বড় জ্বালায় জ্বলেছি। শোকে উন্মাদ হ'য়ে গিয়েছি। দেখেছিস্ ত—একদিন স্মৃথী হ'তে দে! তুইও ঔরঞ্জীবকে ক্ষমা কর মা।

ঔরঞ্জীব। আমাকে ক্ষমা কর ভগ্নী!

জাহানারা। চাইতে পার্ছ? পিতার মত আমার স্ববিরত্ব হয় নি। রাজদহ্য! ঘাতক! শঠ!

সাজাহান। তোর মত মাতৃহারা জাহানারা—তোরই মত বেচারী! ক্ষমা কর। ওর মা যদি এখন বেঁচে থাকতো, সে কি কর্ত্ত জাহানারা?—তাই সেই মায়ের ব্যথা যে সে আমার কাছে জমা রেখে গিয়েছে। কি জাহানারা? তবু নিস্তক! চেয়ে দেখ্ এই সন্ধ্যাকালে ঐ যমুনার দিকে—দেখ্ সে কি স্বচ্ছ! চেয়ে দেখ্ ঐ আকাশের দিকে—দেখ্ সে কি গাঢ়! চেয়ে দেখ্ ঐ কুঞ্জবনের দিকে—দেখ্ সে কি সুন্দর! আর চেয়ে দেখ্ ঐ প্রস্তরীভূত প্রেমাশ্র, ঐ অনন্ত আক্ষেপের আপ্পত বিয়োগের অমর-কাহিনী—ঐ স্থির মৌন নিষ্কলঙ্ক শুভ্র মন্দির, ঐ তাজমহলের দিকে চেয়ে দেখ্—সে কি করুণ! তাদের দিকে চেয়ে ঔরঞ্জীবকে ক্ষমা কর—আর ভাব্ তে চেষ্টা কর্ যে—এ সংসারকে যত খারাপ ভাবিস্—সে তত খারাপ নয়। জাহানারা!

জাহানারা। ঔরঞ্জীব! এখানে তোমার জয় সম্পূর্ণ হলো। ঔরঞ্জীব—আমার এই জীর্ণ মুমূর্ষু পিতার অহুরোধে আমি তোমায় ক্ষমা করলাম।

মুখ ঢাকিলেন

বেগে জ্বরং উন্নিসার প্রবেশ

জ্বরং। কিঙ্ক আমি ক্ষমা করি নাই ঘাতক! পৃথিবী শুদ্ধ যদি তোমায় ক্ষমা করে, আমি কর্ব না। আমি তোমায় অভিশাপ দিচ্ছি; ক্রুদ্ধ ফণিনীর উষ্ণ নিঃশ্বাসে আমি তোমাকে অভিশাপ দিচ্ছি। সে অভিশাপের ভৈরব ছায়া যেন একটা আতঙ্কের মত তোমার আহ্বারে বিহারে—তোমার পিছনে পিছনে

ফিরে। নিদ্রায় সেই অভিশাপের পর্বতভার যেন তোমার বক্ষে চেপে ধরে।
সেই অভিশাপের বিকট ধ্বনি যেন তোমার সকল বিজয়বাণ্ডে বেস্বরো বেজে
উঠে। তুমি আমার পিতাকে হত্যা করে' যে সাম্রাজ্য অধিকার করেছো, আমি
অভিশাপ দেই, যেন তুমি দীর্ঘকাল বাঁচো, আর সেই সাম্রাজ্য ভোগ কর ; যেন
সেই সাম্রাজ্য তোমার কালস্বরূপ হয় ; যেন সে পাপ থেকে কেবল গাঢ়তর পাপে
তোমায় নিক্ষেপ করে, যাতে মর্কীর সময় তোমার ঐ উত্তপ্তললাটে ঈশ্বরের
করুণার এক কণাও না পায়।

সাজাহান, ঔরঞ্জীব ও জাহানারা তিনজনেই শির অবনত করিলেন

যবনিকা